

# **САИДА ЗУННУНОВА**

---

**ТАНЛАНГАН АСАРЛАР**

**УЧ ТОМЛИК**

*Биринчи том*

*Шеърлар,  
достонлар*

*Гафур Гулом Номидаги  
Адабиёт ва санъат нашриёти  
Тошкент – 1976*

$$3 \overline{)70403-22} \quad 109-76$$
$$\overline{352 \ (06)-76}$$

## ДЕБОЧА

1937 йилда биринчи шеърим чиққан бўлса, 1957 йилдан бошлаб сал дурустроқ шеърлар ёза бошладим десам, роса йигирма йил йўл юрибман. Шу йигирма йил ичida жуда кўп шеърлар ёздим. 1948 йилда СССР Езувчилар Союзига атъзо қилиб олишган бўлсалар ҳам, ҳозир ўша шеърларимни ўқиб кўриб, менга жуда ён беришганини сезаман.

У пайтларда адабиётга ёшлар ҳозиргидек гуриллаб кириб келётгани йўқ эди. Улуғ Ватан уруши йилларида ака ва оталарида ажралган ёки узоқ вақт айрилиқ ва рўзгор ташвиши билан банд бўлган қизларнииг ўқишилари ҳам анча издан чиққан эди. Шунинг учун бўлса керак, адабиётда аёллардан менинг тенгдошларим йўқ ҳисоб. Ҳозир жуда ажойиб, бири биридан хушгўй шоиралар бор. Булар бирданига, етук ҳолда шеърнингтига кириб келишяпти.

Мен эса адабиётга, юқорида айтганимдек, жуда узок, жуда секин йўл босиб келдим.

Қўлингиздаги китобда биринчи ва иккинчи шеърлар тўпламмалимдан фақат намуналар берилган, холос. Уларни бутунлай кирит-маслигим ёки ҳаммасини олишимнинг иложи йўқ эди. Гарчи ўша пайтларда «Қизнинг ёзи» ва «Янги шеърлар» тўпламларим жамоатчилик томонидан илиқ кутиб олинган бўлса-да, мен уларни архивга ташлаб қўйишдан бошқа илож топмадим. Бу йиллар ичida ўқувчининг савияси жуда юқориляб кетди, менинг ҳам ўзимга бўлган талабни ортди.

Шеър — жуда катта эҳтирос, изтироб, ҳаяжон, кайфиятнинг маҳсули. Шоирнинг ҳисснёт даражаси қанчалик теран бўлса, китобхоннинг юрагига шунчалик чуқур ўрнашади. Бу, қобилиятдан ташқари, жуда катта меҳнатdir.

Менинг адабиётга бўлган муҳаббатим, аввало, ота-онам томонидан авайлангани учун уларнинг руҳи олдида ҳамиша қарздорман. Ҳозир эллик ёш остонасидаги ақл ва кўз билан қараганимда, дадам ва онамнинг камтар, меҳнаткаш, содда, ҳалол одамлар эканлигини жуда-жуда ҳис қиласман. Дадам Эргашбой Зуннунов дунёдан ёш-

гина ўтиб кетган бўлса ҳам, менга умр бўйи упутмайдиган хотирә ва меҳри қолдирган. Дадам болаларининг илми, яхши одамлар бўлишини истарди. Вафотидан сал аввалроқ қўшиниларимиздан бирига: «Ҳеч бўлмаса Саидани ўқитиб қўёлмайманми, деб қўрқаман», деган экан. Мен саккизинчи синфи тамомлаган кезларимда дадам вафот қилди. Болаларнинг каттаси мен эдим. Партия-ҳукуматимизнинг ғамхўрлиги, онамнинг тиришқоқ ва меҳнаткашлиги туфайли ҳаммамиз саломат ўсдик, дадам истаганича илми ҳам бўлдик.

Онам Сабоҳон жуда хушрўй аёл эди. Чиройли овози бор эди. Мен унинг сингилларимга айтган алласини, кашта тикиб ўтириб айтган ҳалқ термаларини гўдак пайтимдаёқ беҳаяжон эшитолмас эдим. Онамнинг ҳаётни оғир бўлди. Жуда кўп йўқотиш, қийинчилик кўрди. Айниқса, ёшгина бир синглимнинг вафотидан кейин онамнинг соглиғи мени жуда қаттиқ ташвишга соларди, қўрқардим, кўнглини кўтаришга ҳаракат қиласардим. Унинг синглим шаънига айтиб йигла-ган байтлари қулогимга кириб ўрнашиб қолар, қуюн сингари югуриб юрардиму, беркинолмасдим. Уша кунлардаги изтироб ва муҳаббат нинг маҳсулни бўлиб «Алла» достоним ёзилди. Онам «Алла»ни ўқишга зўрга улгурди.

Уруш йилларида маҳалладаги аёлларнинг ҳаётлари менга қаттиқ таъсир қиласар эди. Юриб-юриб «Она» деган шеъримни ёздим, лекин кўнглим бўшамади, ўзим қаноатланмадим. Узоқ вақт дилимда кўтариб юрган бу дардни охири «Руҳ билан суҳбат»да тўқдим. Яна нимадир етишмади, «Қўшиниларим» ёзилди.

Шоирлар ичida менинг ҳаётимда жуда ёрқин эсадалик қолдиргани Гафур Ғулом бўлди. Гафур аканинг шеърларини деярли ёд билардим. Гафур aka ўзини оиләмизга яқин тутар, жуда катта шонир бўлишига қарамасдан, у киши билан гаплашиши осон эди. «Қизил Ўзбекистон» газетасининг Саид Аҳмад билан менга берилган саҳифасига Гафур Ғулом жуда илиқ сўзлар ёзиб берган эди. Биринчи китобимга ҳам у киши ном қўйган. «Сувчи қиз» деган шеъримни кўрсатганимда, ўқиб кўриб, бир сатрини тузатган эди. Уша шеърдаги «Бир ўрим соч каби тўлғанади сой» ва «Куз» шеъримдаги «Муқаммал бир газал учун басталанган мақомдай» сатрлари менини бўлиб кетган бўлса ҳам, аслида Гафур aka томонидан тузатилган ва унинг қаламига мансубдир. Бу сатрлар ҳали ҳам ажралиб, кўзим олдида Гафур aka сиймосини гавдалантириб туради.

Салкам қирқ йилдан бери цисър ёзаман. Ингисам жуда ҳам кўплайиб кетса керак, деб ўйлардим. Қирқ йилги меҳнат, мана, енгилгина бўлиб қўлингизда турибди. Энди уни қанчалик баҳолаш сизнинг ихтиёрингизда.

САИДА  
1974, март

# ШЕЪРЛАР



## КОММУНИСТЛАР ПАРТИЯСИГА

Бир ўзбекнинг қизиман, бутун баҳтиёрги  
Бугунги қўшиғимнинг завқи шавқидан маълум.  
Бахтимнинг чин боиси: туғилдим шу ўлкада  
Ва ўзинг бердинг менга чин инсонликдан таълим.

Оддий қалб ташаккури қанча оддий бўлса ҳам,  
Самимияти билан шунча қадри баланддир.  
Эй, менинг жоним, шоним, саодатим партиям,  
Бутун баҳту шодлигим ёлғиз сенинг биландир.

Ҳар қандай мушкул чофи, оламнинг жон қулоги  
Ўрганган сендан тинглаб ҳаёту енгиш йўлин.  
Сен бош бўлдинг, улуғ рус меҳрибон aka каби  
Катта-кичик халқларни етаклаб тутди қўлин.

Ҳали бола эдим мен, шу мустаҳкам сафларнинг  
Солдати бўлмоқликни қанча қилганман орзу.  
Уша вақтдан бошлаб ўзинг бўлдинг, партиям,  
Кимлигимни ўзимга танитмоқликда кўзгу.

Сен бўлмасанг чўридан ўзга кимса бўлмасдим,  
Улмай, ўлимтик бўлиб ўтар эдим оламдан.  
Чиммат остида юзим баҳор кўрмай сўларди,  
Қаддим букилар эди ниҳол вақтида ғамдан.

Сен борсанки, куйимда эшитилмас фифон-зор,  
Сен борсанки, тинчликнинг қўрғони ҳеч қуламас.  
Сен борсанки, келажак қуёш каби мунааввар,  
Гулшанимга малъун ёв яқин келмас, йўламас.

Нега куйламай ахир, зулматни янчган қуёш  
Қалбимни ёритса-ю, шеъримга боқиб турса.  
Истардимки, шу қуёш бутун ҳарорати-ла  
Шеъримнинг томирида ҳамма вақт оқиб турса.

Ўзинг берган умримни бутун мазмуни билан  
Ўзингга бағишиласам, сира армоним қолмас.  
Орзу учун айб йўқ, гарчи зарра бўлсам ҳам,  
Бу зарра зафарларда яшар, ҳеч вақт йўқолмас.

Оддий қалб ташаккури қанча оддий бўлса ҳам,  
Самимияти билан шунча қадри баланддир.  
Эй, менинг жоним, шоним, саодатим партиям,  
Бутун бахту шодлигим ёлғиз сенинг биландир.

## МАВЗОЛЕЙДА

Одамлар дарёси оқади бунга,  
Уммон бўлиб қайтар бундан одамлар.  
Бу ерда кўз, кўнгил киради тилга,  
Бунда тилга кирар ҳатто қадамлар.

Ота даргоҳига келиб, ўзини  
Кўрмаган фарзанддек орзиқиб дилим,  
Келиб қўшиламан мен ҳам шу сафга,  
Зиёратга шундай тушади йўлим.

Мана, неча йилки, парча табиат  
Муаллақ турари сукутга ботиб.  
Меҳр-муҳаббатдан ҳайрон, ҳайратда,  
Билмайин кимни у қўйган йўқотиб.

Илож топсам эди, бўлиб битта гул,  
Димоғига тутсам ҳаёт нафасин.  
Пойига ташлардим, ташлардим буткул  
Эзгу умрларнинг ҳамма, ҳаммасин.

Тиниқ чеҳрасидан чаманзорларнинг,  
Болаларнинг осуда кулгуларидан,  
Нон ҳиди бурқсаган юрт, гулзорларда  
Яйраб юрган элнинг туйғуларидан

Мужда олиб келдим сизга, бобожон,  
Бир нафас тургали келдим этиб бош.  
Сиз берган Ватанини ҳеч вақт, ҳеч қачон  
Дудлар орасидан кўрмагай қуёш.

Табиат! Ҳаво, сув, офтобинг учун  
Гарчанд юрагимиз ҳурматга тўлиқ,  
Қадрдон шу сиймо, азиз Ильични  
Яратганинг учун яна минг қуллуқ.

## РАҲМАТ

*Акам фронтдан менга совға қилиб дафтар юборди*

Олпоқ қордек дафтар бетига  
Шеър ёзаркан бўлиб беҳад шод,  
Хаёл қанот боғлаб отига,  
Сизга томон учди айлаб ёд,  
Ундан сизга юбордим раҳмат.

Шеър париси келди эркалаб,  
Изҳор этиб қўнгил севинчин.  
Меҳр билан тепар эди қалб,  
Шу юборган тұхфангиз учун  
Дилдан сизга ёғдирдим раҳмат.

Ижодимга бир китоб бўлди,  
Сўнгра суртдим уни кўзимга.  
Бу дафтарки, шеърга тўлди,  
Энг биринчи кириш сўзига  
Ёдгор бўлсин деб ёздим раҳмат.

1943

## ЕШЛИК

Эҳ ёшлик, умрнинг гўзал дилбари,  
Беҳисоб зафарлар, бахтларга ёрсан.  
Ёшлик, сен бир умр кетмайсан нари,  
Шу қадар иқболга, толега бойсан,  
Ҳаётнинг кўкида энг тўлин ойсан.

Ҳақиқат, адолат кулган Ватанда  
Сенга фақат-фақат баҳт ўзи йўлдош.  
Саодат кутади ҳар бир қадамда  
Дилинг чекмас азоб, кўзинг тўкмас ёш,  
Чунки Ватанимда азиздир ҳар бош.

О, кўплар баҳт излаб бўлганлар ҳалок,  
Утказмаган сендеқ роҳатда умр.  
Бошидан асрлар кечирган фалак,  
Кўрмаган бу ҳалқни ҳалқинг каби ҳур,  
Сенга Кремль — қуёш сочар ёруғ нур.

Эҳ ёшлик, баҳордек кўркам, қувноқсан,  
Зафарлар улғайтар, ўсадир бўйинг,  
Шоирнинг мисраси каби равнақсан,  
Иқболинг порлоқдир, ойдиндир йўлинг,  
Узатсанг ойга ҳам етади қўлинг.

1946

## ШИРИН КОКИЛИ

Фарҳод ГЭС қизларига

Тўрт томонга нур сочар ҳар толаси зар кокилинг,  
Сочди у Ширин сувин чўлга муаттар кокилинг.

Кокилинг орзусида чекмас эди Фарҳод фифон,  
Бўлмаса эрди зафарларга гаров ҳар кокилинг.

Аҳдига ҳар ким вафо этса дили бўлгай зиё,  
Сен вафо этдингки, бўлди нур ила пар кокилинг.

Орзу жононаси кўнглига бергайди сафо,  
Андижонга бир учни бўлганда ҳайдар кокилинг.

Майдалаб ўрмоқ учун зулфинингга урганда тароқ,  
Гул юзинг атрофига тарқалди анбар кокилинг.

Саида сочди сочинг ишқида сўз дурдонасин,  
Токи таққай ҳар учига ушбу гавҳар кокилинг.

1947

## БОҒДА

Хушнуд кезар эдим мени ҳам боғ аро,  
Ильич чирогида товланар гуллар.  
Муаттар ҳидларга тўлиғдир ҳаво,  
Фазода жаранглар қувноқ кулгулар.

Тун қуюқ киприги бўлган мисоли,  
Чиройли кўзлардек порлар юлдузлар.  
Гўё кўк кўрмакни истаб шу боғни  
Кўксизда очибди ҳисобсиз кўзлар.

Рақс этар «Тановор» қўйига бир қиз,  
Қушдай енгил учар, ўйнар сарвиқад.  
Пирпираб айланар, гоҳи букар тиз,  
Ҳар нигоҳи дилни этар ўзга банд.

Оркестр чаларкан танго куйини,  
Атлас капалаклар ёзарди қанот.  
Кўқдан ой қарайди тўкиб нурини  
Шунча жозибадор, оромбахш ҳаёт.

Гулни уялтириб, очилиб гул-гул,  
Юарлар саф тортиб йигитлар, қизлар.  
Қўлларда китоби, соchlари сунбул  
Юарлар шаҳло кўз, лаби қирмизлар.

Бирининг орзуси юлдузни кўзлар,  
Бири доктор бўлса, бири зўр адиб.  
Бириси имтиҳон ҳақида сўзлар,  
Бирининг фикрида қоғия, радиф.

Хушиуд кезар экан мен ҳам боғ аро,  
Ҳаётга суқланиб боқардим тўймай.  
Менинг ҳам орзуйим буюк, бебаҳо,  
Куйласам Ватаним мадҳини қўймай.

1946

## БАҲОР ТОНГИДА

Баҳор фасли ўз ётогимда  
Тўйиб-тўйиб ухлардим ширин.  
Кимдир келиб деразам қоқди,  
Гўё қоқди элдан яширин.

Сескандиму очдим кўзимни,  
Ташқаридан тонг кулиб боқди.  
Қушдай енгил сездим ўзимни,  
Тонг чиройи дилимни ёқди.

Эҳ, гўзал тонг шунча хушрўй, соз,  
Азалдан мен унинг мафтуни.  
Қўришмоққа йўлига пешвоз —  
Чиқдим, қалбдан севаман уни.

Эсар эди шўх, майнин еллар,  
Сочларимдан тортдилар қўймай.  
Қулоғимга иедир дедилар,  
Сўзларини тингладим тўймай.

«Биз уйғотдик сени уйқунгдан,  
Деразангни бориб чертган биз.  
Бугунги баҳт-саодатингни  
Қабул қилиб ол, баҳтиёр қиз.

Қара, Ватан бурканган гулга,  
Ҳар ғунчада қўринур баҳтинг.  
Пахтазорда мардлардай ишла,  
Достон бўлсин жанговар аҳдинг».

Эҳ, ўйноқи, шўх, майин еллар,  
Оlam-олам илҳом бердилар.  
«Баҳт ҳақида қўшиқларингни  
Умринг бўйи куйла»,— дедилар.

1946

## АНДИЖОН ТОНГИДА

Эрта тонг, юлдузлар ботмаган ҳали,  
Эндиғина ёришиб келарди осмон.  
Тилла ранг оймома кезарди аста,  
Гўзал эди гўё бир кулласимон.

Пахтазор денгиздай улуғ ва кўркам,  
Шаббода ўйнайди ғўза шохидা.  
Эгатлар ичидан майнин бир қўшиқ  
Қулоққа чалинар гоҳи-гоҳида.

«Осмондаги қалдирғоч,  
Мен ҳам сенек учаман.  
Кўнгил қўйдим меҳнатга,  
Колхозим бўлди чаман».

Ҳар саҳар қуёшни уйғотар шу куй,  
Шунинг-чун созида жаранглар виқор,—  
Тонг отмай уйғониш унинг одати,  
У — халқин жонидан севган пахтакор.

Чунки ўз баҳтини, саодатини  
Советлар даврида топди у фақат.

Чунки унга обрў бағишилгандир  
Юракдан қилгани чин, ҳалол меҳнат.

Пахтазор денгиздай улуғ ва кўркам,  
Шаббода ўйнайди ғўза шохидা.  
Эгатлар ичидан ширин бир қўшиқ  
Қулоққа чалинар гоҳи-гоҳида.

*1946*

## ШОИР

*Ҳурматли шоир Гафур Гуломга*

Бутун қалбим билан берилдим унга,  
Мисралар мазмуни қилди мени маст.  
Гўёки ундаги ҳар жумла, ҳар сўз  
Руҳимга азалдан эдилар пайваст.

Қаламинг қудрати қаршисида мен  
Ташаккур айтишга сўз тополмадим.  
Ажойиб маънолар оғушида жим,  
Завқу севинчимдан асабий эдим.

Ҳаётда нур қадрин йўқотмагандек,  
Ноёб фикрларга мангалик одат.  
Кўйла, эй, толеи порлаган шоир,  
Бахтни куйламаклик ўзи саодат.

Севгимнинг сабабин сўрарсан балки,  
Жавобим албатта аниқ ва пухта.  
Чунки ўқиганим ҳар бир шеъримда  
Кремль юлдузи экан омухта.

1947

## М О С К В А

Яратгувчим десам сени, Москвам,  
Миллионлар қалбини этарман изҳор.  
Ҳаётим, ишончим, истиқболим сен,  
Халқ сени она деб атаганча бор.  
Кўз очиб баҳтимни сенда кўрдим мен,  
Иқболим сен билан экан эгизак.  
Москва — баҳтлилар оламин баҳти,  
Москва — енгилмас, порлоқ келажак,  
Кичкина қалбимда севгинг бепоён,  
Оlam ўлчов бўлса келолмайди тенг.  
Сенга эътиқодим шу қадар буюк,  
Қалъянгдай мустаҳкам, меҳринг каби кенг.  
Шу қадар буюксан, шу қадар гўзал,  
Эй, менинг Москвам, менинг Москвам.

Ўзбекка нур берган баҳт қуёшидан,  
Ватаним халқлари дилдан миннатдор.  
Деҳқоннинг ҳиммати — тенгсиз ҳосилда  
Сенинг садоқатинг, меҳринг барқарор.  
Нурингдан баҳраманд халқлар ялласи,  
Ҳар куни йиллардек мазмундор умр,  
Онанинг меҳрибон, юмшоқ алласи,  
Ҳар очиқ чеҳрада порлаган ғуур,  
Ҳаммаси, ҳаммаси эслатар сени.  
О, сени нима деб, қандай атасам?!  
Севгимни этолмай тўлиқ ифода,

Ҳаттоқи қувончим, онамсан десам.  
Она боласига қанча меҳрибон,  
Меҳр-муҳаббатда бўлса ягона.  
Болага онг, ақл, умр берса ҳам,  
Тақдирин берганмас ҳеч қайси она.  
Шу қадар буюксан, шу қадар гўзал,  
Эй, менинг Москвам, менинг Москвам.

1947

## И УЛДА

Қанча-қанча мазгиллар босиб,  
Поезд ҳамон борар илгари.  
Ташқарида изиллар совуқ,  
Қор ялтирар кумуш сингари.  
Оппоқ чойшаб ёпиниб ухлар  
Кўз ўнгимда бепоён дала.  
Кўриб қолдим, тут новдасидан —  
Қушлар учиб кетди бир гала.  
Тикиламан, кўзим қамашар,  
Дарактларда, адирларда қор.  
Оқ ҳарирга ўраб боғларни  
Новдаларда кашф этмиш баҳор.  
Иўловчилар тинч ва хотиржам,  
Баъзисин йўқ суҳбатга раъйи.  
Бири мудрагар, бири қандайдир  
Куйни секин қиласар хиргойи.  
Суҳбатдошим нуроний бир чол,  
Қувноқ, тетик, файласуфнамо.  
Ўз баҳтидан мамнун ниҳоят,  
Кўнгли қайғу-ғамдан мусаффо.  
Дейди:— Роса олтмишга кирдим,  
Лекин кўнглим синикидек ёш.  
Э-ҳа, қайғу-аламларга ҳам  
Ўз вақтида берганимиз бардош.  
Биласанми бизнинг колхозни?  
Ҳар йил газет мақтайди такрор.

Зап\* колхоз-да, бодига кирсанг,  
Жондан бўлак ҳамма нарса бор.  
Бригадирман беш йилдан бери,  
Отангни сен чакана дема.  
Бу йил чунон пахта бердимки,  
План юздан ортиб кетди, ҳа!  
Ажойибdir меҳнатнинг гашти,  
Қариллик ҳам билинмай кетар.  
Нақ юзтага қўл қўйдим яна,  
Ишлаганга, болам, не етар!  
Тўрт йилдирки, қизим Тошкентда  
Олар олий мактабда таълим.  
Муҳлати ҳам битай деб қолди,  
Кейин бўлар катта муаллим.  
Мева-чева дегандай қилиб,  
Ҳар йили бир бораман қишида.  
Бошқа вақт қўл тегмас сира,  
Қўнгил узиб бўлмайди ишдан...  
Суҳбатдошим нуроний бир чол,  
Қувноқ, тетик, файласуфнамо.  
Ҳаётидан мамнун ниҳоят,  
Қўнгли қайғу-ғамдан мусаффо.

1947

## КОЛХОЗДА

*Иккинчи шеър*

Ҳавода қиттай ҳам булут кўринмас,  
Совет кишисидай магрур қуёш ҳам.  
Гўё у пахтазор томошасидан  
Кўнглини узгиси келмаган каби  
Фарб томон оҳиста ташларди қадам.  
Куз сариқ либосга ўраб боғларни  
Олтин сув берибди ҳар бир япроқقا.  
Ҳу ана, ажойиб бир шакл чизиб  
Чуғур-чуғурлашиб бир гала қушлар  
Учиб кетмоқдалар кунботар ёқقا.  
Қенг дала, авжи иш қизиган пайти,  
Қўллар минутларни жиловлашга банд.  
Кечач дорилфунун машғулотида  
Муаллимин мамнун этолган қизлар  
Бугун теримда ҳам Замирамонанд.  
Пахтазор мисоли бўлса бир денгиз,  
Ҳар кўсак ундаги қимматбаҳо тош.  
Ғаввосдек кўринди кўзимга шу дам  
Пахта тераётган ҳар бир кекса, ёш.  
Кўлдан эшифтаним бригадир жувон  
Ғўзалар оралаб келди ёнимга.  
Қуёшда қизарган юзи шу замон  
Яна ҳам кўркамроқ кўришиди менга.  
Жуссаси кичикроқ, юлдузи иссиқ,  
Ўзи ҳам кўп бўлса ўттизларда бор.  
Ким билан суҳбатда бўлмай, барча ҳам

Унинг меҳнатидан мамнун, миннатдор.

— Ҳорманглар, қизларим!

— Бўлинг саломат.

— Ў, раҳмат, яшанглар, чаккимассизлар,

Тугай деб қолибди бу пол ҳам мана.

Тозалаб теринглар, тез тераман деб,

Чаноқда қолдириб кетманглар яна.

Мисоли олмага ўхшаб банд берар,

Очилиб етилган вақтида пахта.

Мана, қараб туринг, бир кўсак билан

Қўлингиз тўлади, қолмас чаноқда.

Шу озда бўлади ҳамма барака,

Томчилар йиғилиб кўл бўлган каби.

Бир чигит нима ҳам бўлар эди деб

Асти ўйлай кўрманг, қўйманг бир грамм.

Шу сиздан Ватанинг, элнинг талаби,

Қиши нима экса, шуни олади,

Ҳеч қачон беҳуда кетмайди меҳнат.

Чинакам тер тўкиб топиб еган ион

Ҳам ширин, ҳам ҳалол, яна беминнат.

Баҳорда ортиқча ёғин кўп бўлиб,

Қанча кун орқага сурилди экиш.

Меҳнатдан қочмадик, чидаш бердик хўп,

Биздан қутулмади ҳеч қандайин иш.

Ҳосил ёмон эмас, кўриб турибсиз,

Лекин, ваъдамиз ҳам айтарлик катта.

Ёрдамга сизлар бор, ҳар қандай қилиб

То байрам кунига қадар планни

Юздан орттирамиз сўзсиз, албатта.

1947

## КОЛХОЗ БОҒИДА

Азим дарахтларнинг учидан қуёш  
Заррин этагини тортқилаб олди.  
Ложувард кўкдаги парча булугда  
Ним пушти қизиллик товланиб қолди.  
Яна ҳам яшнади боғнинг жамоли,  
Тўшига оқшомнинг салқини тегиб.  
Нарида бир аёл катта саватга  
Шафтоли узарди новдани эгиб.  
Худди солдатларнинг сафидай текис  
Йўл бўйлаб экилган мирзатераклар.  
Губорсиз ҳавода шивирлаб майнин  
Ел билан ўйнайди зумуррад барглар.  
Гулларнинг атрини уфуради ел,  
Гоҳида ғувиллаб ўтар болари.  
Ҳув ана, гулзорда капалак қувлар  
Колхознинг уч-тўртта шўх болалари.  
Бир томон беҳизор, бир ёнда эса  
Зилол суви билан жимиirlар ҳовуз.  
Бас десак, кўнмайди бөгбон ота ҳеч,  
Устма-уст сўяди қовун ва тарвуз.  
Ҳар сафар қовунга пичоқ текканда,  
Шириллаб сўклилиб кетгандай чоки,  
Ишкомдан мўралар кўз-кўзлаб ҳуснин  
Сап-сариқ товланиб пишган буваки.  
«Олинглар, қизларим, еб ўтиринглар,  
Тилни ёради-я, қаранг, жонивор.

Шундай қовунлардан бизнинг колхозда  
Сизга санаб берсам неча хили бор.  
Яна боғимиз бор бундан бошқа ҳам,  
Қисқаси, бу колхоз роҳати жоннинг.  
Э, болам, давлатинг бўлгандан кейин  
Ҳар куни келгани яхши меҳмоннинг».  
Ота сўзлар эди ҳаммасин бир-бир,  
Қўзида порларди баҳти иқболи.  
Қувониб дейдикни: «Болам, колхозим  
Бутун турмушимнинг мазаси, боли!»  
Тун қора либосин ёярди аста,  
Аста тиккаланаар кўкда янги ой.  
Йироқда аллаким қиларди ялла,  
Қайдадир шўх қуйлаб оқар эди сой.

1948

## СУВЧИ ҚИЗ

Лайлиниг сочидаи қора эди тун,  
Хаёлчан ошиқдай хомуш эди у.  
Табиат мудрайди, борлиқни бутун  
Тинч роҳат бағрига олганди уйқу.

Кумуш ранг юзини қиё кўрсатиб,  
Аста кўтарилди кўкка тўлин ой.  
Қулоққа севгидан қиссалар айтиб,  
Бир ўрим соч каби тўлғанади сой.

Тун секин ёришди оқариб тонгдай,  
Бепоён пахтазор ёйди кенг қулоч.  
Ерга аксин чизди уста рассомдай  
Ариқ бўйидаги паҳмоқ қайрағоч.

Бир текис бўй чўзган кўм-кўк ғўзалар  
Тиззага уради, бақувват, соғлом.  
Жўяқда сув сингиб секин ўрмалар,  
Енгил қанот қоқар ўйноқи ел ҳам.

Йироқдан кўринди бирор соядек,  
Ҳув ана, сув бўйлаб танҳо юради.  
Энди тетапоя бўлган боладек  
Гоҳи энгашади, гоҳи туради.

Сўнг ўша томондан пахтазор бўйлаб  
Оҳиста таралди шўх, майин ялла.

Гўёки шу куйнинг мафтуни бўлиб  
Бутун қалби билан тингларди дала.

«Ариқ бўйини ўяй,  
Ғўзаларга сув қуяй.  
Ўртоқларимдан қолмай  
Юз центнерга қўл қўяй».

Ой қуюқ баргларни оралаб ўтиб,  
Тангалаб нур сочди қизнинг бошига.  
Ғўзага сув очар қиз қўшиқ айтиб,  
Сочи тўзғиб тушган қора қошига.

1948

# УНИВЕРСИТЕТ ЭСДАЛИКЛАРИ

## 1 БАЙРАМ ТОНГОТАРИ

Иироқлардан жаранг овоз — қўшиқларнинг садоси  
Аҳён-аҳён келиб турди тун бўйи қулоғимга.  
Деразамни очиб кирди шамол билан гул иси,  
Эҳ-ҳе, атир ҳидларими, тўлиб кетди боғимга.

Эрта байрам тараддуси ухлатмайди қизларни,  
Баъзилари ўсма қўяр, баъзилари ўтар соч.  
Хонатласга дазмол урар қўшиқ айтаркан бири,  
Яна бири соч қаричлаб бўлса, дейди, бир қулоҷ.

Мариянинг кулгисидан жаранглайди уйимиз,  
Меҳрихонга ўргатарди танца ёлочкасини.  
Роза, севган йигитини кутиб қолди деб шошар,  
Приколка ахтаради титиб сумочкасини.

Қўшни залдан эшитилар музика, кулги, қўшиқ,  
Ҳаммасини ёзаберсам тамом бўлмайди чоги.  
Омон бўлсин ҳар доимо баҳтиёр, озод ёшлиқ,  
Ильич ниҳол қўйиб берган совет элининг боғи.

## 2. ҮҚИШ ЗАЛИДА

Қалам қитирлайди жимликни бузиб,  
Аҳён-аҳёнда бир очилар варақ.  
Тувакда энг асиł туллар... кенг зални  
Кундуздай ёритар электр — чироқ.

Шу ёруғ, озода хонада мен ҳам  
Үтириб мутолаа қилмоқда эдим.  
Бир оз асабларга бермоқ бўлиб дам  
Ултирган дўстларга бир-бир қарадим.  
Жимгина кузатдим ва севинчимдан  
Унтиб қўйибман китобни андак.  
Чунки гўзаллиги, равнақи билан  
Кўзимда намоён эди келажак.  
Бири ўрганмоқда Лениннинг томин,  
Бирини банд этган чигал муаммо.  
Бирон кун шуларнинг бирин қўлида  
Балки, ўлимга ҳам топилар даво.  
Таажжуб этмасман, ҳар бирин умри  
Зиммамга биттадан достон юкласа.  
Таажжуб этмасман, келаси бир кун  
Баҳор бошланибоқ гўза гулласа.  
Чунки Лениннинг ўлмас авлоди,  
Дунёда ягона ғолиб ёшлар бу.  
Шулар қаторида бўлганим учун  
Қувончим, қудратим, иқболим мангур.

### БАҲОР ОҚШОМИДА

Қечки пайт ўйноқи шабада билан  
Гитара овози таралди майнин.  
Китобни ёпдиму жим қулоқ солдим,  
Дилга ором берди эшиятган сайин,  
Охир тинглагали чиқдим атайин.

Қизларнинг давраси — кулги, қаҳқаҳа  
Мени ҳам қўймади, бағрига олди.  
Нозик бармоқлар-ла титраган торга  
Кўзим ихтиёrsиз термилиб қолди,  
Бу қўшиқ қалбимга бир оташ солди.

Чал, дўстим, яшайлик, сурайлик даврон,  
Ўз Ватан, ўз азиз тупроғимиизда.

Сен шундай чалгинки, ҳаттоқи бу куй  
Қариб, юз кўришган бир ҷоғимизда  
Бугундай янграсин қулоғимиизда.

Улуғ Москва бор, демакки бизни  
Сира тарк этмайди саодат-иқбол.  
Қўшиқ айт, ўртоқжон, тинглай деб чиқдим,  
Сўровим келмасин қўнглингга малол,  
Кел, бирга куйлашай, яна шўхроқ чал.

1948

#### 4. ИЛҲОМ

Болалик ҷоғимдан тушдим қўйингга,  
Мактаб ҳаётида кўриб биринчи.  
Ушандан бери мен шайдоман сенга,  
Сен билан истиқбол, баҳтим, севинчим.

Қаерга боқмайин кўраман сени,  
Ойнинг шуъласида, сувнинг мавжида.  
Завқ билан тинглайман қўшиқларингни,  
Булбул навосида, дутор авжида.

Мен сени тинглайман қувончга тўлиб  
Субҳидам шамоли эсган паллада.  
Мен сени тинглайман мафтунинг бўлиб  
Халқим куйлагани ҳар бир яллада.

Бўлиқ паҳталарнинг юзига боқсам,  
Иқбол юлдузидек ҷарақлаб кетдинг.  
Кун демай, тонг демай ё демай оқшом,  
Уйқу бермадингу дилни банд этдинг.

Станок ёнига донгдор қизларнинг  
Дилбар қўшиғига жўр бўлар созинг.

Қаерга боқмайин, шодлик ичидан  
Янграйди ёз деган қувноқ овозинг.

Кремль курanti занг урган чоғда  
Улмас мисра бўлиб дилга келасан.  
Баҳор кезларида сўлим боғларда  
Оромбахш шабада бўлиб еласан.

Оталар ғурури, она қувончи,  
Фарзанднинг кўзида кўраман сени.  
Хулласи, қаерга боқмай, шу қувноқ  
Ҳаётнинг ўзида кўраман сени.

Болалик чоғимдан тушдим куйингга,  
Мактаб ҳаётида кўриб биринчи.  
Ўшандан бери мен шайдоман сенга,  
Сен билан истиқбол, баҳтиим, севинчим.

1949

# ВАТАН

## 1. ПУШКИН

Тарих томларини  
варақлаб кўрсам,  
Қонли саҳифалар  
бағримни тиғлар.  
Улим даҳшатлари:  
ҳақорат,  
хўрлик...  
Навқирон ёшликлар ўтар сургунда;  
Энг ноёб сатрлар  
шўрлик мужикнинг  
Аянч тақдиридан  
дил шикаста, қон,  
Ўқийман: гўдаклар  
очликдан йиғлар,  
Замона зиндондир,  
замона зиндон!

\* \* \*

Ҳалок бўлди у ҳам,  
оташин қалбда  
Ҳали қофияга  
тушмаган қанча  
Исёнкор, оромбахш  
қўшиқлар қолди.

Ифлос тирноқларнинг  
тимдалашидан  
Энг нозик пардада  
үзилди лира.  
Гўёки шу билан  
жирканч афтини  
Унинг шеърларида  
кўрмакдан худди  
Улимдан қўрқандай  
ҳуркиган хоқон  
Ўзининг одатий  
ўчини олди.  
Шу тахлит шонрни  
этдилар қурбон.

\* \* \*

Аммо қўшиқлари,  
эрк қўшиқлари  
Мардонавор ўтиб  
зулмат, бўрондан,  
Етиб кела олди  
куёш юртига.  
Қудратли қўл билан  
қўйилган ҳайкал  
Юз йиллар сўнггида кўтаролди қад.  
Ҳайкалки, шонрнинг  
ўзи айтгандай,  
Бир умр ўлмаслик  
умрга эга!  
Ҳайкалки, бахтиёр,  
озод Ватанда  
Хурмату қадрини  
сақлайди агад.

Ҳайкалки, дилларда  
мехри бир жаҳон.

\* \* \*

Уни эсга солар  
илк баҳор пайти  
Қавказ бошларидан  
эсган шабада.  
Қутлуғ қадамидан  
унади гуллар  
Уни ёдга олиб  
у юрган боғда.  
Бахтиёр, нотаниш  
бўлган авлоднинг  
Шеърида яшайди муҳтарам оти.  
Маърифат, эрклиники  
севган қалбларда  
Ҳақлиқ қудратидай  
мангу сақланур  
Эрклиқ куйчисининг  
ишқу ҳурмати,  
Қўшиқни севади  
бизда ҳар инсон.

## 2. МЕНИНГ ВАТАНИМ

Юз йил умр кўрсам,  
юз йил шеър ёзсанам,  
Юз йил таърифингни  
айтсан муттасил.  
Барибир, севгили  
ёрин расмини  
Чизмоққа муносиб  
ранг тополмайин

Чаманда тентираб  
юрган рассомдай,  
Сенинг тасвирингга  
сўз ахтарарман,  
Сўзлар сарасидан  
шу бугунгидай.  
Юз йилги шеъримни  
Ингсалар ҳамки,  
Бўлмайди дилдаги  
севгимдай асили,  
Эй, менинг Ватаним,  
менинг Ватаним!

, \* \* \*

Дунёда не яхши  
хислатларки бор,  
Ҳаммаси, ҳаммаси  
сенда мужассам.  
Азиз тупроғингни  
кўзимга суртиб,  
Баҳорда баргларга  
юзимни суртиб  
Инсонлик ҳурмати  
иҷаман қасам:  
Сенга қурбон бўлса  
майли, жон-таним.  
Сенинг шоирангман.  
шу улуғ элнинг  
Бахтини кўзловчи  
бир жигарбанди.  
Адолат, эркликни  
куйлаганим-чун

Қувғинди бўлмайман  
кенг қучоғингдан,—  
Биз доим биргамиз,  
менинг Ватаним.  
То тирик эканман,  
мехринг, ғурурни'  
Меҳнатда, роҳатда  
жоним пайванди,  
Сен менинг севганим,  
сен мақтаганим!

1949

## О В О З И М

Уруш оловини ёқувчиларга жавоб

Мен бир оддийгина ўзбек қизиман,  
Тингланг, жаноб, сизга бир оз сўзим бор.  
Мунча ҳам тинчимас кунга қолдингиз?  
Лоақал бир марта ўйласангиз-чи!  
Заррача бормикан сизда виждон, ор.  
Америка, Америка, дейсиз-ку, бироқ,  
Нима иш қилдингиз унинг йўлида?  
Йўқ, жаноб, Америка тақдири бу кун,  
Унга қурбон берган ва уни севган  
Минглаб америкаликлар қўлида.  
Билмайсиз, нимадир фарзанднинг доғи,  
Қизингиз қолмаган келинликда тул.  
Чиройли уйингиз, кўркам боғингиз  
Обод шаҳарингиз ўрнида ҳали  
Кўрганингиз йўқ-да уюм-уюм кул.  
Хотинингиз нозик қўллари билан  
Ўзи-ю, ўғли-чун чопибдими ер?  
Қўйинг-чи, ўзингиз халқнинг тузини  
Оқлашга муносиб бирор марта ҳам  
Жонингиз койитиб тўкканмисиз тер?  
Йўқ, жаноб, бу ишлар одамзодга хос,  
Сизда нима қилсан диёнат, виждон.  
Охири кўр қулур сизни албатта  
Очликдан қуриган ҳинд дехқонининг  
Оғзидан юлиб олиб еганингиз нон.  
Биласизми, Украина ери куйганда

Кўйган эди менинг ризқим ва ионим.  
Улуғ руснинг ўғли қад букмай, мағур  
Оғир қийноқларга берганда бардош,  
Азобин сезганман, ачиган жоним.  
Үйидан қувилган яҳудий қизни  
Бағримга олганман, бўлганман ўртоқ.  
Онадан айрилган гўдак инграши,  
Боладан айрилган она додига  
Яширин дард билан солганиман қулоқ.  
Сиз бўлса бир нафас тинчий олмайсиз,  
Қон иси кетидан қувлайсиз ҳамон.  
Биламан, тарихга боққингиз келмас,  
Лекин, кечаги суд<sup>1</sup> башарангизни  
Яна бир мартаба қилди намоён.  
Россияда портлаган одатий мина  
Роса қўрқитибди, титрайсиз дир-дир.  
Эҳтимол, ўша кун биз қўриқ очдик,  
Ёки тоғ йиқитдик, бироқ айтдик-ку,  
Атом — бу бизларга кўпдан эмас сир.  
Кўрлигингиш шу-да, оёғингизниңг  
Остида турипти ўз гўрковингиз.  
Сиз бўлса Россия, Россия, дейсиз  
Ногоҳ чақиб олса чумоли ёки  
Ўнгидан келмаса қилган овингиз.  
Россия қон ичиб ўрганган эмас,  
Ҳар қанча уринманг, тарқатмацг овоз,  
Лекин, демократия, озодлик сўзи  
Россия ҳақлигин этиб намойиш  
Бутун дунё бўйлаб қилмоқда парвоз.

1949

<sup>1</sup> Венгрия давлат хоннлари устидан Будапештда бўлган суд.

## ҚИШЛОҚ

Шунча хушманзара, гўё табиат  
Бутун чиройини шу ерга тўккан.  
Ҳар бир туп ғўзанинг япроқларига  
Юзлаб юлдузларнинг жамоли чўккаи.

Атрофни ўраган ним кул ранг тоғнинг  
Устидан оқариб кўринса ҳам қор,  
Асал мевалардан эгилган шохлар,  
Эгилган, боғбондан гўё миннатдор.

Иироқларга боқсанг юз хил ранг билан  
Кўзингда товланар кенг, яшил водий.  
Хў, янги уйларнинг режасин тузган  
Бизларнинг ўзимиз, мардлар авлоди.

Пахтазордан янграб кулги гурлади,  
Мени чулғаб олди ажиб ширин ҳис.  
Кўзимга отадек яқин кўринди  
Пайкал четидаги мўйсафида раис.

Утиб кетди терлаб-пишиб паровоз,  
Қатор вагонларда тўла нефту дон.  
Радиода таратган кўп майин бир куй  
Қалбни эритди-ю, сўнг бўлди пинҳон.

Қизлар кулгисига уланиб кетди  
Жаранглаб чалинар экан қўнгироқ.

Қувноқ болаларга тўлди бир зумда  
Мактаб ёнидаги кенг мевазор боғ.

Шунча хушманзара, озод инсоннинг  
Меҳнати, меҳридан кўкарган қишлоқ.  
Ҳар бир хонадонда қўйлар, сигирлар,  
Мўлу кўл бу ерда сарёғу пишлоқ.

Ҳаётда барака, роҳат мўл, чунки  
Ишчи билан дехқон қондош, қариндош.  
Қишлоғу шаҳарнинг яшнар жамоли  
Барига ягона партиямиз бош.

*1950*

## ПАРТБИЛЕТ ОЛГАНДА

Олиб бердим кўкрак чўнтағингиздан,  
Нима ҳам деярдим, фақат йигладим.  
Дадажон, сиз ундан ажралмасдингиз,  
Энди-чи? Не учун турмоқдасиз жим.

Шу азиз сийнадан йигирма уч йил,—  
Ажралмай, сиз билан яшабди, бироқ  
Шу бугун олгандай яп-янги, тоза,  
Жилдлари ҳар қандай ғуборлардан пок.

Мана, партизанлик йилларнинг шони,  
Колхоз тузишдаги чеккан жафолар.  
Мана, ўлмасликнинг гувоҳномасин  
Қалбида сақлаган севги, вафолар.

Уни бераётиб сизу ўзим-чун  
Кўзимга суртдиму ўпдим авайлаб.  
Гарчи бола эдим, ёд этдим қасам,  
Шу азиз жилдларга қўяётиб лаб.

У бугун, дадажон, менинг қўлимда,  
Демак, қалбимдадир Ленин ҳурмати,  
Нақадар шарафдир ўзбек қизининг  
Коммунист инсон деб аталса оти.

Бу ном виждон, умр, саодат, ҳаёт,  
Энг олий туйгулар бунда мужассам.  
Шунинг-чун баҳтлиман, шунинг-чун мағрур,  
Шунинг-чун жаранглар инсонман!

Мен бугун коммунист, мана, дадажон,  
Уша қутлуг билет менда ушбу дам.  
Демак, сиз ҳаётсиз, демакки уни  
Биздан ололмайди, ҳатто ўлим ҳам.

1950

## БАЙРАМ ПАРАДИ

Нега севинмайин, шу ғолиб халқнинг  
Фарзандиман, севинмай нега?!  
Элга баҳт, ўлкага бир умр баҳор,  
Равнақлик бергандир шу халқ шеъримга.

Ана, парад ўтар, гўё чеки йўқ,  
Шиддатда мисоли денгиз тўлқини.  
Кўкдаги қуёшнинг илк шуъласимас,  
Лола байроқларнинг олов ёлқини.

Ойина бўлди-ю ҳар битта чеҳра,  
Мен унда баҳтиёр ўзимни кўрдим.  
Ёшларнинг беғубор ёноқларида  
Саодат яшнатган юзимни кўрдим.

Ўғлини елкага опичлаб ўтган  
Отанинг шодлигин кўришдим баҳам.  
Ахир мен у билан мақсаддош, йўлдош,  
Унинг баҳти асли баҳтим менинг ҳам.

Парад тўлқинидан узолмайман кўз,  
Ўтмоқда, кўринмас ҳамон охири.

Бу совет халқидир, бу менинг халқим,  
Қуёшдек сахи-ю, бўрондек қаҳрли.

Байроқлар... Музaffer лола байроқлар,  
Ҳилпираб бормоқда, сафлар мустаҳкам.  
Тинчлик қудратини этиб намойиш  
Шу байроқ остида бораман мен ҳам.

1950

## ҚИШ ОҚШОМИ

Мадори қуриган йўловчи каби,  
Оппоқ қор ёғмоқда секин, бемалол.  
Ё кўк тўзғитарми юлдузларини,  
Бу қандай гўзаллик, қандай ажиб ҳол?!

Тўйнинг сарупосин кийган келиндек  
Оқ ҳарир лиbosга ўранган шаҳар.  
Новдалар саломга эгилган андак,  
Киприклар устида момиқ енгил пар.

Қийғос гуллагандек новдалар оппоқ,  
Ё рассом чизганми буни атайни?  
Бу ёғи зарми ё гулми ярқироқ,  
Шунчалар нафису шунчалар майин.

Қизлар ўтиб кетди қорбўрон ўйнаб,  
Қувноқ кулгилари қолди қулоқда.  
Чиройли, бир текис кенг йўлка бўйлаб  
Нур порлар, қор порлар йироқ-йироқда.

Тинмай машиналар ўтиб туради,  
Трамвай жиринглар, курант ураг занг.  
Кишини ҳаётга мафтун этади  
Радио таратган ёқимли оҳанг.

Завқ билан кездим мен, ҳатто совуқнинг  
Заҳрини сезмабман, юрибман узоқ.  
Билсамки, Ватапнинг дилдаги ишқи  
Совуқни, мушкулни енгаркан мутлақ.

Билдимки, бу севги, бу ўт олдида  
Музлар эрир экан, юмшар экан тош.  
Билдимки, бу севги, бу ўт қалбимда  
Ўзи алоҳида экан бир қуёш.

1950

.

## БИЗ ТИНЧЛИК ХОҲЛАЙМИЗ

Мен Совет қизиман, баҳтиёр Шарқнинг  
Миллион қизларининг бириман, жаноб.  
Шуларнинг номидан сўзлайман, тингланг,  
Тингланг, ҳақиқатнинг олдида ҳеч бир  
Ҳийла-найрангингиз берганмиди тоб?  
Мана, имзо чекдим, имзо чекди ҳинд,  
Имзо чекди эллар сизни лаънатлаб.  
Имзо чекди тутқун Эрон қизлари,  
Имзо чекди халқлар, демак уруши  
Албатта ёнгажак бу ҳақли талаб.  
Ҳали ёдимиизда кечаги жангнинг  
Бошларга келтирган даҳшат, кулфати.  
Ҳали гимнастерка чўнтакларида  
Беш йил ҳижрон билан ўртсанган ёрнинг  
Сақланур сиёҳи ўчмаган хати.  
Москва ёнида азиз рус билан  
Ўзбекнинг ҳам тўккан юрак қони бор.  
Атомни пеш қилманг, тупроғимизнинг  
Ҳар бир заррасида тўплар даҳшати,  
Юзлаб атомларнинг кучи — жони бор.  
Йўқ, уруш бўлмайди, тинчлик хоҳлаймиз!  
Тинчликни хоҳлади эркесвар инсон.  
Сиз бўлса туну кун доллар ғамида  
Американинг ўтмас мис чақасига  
Сотмоқдасиз, жаноб, номусу виждан.  
Карвон ўтаберар, уни йўлидан

Тўхтата олмайди итнинг ҳуриши.  
Қанча қўрқсангиз ҳам коммунизмдаи,  
Унинг келажаги қуёшдай аниқ,  
Чунки, коммунизм тарихнинг иши.  
Мана, имзо чекдим, имзо чекди ҳинд,  
Имзо чекди эллар сизни лаънатлаб.  
Имзо чекди тутқун Эрон қизлари,  
Имзо чекди халқлар... Демак, урушни  
Албатта енгажак бу ҳақли талаб!

1950

## Л Е Н И Н

У чинакам қуёш бўлиб, ҳаёт бўлиб туғилди,  
Зулмат олам ярақ этиб ёруғланди кўзларда.  
У кўринар иқбол бўлиб, умр бўлиб, нур бўлиб,  
Лаблардаги кулгига-ю, табассумли юзларда.

Куёшдан ҳам табаррукроқ бўлган унинг умрига  
Сира ўлчов бўлолмайди на асрлар, на йиллар.  
Чунки ҳаёт бергувчини айтиб бўлмас ўлди деб,  
Асрдошим, деб атайди уни мангу насллар.

У яшайди озод қалбнинг қўшигида, куйида,  
Мазлумларнинг орзусида умид юлдузи бўлиб.  
Ўлди демоқ мумкин эмас, ахир унинг ўзи-ку  
Туғилгандир инсон учун ҳаётнинг ўзи бўлиб.

Кечагина биз қутлаган кўп муборак етмиш йил  
Эндиғина яшамоққа бошлаган ёши эди.  
Озод олам оёғига қалқиркан, партияни .  
Улуғ Ленин давомчиси, соғ бўл, омон бўл, деди.

У яшайди озод қалбнинг қўшигида, куйида,  
Мазлумларнинг орзусида умид юлдузи бўлиб.  
Ўлди демоқ мумкин эмас, ахир унинг ўзи-ку  
Туғилгандир инсон учун ҳаётнинг ўзи бўлиб.

1950

## ТОНГДА

Москва уйғотганда мени уйқумдан  
Тонг отмоқда эди, оппоқ кумуш тонг.  
Курант садолари кенг Ватан бўйлаб  
Хизматчи, деҳқону олимдан тортиб —  
То чўпон уйида чаларди оҳанг.  
Москва уйғотди, унинг нафаси  
Мана, гуркирайди обод уйимда.  
Негадир шу маҳал бошқа бир Шарқнинг,  
Уолл-стритлар топтаган Шарқнинг  
Қизлари ўтдилар бир-бир ўйимдан.  
Тонг билан уйғонган эронлик қизнинг  
Қўзидан ўтгандир, балки бурда ион.  
Балки шу субҳидам изгиринида  
Қоқ суяқ қўлини чўзиб, термилиб  
Ўтгандир бахшиш деб бечора нимжон.  
Балки, деб гапирдим, йўқ, худди шундай,  
Ү ерда тонг отса безиллар инсон.  
Ү ерда ҳақорат, очлик, ҳақсизлик  
Улимни кўтариб ўз елкасида  
Изиллаб юради оч бўрисимон.  
Хаёлда умримни айладим қиёс,  
Ҳаёт дилбарлиги ортди яна ҳам.  
Мен ҳаётни севдим ва ҳаёт мени  
Бағрига эркалаб қаттиқроқ босди,  
Биз биргамиз, демак, йўқ ўлиму ғам!  
Ана, тонг отмоқда, оппоқ кумуш тонг,

Мен эса илҳомнинг оғушида маст.  
Бир қиз ишга шошар, бири ўқишига,  
Бири диплом ёзар, ҳар тун чироғи,  
Кўраман, тонг билан бўлади пайваст.  
Бу совет Шарқидир, советлар Шарқи,  
Бу ерда тонг билан янги баҳт келур.  
Бу ерда ҳар куннинг ғалабасига  
Мазмун бўлган озод, улуғ халқларнинг  
Ўзлари яратган баҳти таҳт келур.  
Лекин вақт келади, эронлик қиз ҳам  
Мен каби завқ билан кутади тонгни.  
Кубадаги қуёш унда ҳам балқир  
Ва у эшитади тонг билан бирга  
Музофтар келажак чалган оҳангни.

1951

## ЯНГИ ЙИЛ КЕЧАСИ

Улуг Ватаним бўйлаб тўлқинланган шодликни  
Мумкин бўлмаса ҳамки бир шеърда қамраб олмоқ,  
Ҳар совет кишисига сингиб кетган одатдир  
Шундай буюк кунларга ҳиссасин қўшиб қолмоқ.

Миллионларнинг сафида азиз қаламим билан  
Янги йилнинг тонгига қўяр эканман қадам,  
Истайманки, шеърларим совет солдати каби  
Бўлса экан жанговар ва пўлатдай мустаҳкам.

Соат роса ўн икки, Москвани тинглайман,  
Бахт ҳузуридан қалбим жўшар унга ҳамнафас.  
Уни куйламоқдаман — жонажон Москвани.  
Мана, илҳом қуюлди, келаётир басма-бас.

Қалбаги энг биринчи самимий сўзим шундай:  
Ташаккур рус халқига, у азамат, меҳрибон.  
Қанчалар бахтиёрман, шу халқ билан ўзбек ҳам  
Партия атрофига жипслашди дўст, қадрдон.

Қанчалар бахтиёрман, кишиликни бахт сари  
Етаклаган шу халқа севимли фарзанд бўлдим.  
Юрак куйларим билан унинг орзуларига  
Ҳамоҳанг ва ҳамжиҳат, яъни жигарбанд бўлдим.

Соат роса ўн икки, бепоён Ватанимнинг  
Ҳар уйи, ҳар жойида тантана авжга чиққан.  
Ўтган азиз онларнинг эсдан чиқмас хотирин  
Ва келажак завқини ҳар қалб ўзига йиққан.

Дўстликнинг шарафига кўтарилиган қадаҳда  
Халқларнинг тинчлик учун берган маҳкам аҳди бор.  
Ватанимнинг гуллаши, ҳаётнинг гуркираши,  
Хулласи, кишиликтининг саодати, баҳти бор.

Үлкамизда ҳар кунги коммунизмнинг тонги  
Файзиёб умр каби мазмунга тўлиқ бўлур.  
Эй, менинг улуғ халқим, қутлуғ бўлсин Янги йил  
Ва биламан, аминман, албатта қутлуғ бўлур.

1952

## ШЕЪРИМНИНГ ДАВОМИ БОР

(Бу шеър Фарғона область, Олтиприқ районидаги  
Ленинизм номли колхознинг Момоҳон Етмисшева  
бошлиқ звено қизларига багишлаб ёзилган эди.)

Қўрмаган бўлсак ҳам бир-бirimizni,  
Қалбу тилак билан яқинмиз бироқ.  
Ҳаётда, меҳнатда миллионлар билан  
Биргамиз, ёнма-ён яшаймиз ўртоқ.

Қанчалар қувондим, қандай севиндим,  
Ғайрат, ғалабангни эшиганимда.  
Гўё қараб турдинг қаршимда кулиб,  
Момоҳон, сенга деб шеър битганимда,

Кичик меҳнатингни каттакон Ватан  
Қадрлар, ҳурматлаб дейди: пахтакор!  
Чунки шу кичкина меҳнатингда ҳам  
Ватан истиқболи, халқнинг баҳти бор.

Ҳозир ғўзаларинг кўсак тугмоқда,  
Сен бўлса парвона доим қошида.  
Биламан, Момоҳон, қанча режалар,  
Мўл ҳосил ўйлари кезар бошингда.

Звено қизлари доим ёнингда,  
Ҳаммаси ўзингдек забардаст, қодир.  
Чўлни гулзор этган шу ғолиб қизлар  
Севги, ахлоқда ҳам ягона, нодир.

Ёзёвоннинг асрий қақроқ чўллари  
Эгмоқда, қизларжон, амрингизга бош.  
Чунки ҳар биттангиз чўлнинг бағрига  
Кириб бормоқдасиз бўлиб сув, қуёш.

Совет қизларининг лафзи, сўзи чин,  
Айтдими, бажармай қўймайди ҳеч вақт.  
Ишониб, қизларжон, шеърим давомин  
Мен ҳам ҳозирданоқ қилиб қўйдим тахт.

Лекин уни кузда, хирмон бошида,  
Табрик этмоқ учун боргандада сизни  
Ўқиб беражакман. Ва ишонаман:  
Уялтириб қўймаймиз бир-биrimizни.

1953

## ГАРМОНЧИ

Бўз йигит, мен сени тинглайман ҳар кун,  
Сирингга ошнаман, ўзинг билмайсан.  
Юлдузлар чараклаб, бошланганда тун,  
Гармонга жўр бўлиб секин жирлайсан,  
Хаёлингда кезар юзлари гулгун.

Анҳорнинг ёқаси, майсалар гилам,  
Кўнглингга сирдошдек шивирлайди сув.  
Бетоқат кутасан қўшиқ, куй билан,  
Интизор қилади чиқа қолмай у,  
Биламан, йил каби туюлар ҳар дам.

Сен яратган қизни мей яхши билам,  
Деразам рўбарў унинг уйига.  
Ишонгил, севади сени-да у ҳам,  
Ёлғиз сен яшайсан фикру ўйида,  
Йўлингга қарайди чиқиб дам-бадам.

Зангор кўзларингга бўлганмиш мафтун,  
Сўзларинг солганмиш қалбига оташ.  
Гоҳида ҳаяллаб қолганинг учун  
Кўнгли бўлар эмиш жуда-жуда ғаш,  
Айтган қўшиғидан англадим бугун.

Қаршингга чиқади қуёшдай кулиб,  
Ўзингни йўқотиб қўясан бир зум.

Кўзингда порлайди баҳт-иқбол бўлиб  
Унинг юзидаги меҳр-табассум,  
Кўраман: тўймайсан қараб, термилиб.

Баҳтиёр ёшликнинг бўлиб куй, мадҳи  
Шеъримга кирасиз шунда икковлон.  
Биламан, порлоқдир севгингиз баҳти,  
Саодат боғида урингиз жавлон,  
Фам кўрманг, дард кўрманг, қариманг асти.

*1953*

## КОММУНИСТЛАР ПАРТИЯСИГА

Шу буюк, мустаҳкам, пўлат сафларнинг  
Битта солдатиман, учқунман битта.  
Аммо аланганинг бир заррасиман,  
Шу аланга қутқарган менинг халқимни  
Мараз капиталнинг исканжасидан,  
Шу аланга тинчликнинг душманларини  
Куйдириб кул қилар ўт панжасида.  
Гарчи бир учқунман,  
                                 аммо шу олов,  
Шу ўтнинг жонида яшайман, борман.  
Эй, менинг азамат,  
                                 шонли партиям,  
Сенинг буйргуғингга доим тайёрман.

1958

## ГУЛХАН АТРОФИДА

Худди гулханингиздай шўх бўлсин, қувноқ бўлсин  
Сизга ёзган шеъримнинг ҳар бир сатри, ҳар банди.  
Қалбингиздай оташин, беғубор, қайноқ бўлсин,  
Чунки муҳаббатингиз доим кўнглим пайванди.

Токи гуллар атрини ҳарфларга беркитай,  
Ёшлигингиз кўркидай туркираб турсин унда.  
Сиз куйлаб, ўйнаб туринг, мен эса шеърим битай,  
Яъни бирга куйлайлик бу гўзал, сўлим тунда.

Ҳаммангиз ҳам аълочи, бири биридан сара,  
Бири биридан ўткир доно ўғил-қизларсиз.  
Хулқингиз шунча хушки, ўхшашлиги йўқ сира,  
Ватаннинг истиқболи — келажаги сизларсиз.

Бахтиёр ёшлигингиз барқ урган юзингизга  
Боқарканман, умримдан беҳад бўлдим миннатдор.  
Бийрон-бийрон сўзингиз, кўп равон нутқингизда  
Фикрингизнинг биллурдай тоза, тиниқлиги бор.

Кўкка чирмашмоқчидай мавжланур гулханингиз,  
Оlamга кўринмоқчи бўлади нури билан.  
Зотан мана шу гулхан эгалари — ўғил-қиз  
Дунёга таниқлидир бахти, шуури билан.

Ўйнанг, қувнанг, қувлашинг, роса дам олинг, токи  
Янги ўқув йилида дафтарлар бешга тўлсин.  
Кўриб ўз фарзандининг қобилият, идрокин,  
Ота-она, муаллим, бутун халқ хурсанд бўлсин!

Сизларга деб, шеъримга гуллар атрин беркитай,  
Ёшлигинги кўркидай гуркираб турсин унда.  
Сиз куйлаб, ўйнаб туринг, мен эса шеърим битай,  
Яъни бирга куйлайлик бу гўзал, сўлим тунда.

1954

\* \* \*

Сув қўйгандим гулимга,  
Завқ багишлаб дилимга,  
Япроқлар яшнаб кетди.

Барг юзида титрар нам,  
Гўё тонгдаги шабнам,  
Уйни баҳаво этди.

Ҳар гулни якка-якка  
Ўтқазгандим тувакка,  
Гуркираб ўсди осон.

Юмшатдим тупроғини,  
Ювдим ҳар япроғини,  
Эринмадим ҳеч қачон.

1954

## КУЗ

Кул ранг тоғлар этагидан аста юксалди қүёш,  
Пахтазорни чулғаб олди кокили лента каби.  
Водий бўйлаб меҳр билан бисот ёйган куз — наққош,  
Ҳар япроққа тегиб ўтган ёзниг оловли лаби.

Худди нурдек товланади олтинсимон олмалар,  
Шохлар ўзин кўтаролмас жийда маржонларидан.  
Умр бўйи шарбатининг мазаси лабда қолар,  
Бир шингилин еб кўрсангиз узум ишкомларидан.

Машиналар пахта терар, демак, бу ҳосил пайти  
Далада ҳам олимларнинг ҳиссаси, кўзи бордир.  
Руль ушлаган йигитнинг мунчалар хушнуд кайфи,  
Балки ёрин шу кузакда тўй қиласар сўзи бордир.

Қўшиқ куйлашиб ўтди турналар чугур-чуғур,  
Лекин тарозибоннинг қарамоққа йўқ вақти.  
Шу пайтда ҳазил билан битта қизи тушмагур  
Келиб унинг чаккасига оппоқ барака тақди.

Шараф, ғурур, саодатга тўлган ҳаётнинг тонгин  
Мана шундай бошлаб берди азиз пахтакор деҳқон.  
Дала бўйлаб қанот қоқди озод меҳнат оҳангি,  
Турна қатор йўлга тушди оқ олтин ортган карвон.

Термиламан, худди расмин чизмоқчиман рассомдай,  
Ҳар бир гулнинг, ҳар япроқнинг бўёғи ёдда қолар.  
Муқаммал бир ғазал учун басталанган мақомдай,  
Бутун борлиқ қалб-қалбимга сингиб кетгандай бўлар.

Ана шундай туғилади шеър айтмоққа иштиёқ,  
Ана шундай яралади қофия, қўшиқ, ғазал.  
Термиламан: олам гўзал, ҳаёт гўзал ва бироқ  
Ҳаммасидан шу ҳаётни яратган инсон гўзал.

1954

\* \* \*

Қўғирчогим, оппогим,  
Ухла, ухла, ором ол.  
Мен алла айтган чоғим  
Сен тезгина ухлаб қол.

Иифлоқ бўлсанг суймайман,  
Яхши бола бўл доим.  
Мен ҳам дарров ухлайман  
Алла айтганда ойим.

Ясатаман уйчангни  
Сен пича ухлаб турсанг.  
Тикаман кўйлакчангни  
Халақит бермай юрсанг.

Яхши бола ҳар қачон  
Гапга киради осон.  
Ухла, оппогим, ухла  
Мен алла айтган замон.

1954

## ТЕРИМЧИ ҚИЗГА

Шу чевар қўлларнинг иш, маҳоратин  
Истардим, шеъримда тасвир этолсам.  
Истардим, қалбдаги бор ҳароратим  
Қўшиққа жо қилсан, таъсир этолсам.

Офтобдан бўртибди юзинг ширмондай,  
Бўйнингга қордай оқ этак боғлабсан.  
Пахтани бағрингга босибсан жондай,  
Гўёки, азизим, баҳт қучоқлабсан.

Баҳт деган нечоғлик улуғ бўлса ҳам,  
Ўзи вафо билан меҳнатнинг қули. .  
Беҳуда ўтмасин бу ғанимат дам,  
Чевар, чаққонлигин қўймасин қўлинг.

Пахтазор ишқида турасан тонгда,  
Пахтазор ишқида отади тонг ҳам.  
Қуёш кўзин йиртиб чопар ортингдан,  
Муборак изингдан қадам-бақадам.

Сенинг йўлинг, синглим, қуёшдек порлоқ,  
Саодат, шарафга тўлиқ ёруғ йўл.  
Меҳнат ҳосилингни йигарсан бу кун,  
Исрофга йўл қўйма, ҳушёр, бардам бўл.

Садаф тишлиарини очган чаноқлар  
Хандон ташлаб кулган қизлардай сулув.  
Бармоқ тегишига маҳтал, чарақлар,  
Тезроқ тер, кутмасин, тўкилмасин у.

Тўкин дастурхонинг, шуҳрат, обрўйинг,  
Қўш-қўша кўйлагинг пахтанг туфайли.  
Биламан, орзунгни, сирингни, тўйинг —  
Колхозинг тўйига улансин, майли.

Баҳт деган нечоғлик улуғ бўлса ҳам,  
Ўзи вафо билан меҳнатнинг қули.  
Беҳуда ўтмасин бу ғанимат дам,  
Чевар, чаққонлигин қўймасин қўлинг.

1955

## БАҲОР БИЛАН СУҲБАТ

Ғуж-ғуж капалакми новдага қўнгган  
Десам, кўтарили қаҳқаҳа, кулги.  
«Эҳ, шоир, афтидан, кўзларинг тинган,  
Ғуж-ғуж ғунчалармиз, оқ гуллармиз-ку!»

Йўқ, нега танимай сени, гул баҳор,  
Фақат қилмоқчиман ҳуснингни таққос.  
Ишқу илҳом бериб кўнглимга ҳар бор,  
Юз турли ранг билан товланганинг рост.

Ҳар бўртган куртакдан қилдинг табассум,  
Ҳатто гиёҳларда ғуруринг кўрдим.  
Пойқадаминг теккан чиройли, маъсум —  
Боғларда ҳуснингга термилиб турдим.

Лекин эътирозим бор андаккина,  
Бир нафас куйлашдан тўхта, қулоқ сол.  
Сўзимни эшиту ва қилмай гина,  
Бир умр мен билан, шеърим билан қол.

Сенга атамайман шеъримни бу гал,  
Унда мақталмайди ғунчалар лаби.  
Унда куйланади сендан ҳам гўзал,  
Сендан-да қудратли инсоннинг қалби.

Одамсиз чўлларга келиб ҳар йили —  
Кетгансан ўзингдан қолдирмай нишон.  
Инсоннинг меҳнати, мөхри туфайли  
Сендаги чирой у ва сендаги шон.

Илк саҳро гуллари қурғоқ дастидан  
Қовжираб қолганда, қайтолмагансан.  
Атлас капалакча бўлиб устида  
Ишқингни уларга айтолмагансан.

Энди чўлларда ҳам гуркирар ҳаёт,  
Бемалол сеп ёйиб яшнайсан сен ҳам.  
Сув олиб, нур бўлиб борди одамзод,  
Ундан сўнг сен бординг қадам-бақадам.

Ҳали булар нима, атом нуридан  
Музларнинг устида қуёш ёқамиз.  
Ҳар биттамиз меҳнат, илм, шуурдан  
Оlamга бир баҳор бўлиб боқамиз.

Сўзларимни олиб учишган еллар  
Новдаларга қўниб жим қолди бир зум.  
Шивирлаб япроқлар, шивирлаб гуллар  
Иқрор бўлишгандай қилди табассум.

1955

\* \* \*

Ёлғиз икков бўлсак аҳилсан жуда,  
Юз бор эркалайсан юз хил ном билан.  
Тинмай атрофингда бўлиб парвона  
Бахту шодлигимдан довдирайман мен.

Аммо бирор бўлса, сипосан бирам,  
Гўё бермагандек бўлиб эътибор.  
Наҳотки билмайсан, бирорга кўз-кўз —  
Қилмоққа шу ишқдан афзал нима бор?!

1956

\* \* \*

Учрашув онини кутиб бетоқат,  
Қалбим талпинарди, сенга, азизим  
Минутлар судралиб, гүё ўтмай вақт.  
Ширин бир азобда ўртанар эдим.  
Аммо ҳузурингга борардим кечроқ,  
Ҳеч гап ўтмагандай гүё ўзимдан.  
Туардинг термилиб, тоқатинг ҳам тоқ,  
Интизор кўзингга боқардим зидан.  
Беш минутга шунча дикқат бўлибсан,  
Пешанангга тушмиш чизиқлар қақ-қат.  
Наҳотки шунчалик енгилтак бўлсанг,  
Ҳаётни висол деб ўйласанг фақат.  
Йўқ, жоним, сўқмоқлар жуда кўп унда,  
Хижрон бўлмасайди, висол йўқ эди.  
Ҳайрон қилиб қўйдинг, бутун умримни  
Қандай қилиб сенга топширай энди.

1956

## С О Ф И Н И Ш

Тўлиб-тошиб сайрайди булбул  
Сеҳрли тун тинчини бузиб.  
Уйқу таслим этолмай гаранг,  
Сендан хаёл, кўнглимни узиб.

Хаёл тинмай сенга судрайди,  
Ойнинг ипак нурига ўраб.  
Севги қурғур шундай зўр экан,  
Ултирумайди ақлингдан сўраб.

Осилади шамол бўйнига,  
Кутишга йўқ тоқати бир зум.  
У кетади, қуруқ ва бўм-бўш  
Сурат бўлиб қоламан ўзим.

Атрофингда бўлиб парвона,  
Яна қайтиб келар ўзимга.  
Мисраларга айланар ювош,  
Бўйин эгиб хоҳиш, сўзимга.

Хат ёзишга тушаман яна,  
Билолмайман бу нечанчиси.  
Түғён қилган асаблар зора,  
Шу хат билан бир оз тинчиса.

Нари суриб бор андишани,  
Юрагимни тўкиб-соламан.  
Хат кетади, ҳар гал йўлингга  
Умид билан қараб қоламан.

*1956*

## ЁШИМНИ СУРАМА...

Ёшимни сўрама, бемаъни бу оқ  
Оралай бераркан соchlарга ҳар вақт.  
Шу ўтган озгина умримга бироқ,  
Ҳеч вақт ачинмайман, шунинг ўзи баҳт.

Хиёнат, ғийбатни билмадим сира,  
Нодонлик йўлига қўймадим оёқ.  
Ишқим бўлсин, дедим, нурдек покиза,  
Балки шунинг учун сочимдаги оқ,

1957

\* \* \*

Қадрласанг инсонлигингни,  
Вафо қилсанг ўзингга ўзинг,  
Фақат-фақат шунда мен билан  
Тўғри келур тақдир — юлдузинг.

*1957*

## БАҲОРНИ ҚАРШИЛАБ

Мунча чиройликсан, фусункор баҳор,  
Мунчалар қалбларга сирдош, ҳамоҳанг,  
Бола чофимда ҳам этарди мафтун  
Сендаги гўзаллик, алвон турли ранг.

Бойчечак излардим боғларда тентиб,  
Сочимга санчардим қандай гулки, бор.  
Истардим, шу баҳор қолмаса кетиб,  
Истардим, гулларга қўймаса губор.

Фируза осмондан узолмай нигоҳ,  
Кўкатлар устида ётардим узоқ.  
Томлардан қизгалдоқ қидирадим гоҳ,  
Гоҳ қушлар йўлига қўярдим тузоқ.

Сочпопук ишқида тиниб-тинчимай  
Ғимирсиб юрардим толлар тагида.  
Бўларди ажойиб, латиф бир хуш бўй,  
Мен таққан ям-яшил тол баргагида.

Урик гулларини тўкиб, тўзгитиб  
Арғимчиқ учишни севардим жуда.  
Соатлаб турадим хаёлим кетиб,  
Гуллар сузиб ўтса сувлар мавжида.

Кўкатлар ичида қўгиричогимни  
Аллалаб, ўзим ҳам қолардим мизғиб.  
Гоҳ ялпиз тераркан анҳор лабида  
Қапалак ортидан кетардим изғиб.

Шунчалар севардим, гул баҳор сени,  
Ҳали ҳам севаман жонимдан ортиқ.  
Балки шунинг учун тақдирлаб мени,  
Шеърни, шеъриятни қилгансан тортиқ.

Оташ солмасайди қалбимга лола,  
Бағрига тортмаса кўм-кўк дала, қир.  
Дилни элитмаса эди шалола,  
Шу шеърни қаёқдан ёзардим ахир.

1957

## СЕН ҲАМ ШУНДАЙМИДИНГ...

Бир вақтлар ўлтириб ўйлардим гоҳи:  
Қизиқ, ким бўларкин умр йўлдошим,  
Кўнглим, ҳисларимни англармикан у,  
Койитиб тўқмасми кўзимдан ёшим?

Билмасдим, ким ўзи ва яшар қайдга,  
Лекин, ҳурматини сақлар эди дил.  
Ёнимда сезардим уни ҳар жойда,  
Ўйлардим кўзига боқсам, деб дадил.

Сен ҳам шундаймидинг, айт-чи, азизим,  
Севганимидинг мени кўрмасдан туриб?  
Сувлар ёқасида хаёл суриб жим,  
Излармидинг мени боғларда юриб?

Гулларга шивирлаб ишқинг, сирингни,  
Вафо-садоқатдан сурғанмисан ўй?  
Йўқса, мақтамагин менга кўнглингни,  
Йўқса, муҳаббатдан гапирмаёқ қўй.

1957

## СЕНИ ҮЙЛАГАНДА<sup>4</sup>

Ииллар ўзи билан ёшлик ва ишқни  
Судраб кетолмаскан йўқлик қаърига.  
Шу кунда негадир ўйлайман сени,  
Негадир кетмайсан кўздан нарига.

Кўзингни севардим, жуда севардим,  
Лекин уялардим, боқолмасдим тик.  
Олдингда бошимни эгиб туардим,  
Ортингдан термилиб қолар эдим тек.

Ёшлик ҳавасими, десам у чоғни,  
Чинакам ишқ экан, энди тушундим.  
Сени ўйладиму қалбимда илҳом  
Түғён қила кетди, қололмадим жим.

Сени ўйладиму нурга бурканди  
Юз турли ранг билан товланиб олам.  
Қорларни кўтариб бинафша унди,  
Сенинг хаёлингга қалб шўнгиган дам.

Сени ўйладиму роҳатбахш шамол  
Юздан ажинларни сидириб кетди.

Сочга оралаган оқни юлдими,  
Ҳарқалай, ёшликни қидириб кетди.

Ўйлайман, ўйлайман, не учун сени  
Унугиб бўлмайди, не хислатинг бор?!  
Сабаби, азизим, кўнглиинг ва ишқинг  
Жуда тоза экан, жуда беғубор.

1957

\* \* \*

Қуёш чиқди, гул япрогига  
Тунда қўнган шабнам эриди.  
Қон югурди ол ёноғига,  
Барги губор-чангдан ариди.  
Келганида ёринг — қуёшинг,  
Тарк этганда сени ҳижрон, ғам,  
Шабнам каби учди кўз ёшинг,  
Шу гул каби яшнадинг, эркам.

1958



Не истайсан, дейсан, истакларимнинг  
Чеки йўқ эшиитсанг, мен сўзлайберсам.  
Истайманки, аввал ишқ, илҳом бўлиб,  
Бир баҳор мисоли қалбингга кирсам.

Яшил япроқларга беркиниб бир зум,  
Ўйинг, ҳисларингни ўғирлаб олсам.  
Юзингда балқисам бўлиб табассум,  
Сен учун бир умр баҳт бўлиб қолсам.

Гуллар жилвасида боқиб мулойим,  
Қўнглингни чорласам, бермасам ором.  
Истагим — ошигим бўлсанг беқарор,  
Бутун борлигинги эта олсам ром.

Куй бўлиб элитсам баъзан бир нафас,  
Тинглашни сира тарк этгинг келмаса.  
Умримга қилиб сен ҳасад ҳам ҳавас,  
Ёнимдан бир зумга кетгинг келмаса.

Истайманки, кўнглинг кўнглимдек бўлса,  
Орзу-ўйларингни кўролсам аён.  
Истагим — қўшалоқ очилган гулдек  
Меҳнат, муҳаббатда турсак ёнма-ён.

1958

## КОМСОМОЛГА

Забардаст қадамингнинг зарбидан, товушидан  
Яқин коммунизмнинг гимнини эшитаман.  
Ҳайрату қувонч, ишқа тўлиб ҳар бир ишингдан,  
Меҳрингда қалбим ёниб, шеъримни пишитаман.

Оlamга кўз-кўз бўлган, одам кўз тиккан ёшлик,  
Ватану халқ ҳар қанча фахрланса арзийди.  
Ленинча садоқати, ленинча ақл-идрок,  
Зотан шундоқ бўлмоқлик ёшлигимиз қарзийди.

Партиямизнинг буюк, ҳаётбахш таълимоти,  
Енгилмас қудрат бўлиб сингиб кетган қонингга.  
Шунинг учун дўстга зўр ҳурмату оқибатинг,  
Шунинг учун ўлмаслик битган азиз жонингга.

Комсомол йўлланмаси қўлга тегди дегунча,  
Ҳар қандай мушкул ишнинг ечилади чигали.  
Фолиб, қутлуғ қадаминг ҳали бориб етгунча,  
Яна қанчалаб ишлар кутиб ётибди галин.

Бўлғуси шаҳарларнинг энг биринчи уйида,  
Қаттакон иш устида тўйлар ўтади баъзан.  
Шу ерни обод қилиш келин-куёв ўйида,  
Қадаҳлар жарангидга иқбол ётар муazzзам.

Курашларда тобланган жўшқин, қайноқ ёшликсан,  
Паҳтазорда мақтовинг, заводларда донғинг бор.  
Қаерда меҳнат, ақл тантана қилар экан,  
Ўша жойда тилларда достон бўлган номинг бор.

Навқирон шу ёшлигингни яшинаган гулми десам,  
Гуллар ўзи унади ҳар бир босган изингдан.  
Ўзингни ишқа тўлган покиза дилми десам,  
Покиза диллар чиқмас буйруғингдан, измингдан.

Забардаст қадамингнинг зарбидан, товушидан  
Яқин коммунизмнинг гимнини эшиштаман.  
Ҳайрату қувонч, ишқа тўлиб ҳар бир ишингдан,  
Меҳрингда қалбим ёниб, шеъримни пишитаман.

1958

\* \* \*

Анҳор лабида жуфт-жуфт соялар,  
Жилмайиб ўтаман кўз қирин ташлаб.  
Гоҳ хаёл қурмагур олиб кетади,  
Баҳона топгандай ёшликка бошлаб.

Йўқ-йўқ, мен турмадим ойдин тунларда,  
Сувлар ёқасида ишқ ўтида маст.  
Мен бундай дамларни йўлга термилиб,  
Интизор ўтказдим ҳар он, ҳар нафас.

Ёшлигим, умримни, ҳаловатимни  
Мардана топшириб вафо қўлига,  
Ойларни, йилларни минутлаб санаб,  
Туну кун қарадим ёрнинг йўлига.

Ҳали бегснайдик ажralишганда,  
Кўришдик жуда ҳам қадрдон, иноқ.  
Юлиб олса ҳамки ҳижрон ёр васлин,  
Қилиб кетган экан унга яқинроқ.

1959

## ШЕЪР ЁЗСАМ...

Шеър ёзсам, юрагим симобдай эриб,  
Юзимга балқииди ундан аланга.  
Ҳаётдай чиройли, умрдай ширин  
Ҳеч нарса йўқ каби бўлади менга.

Шеър ёзсам, дунёда ҳамма гўзаллик  
Ингилиб келгандай бўлар қошимга.  
Нурдек тиниқ ўйлар, оташин ўйлар  
Қўшиққа шайланиб кезар бошимда.

Шеър ёзсам, тошлар ҳам бағрини очиб  
Қўрсатган бўлади қалбда борини.  
Қишида ҳам шивирлаб кўм-кўк япроқлар  
Бирга чертишади кўнглим торини.

Шеър ёзсам, ёшлигим кетмайди нари,  
Ишқ мени олади иссиқ қўйнига.  
Мисралар муҳаббат, садоқат бўлиб  
Маҳкам чирмашади ёрнинг бўйнига.

Шеър ёзсам, ҳайқиргим келар оламга,  
Қалбим сатрларга сигмай энтикар.

Довдираб қоламан, гүё қаламим —  
Қўйган ҳар нуқтага минглар кўз тикар.

Бу кўзлар сизники, азиз ўқувчи,  
Мени шоир қилган муҳаббатингиз.  
Сиз учун куйлайман, сизни ўйлайман,  
Қалбимда яшаркан улуғ отингиз.

1959

## ҚИЗЛАРЖОН

Севги ўт ташласа юрагингизга,  
Ойдин тун бермаса тинчлик ва уйқу.  
Оlam куйлагандай кўринса сизга  
Ҳамда асир этса ажиб бир туйғу  
Тасалли излайсиз ҳисларингизга,  
Ғазаллар ёдлайсиз варақлаб китоб.  
Гулдек қалбингизни яшнатар шунда  
Севги сатрлари бўлиб офтоб.  
Шундай кезда, қизлар, пок ишқингизга  
Таржимон бўлолса биронта байтим,  
Сирдош бўлиб қолсам ҳамиша сизга,  
Шу менинг орзуйим, шодлигим, баҳтим.

1959

\* \* \*

Бизга ҳурмат билан боққанларида,  
Кўзлар ёнганида севги, ҳавасда,  
Ватаним, гууриинг қанот бўлди-ю,  
Бағрингдан чарх уриб чиқдим нафасда.

Болалар йўл берди, гўдак талпинди,  
Дедилар бизларни дўсту ҳамсоя.  
Не баҳтки, қаерда саодат кулса,  
Ватаним, ҳамиша ўзингсан доя.

Мадҳингда борлиғим шеърга айланди,  
Тупроғу тошингга сифиниб қайтдим.  
Яна меҳрим ортди, яна улғайдим,  
Васлингга ошиқиб, соғиниб қайтдим.

Севаман, Ватаним, севаман жондан,  
Боғингни, чўлингни, ҳар нигоҳингни.  
Иложи бўлса-ю, бағримга боссам  
Ҳатто қолдирмасдан бир гиёҳингни.

1959

\* \* \*

Сира чидолмайман, қувноқ чеҳрангда  
Қайғунинг шарпаси кезса бир нафас.  
Қўнглимга тикандек оғир ботади,  
Сенинг йўлларингда кўрсам хору хас.

Мен уни сочим-ла супуриб олгум,  
Пояндоз деб йўлга жонимни солгум.  
Хоҳ билгил, хоҳ билмагил,  
Садоқатда бир умр қолгум.

Хоҳ билгил, хоҳ билмагил,  
Ҳаммасига мен бўлай рози.  
Ахир нима қиласай, ахир не қиласай,  
Ишқ учун йўқ экан тошу тарози.

1960

## ҚИЗИМ НОДИРАГА

Үйқуга зор бўлиб мудраб тепангда,  
Ярим юмуқ кўзим кўзингдан узмай  
Шу азоб лаззатин шеърга соламан,  
Ҳатто пичирламай, тинчингни бузмай.

Битта ижирғансанг, нима қилсам, деб,  
Юпалиш кўйида минг тўлғанаман.  
Гоҳ ётиб, гоҳ туриб ҳар бир шарпанидан,  
Юз бор мизғийману юз уйғонаман.

Тун ярим, қушлар ҳам уйқуда ҳозир,  
Сувлар ҳам тингандай... жимжит ҳамма ёқ.  
Гўё шабада ҳам япроқда мудраб,  
Қалбим алласига солади қулоқ.

Фақат мен уйғоқман ҳорғин, баҳтиёр,  
Хушбўй нафасингга тўймайман ҳидлаб.  
Охир чидомайман, уйқунгни бузиб,  
Юзингга оҳиста тегизаман лаб.

Ана, сўнгги юлдуз хиралашди-ю,  
Кўкда эриб кетди, тонг отди оппоқ.  
Ойнага қарайман ҳолимдан кулиб,  
Кўйлакларим гижим, соchlарим паҳмоқ.

Аммо ўзим тетик, яхши посбондай  
Мамнунман, қалбимда виқор тошади.  
Шу элнинг кичкина гражданини  
Сафга қўшмоқ учун кўнглим шошади.

Онаман, истайман, етук бўйини,  
Ақлу идрокининг камолин кўрсам.  
Кўнглида, кўзида, иши, сўзида  
Инсон, деган номнинг жамолин кўрсам.

Қизим жилмаяди уйқу аралаш,  
Гўёки ҳисларим беради ҳузур.  
Оппоғим, уйқусиз ўтган шу оқшом  
Ёзилган шеър учун сенга ташаккур.

1960

## ЯНА ҚИЗИМГА

Болангиз жуда ҳам тантиқ, деб баъзан,  
Таниш-билишларга қиласадим таъна.  
Бу бахт машаққати олдида энди  
Үзим бошим қотиб турибман, мана.

Ҳали тили чиқмай, буйруқларини  
Шунча ўтказади бу эрка қизим.  
Билмай ҳам қоламиз баъзан қўлига  
Ўтиб қолганини оила измин.

Мана, кўтар дейди, кўзида ёш йўқ,  
Йиглаб талпинади кўзимга боқиб.  
Кўксимга босаман қўйиб ишимни,  
Ёлғон йигига ҳам бағрим тутақиб.

Ёлғондан бўлса ҳам йўқ, йўқ, йиглама,  
Бир томчи ёш кўрмай кўзингда, қизим.  
Умрингга юз баҳор замондош бўлсин,  
Кела қол, кўтарай бахтим, азизим.

Белинг оғримасми, дейди кўрганлар,  
Белимга қувват-ку, дейман қувониб.  
Юзимга урганда юмшоқ нафаси,  
Бахтдан энтикаман кўзларим ёниб.

Майли, эрка бўлу тантиқ бўлмагин,  
Яхши — эрка бўлур доим элига.  
Ёмон — эрка бўлмас, энса қотирав,  
Яхши — ёғдек ёқар одам дилига.

Биласанми, қизим, бу коинотда  
Онанинг орзуси қучмаган баҳт йўқ.  
Онанинг хаёли етмаган бўшлиқ,  
Онанинг хаёли тўхтаган вақт йўқ.

Ана шу тинмаган орзу-ўйларим,  
Меҳнат, муҳаббатим, меҳрим ҳақига —  
Бир ғубор қўнмасин, десанг, оппоғим,  
Эрка бўл ҳамиша юртинг, халқингга.

1961

## А Л Л А

Қундузим десам ҳам оз,  
Юлдузим десам ҳам оз,  
Дунёда нима гўзал —  
Бўлса, ундан ўзинг соз,  
Ором ол, қўзим, алла.

Асалмисан, қандмисан,  
Ғазал, муҳаббатмисан?  
Мунча ширинсан ўзинг,  
Жонимга пайвандмисан,  
Ухла, юлдузим, алла.

Ойни олиб берайми,  
Гуллар териб келайми,  
Атрофингда ўргилиб  
Шамол бўлиб елайми,  
Ухла, гул юзим, алла.

Ойнинг шуъласи сувда,  
Ҳамма нарса уйқуда.  
Меҳрим товланиб кетиб,  
Куйлагим келар жуда,  
Ухла, қундузим, алла.

1961

## ТОШКЕНТ ГУЛЛАРИ

Эҳ, Тошкент гуллари, кўп нафис гуллар.  
Бир ғубор топмайсиз япроқларида.  
Қизлар кулгисидек чиройли, маъсум,  
Қизлар қулгиси бор ёноқларида.

Анвойи ранглари энтиқтиради,  
Диллар яшаради, кўзлар яшнайди.  
Эҳ, гуллар, ҳамиша сизга ташнаман,  
Юрагим ҳамиша сизга ташнайди.

Узиб тутмагунча азиз дўстларга  
Таъриф қилолмайман жамолингизни.  
Ҳидлаб, юзин суртмай япроғингизга,  
Ҳеч ким ҳис қилолмас камолингизни.

Хиёбон кезаркан кўнглим, хаёлим,  
Ювилган топ-тоза баргларда қолди.  
Узим қўшиқ бўлиб қайтдим уйимга,  
Хотирим яшнаган паркларда қолди.

Бир хаёл сингари сархуш, баҳтиёр,  
Қаламга тутиндим келиб сҳиста.  
Эҳ, Тошкент гуллари, кўп латиф гуллар,  
Меҳрим, муҳаббатим ҳамиша сизда.

1961

98

## БАҲОР ШЕЪРИ

Баҳорми боғларга сеп ёйиб кетган,  
Чўлларга чашма-ю, бинафша элтган,  
Парвози кўкларда Ойгача етган.  
Баҳорми, баҳорми?— шивирлар еллар,  
Баҳорми, баҳорми?— сўрайди эллар,  
Йўқ, дейман, бу озод инсон меҳнати!

Бу нима, япроқлар шивирлашими,  
Кирда бошоқларнинг шитирлашими,  
Илк севги лаззати, жавдирашими?  
Бу нима, бу нима?— шивирлар еллар,  
Бу нима, бу нима?— сўрайди эллар,  
Йўқ, дейман, бу тинчлик, бахт ҳаловати.

Кўкда учиб юрган юлдузлари ҳам,  
Чироқларга тўлган бу нурли оқшом,  
Чароғон кундуздан айтинг неси кам?—  
Дея шивирлайди япроқлар, еллар,  
Йўқ, дейман, ўртоқлар, қардошлар, эллар.  
Бу инсон ақлининг кўрк, заковати.

Кўзимга кулгандай ер, осмон, тоғлар,  
Мевасин кўзкўзлаб кулади боғлар.  
Кулади қардошлар, дўстлар, ўртоқлар,

Қулади қадрдон элатлар, эллар,  
Бор бўлсин, тинимсиз, ўйноқли еллар,  
Бор бўлсин, меҳнатинг баҳт-саодати.

Ҳавога тўлибди ажиб бир хуш бўй,  
Ё палов дамланур — бирон жойда тўй.  
Қайдан, деб, бу қўшиқ, бу кулги, бу куй,  
Шивирлар япроқлар, шивирлар еллар,  
Эшитинг, қардошлар, ўртоқлар, эллар,  
Бу — озод қизларнинг қувноқ қўшиғи.

Қалбимни аллалар ажойиб бир ҳис,  
Урик гулларидек нозик ва нағис.  
Ҳаётдек мўътабар, умрдек азиҳ,  
Шунинг-чун куйлаған туюлар еллар,  
Эшитинг, қадрдон дўстлар ва эллар,  
Шунинг-чун мен яшаш, ҳаёт ошиғи.

1961

## СТУДЕНТЛАР ВАЛЬСИ

Юлдузларга тұла осмон,  
Шамол ўйнар япроқларда.  
Оlam күйга тұлғансимон  
Күй жараптар йироқларда.

Сўлим-сўлим хиёбонлар,  
Гул атрига тұлиқ ҳаво.  
Юринг, дўстлар, қадрдонлар,  
Кезишайлик гулшан аро.

Софинтираар бу оқшомлар,  
Бу суҳбатлар қилас хумор.  
Юринг, дўстлар, қадрдонлар,  
Сайр қилайлик энг сўнгти бор.

Яхши қолгин, төтли дамлар,  
Яхши қолгин, аэиз шаҳар.  
Яхши қолинг, дарсхоналар,  
Яхши қолинг, устоз-падар.

Сўлим-сўлим хиёбонлар,  
Гул атрига тұлиқ ҳаво —  
Юринг, дўстлар, қадрдонлар,  
Сайр қилайлик гуллар аро.

1961

101

\* \* \*

Арғувон туллабди, олтин сирғалар  
Бўйидан ҳавода ажиг бир ҳид бор.  
Тинмай ғўнғиллайди асаларилар...  
Боқаман табиат сеҳрига ҳайрон,  
Наҳотки арида шунчалик дид бор.  
Олисдан келгандир, балки ишқида,  
Гулдан гулни танлаб, қидириб, учиб,  
Нозик фаросат бор гўё ишида,  
Яшайди гулларнинг шарбатин ичиб.  
Эсим танибманки, яшаш, умрнинг  
Завқини шарбатдек масъуд ичаман.  
Бу ҳаёт чиройли хулқу одатга,  
Гулга, фазилатга тўлган бир чаман.  
Ёдимга келади арғувон, ари,  
Ёдимга келади тотли асали.  
Қизиқ бир аҳволга тушиб қоламан,  
Рангсиз кўринади ёзган ғазалим.

1962

102

## ДУТОР

Мунча мунгли бу қуй, мунча ҳазин бу куй,  
Ошиқ ноласими? Ҳижрон дардими?  
Қундузdeck соchlарга бемаҳал қўнгган  
Кумуш толаларнинг ҳусни, гардими?

Мунча нафис бу куй, мунча майин бу куй,  
Муҳаббат элитган кўнгил розими?  
Умидга, ишончга, орзуга тўлган  
Келин чиройими, қизлар нозими?

Мунча қувноқ бу куй, мунча ўйноқ бу куй,  
Ёрнинг вафосими, висол баҳтими?  
Меҳнат, муҳаббатда тобланган дилнинг  
Садоқат яшнатган кўрки, аҳдими?

Қалбни аллалайди, тиним бермайди,  
Ғалати бир ҳиски, тополмайсан ном.  
Гоҳ ўйга толдирап, гоҳ ўйнаттирап,  
Балки шу шоирлар атаган илҳом.

1962

\* \* \*

Қор ёғар бўралаб, осмон кўринмас,  
Қор шошар гўёки ерга ташна, оч.  
Охир юлиб олди сўнгти баргни у,  
Олма дарахтини қилди яланғоч.  
Аммо томирига жон бўлиб сингди,  
Қон бўлиб сингиди тани, шохига.  
Худди шунга ўхшар, заҳмати қолиб,  
Шодлик унутилиб кетса гоҳида.

1962

- - - - -

104

## ТОМЧИЛАР

Бола эдим, тутиб ёмғирга бошим,  
Сочим ўссин дея тилардим ҳар вақт.  
Хоҳи шиваласин, хоҳ шаррос қўйсин,  
Доним бағишларди менга шодлик, баҳт.  
Баҳор кезидаги момақалдироқ,  
Ернинг қаъригача ёритган чақмоқ,  
Денгизни шимириб қочган булатлар  
Қаҳрини, заҳрини сочтан булатлар  
Табиатнинг фақат бир гўзаллигин,  
Ҳаётнинг борлигин ва азаллигин  
Гўдак хаёлимга чизиб ўтарди,  
Эртаклар мисоли сизиб ўтарди.  
Дараҳтлар шохини эгганида қор  
Қўзим яшнар эди тиниқлигидан.  
Онамга билдирамай еғанман кўп бор,  
Қасал ҳам бўлмаодим, балки поклиги,  
Балки унга меҳрим илиқлигидан.  
Ўйлардим: юлдузлар юборганимикан?  
Ўйлардим: юлдузлар шунча бормикан?..  
Бугун юрагимда зил юқ, ўй билан  
Унга термиламан маъюс, ғазабкор.  
Эй, биллур томчилар, сизлар қай ёқдан,  
Қай ёқлардан келдинг, айтгин, азиз қоф?  
Чиндан шаффоғмисиз, чиндан оқмисиз,  
Атом заҳрасидан йироқ, покмисиз?  
Океан устидан сузган булатлар

Олиб келмадими ўз қанотида?  
Шамол ҳайдаб келган бўлмасин тарии  
Уша томонлардан учқур отида?

Жавобсиз бўзлашди узоқ энтикиб,  
Сўнг аламдан ерга кўзларин тикиб  
Дараҳтдан шувиллаб тўқилди бирдан,  
Болалардан қочиб шўнгиди ерга.  
Йўқ, шошманг, қайга сиз? Йўқ, шошманг, тўхтамг!  
Боламдан сизни ким айирмоқчи, ким?  
Унинг шўхлигига ҳамроҳ бўлингиз,  
Юзи, соchlарида порланг, қўнингиз,  
Йўқ, сизни булғолмас, булғолмас ҳеч ким!  
Бўғун шунинг учун ташвишда олам,  
Нотинчdir боғ-роғлар, эллар нотинчdir.  
Нотинчdir сайёҳлар, гиёҳлар тамом,  
Япроқлар ошиғи — еллар нотинчdir.  
Гулларнинг лабида шубҳадан ўқинч,  
Айниқса, оналар уйқуси нотинч.  
Сизнинг қатрангизга доғ туширса ким,  
Бутун табиатнинг қаҳрига маҳкум.  
Халқларнинг ғазаби қўймайди омон,  
Халқнинг ғазабидан нима бор ёмон?  
Йўқ, шошманг, томчилар, оппоқ томчилар,  
Боламдан сизни ким айирмоқчи, ким?  
Унинг шўхлигига ҳамроҳ бўлингиз,  
Юзи, соchlарида порланг, қўнингиз,  
Кўзгудек мусаффо, ўйноқ томчилар.

1962

\* \* \*

Лолалардан гулханлар ёқиб  
Баҳор келди, сулув ой келди.  
Чаккасига қизил гул тақиб  
Дилбар келди, гўзал май келди.

Новдаларда гуллардан маржон,  
Тиниқ кўкда қушлар парвози.  
Юринг, қизлар, юринг, қизларжон,  
Яйрашайлик кўнгилни ёзиб.

Майсаларда ёнбошлишайлик,  
Шудринг ювсин юзларимизни.  
Еллар ўтсин тоғлардан ошиб,  
Кифтда олиб созларимизни.

Бинафшалар нозидан ёниб  
Чорлар бугун бизни табиат.  
Сабзалардан баҳмал ёпингтан  
Сув бўйида қурайлик суҳбат.

Лолалардан гулханлар ёқиб  
Баҳор келди, сулув ой келди.  
Чаккасига қизил гул тақиб  
Дилбар келди, гўзал май келди.

\* \* \*

Баъзан хаёлимга чирманиб олиб,  
Фикрим, ҳисларимни қиласан таъқиб.  
Хижолат тортаман ўзимдан гоҳи,  
Гоҳида қувлайман кўздан нигоҳинг.  
Йўқ, тинчлик бермайсан, қиласан таъқиб,  
Енаман қаршингда куйиб, тутақиб.  
Бахтингни эшитсам, баҳтиёрдекман,  
Фамингни эшитсам, гуноҳкордекман,  
Гоҳ ўзим хўрлаган мөҳринг, ишқингга  
Узим ташнадекман, ўзим зордекман.  
Балки бу ёшликнинг юза ҳислари  
Утгани-ю, ақл қуюлганидан.  
Балки улғайганим сайин ёшлигим  
Азиэроқ, ширироқ туюлганидан.  
Балки курашларда қоядек қалбим  
Бир совуқ нигоҳдан эгилганидан.  
Балки севишини-ю ва севилишни  
Юксак одамийлик деб билганимдан.  
Билмайман, ишқилиб, қўймайсан ҳоли,  
Билмайман, не учун ҳаёт ва толе  
Шунчалар мураккаб, баъзида чалкаш,  
Кечиравми дёя доим кўнглим фаш.

1962

Ҳар ким яхши деб атаса мени,  
Ҳеч рози бўлмасдим ўзим ўзимдан.  
Агар барча яхши, барча соз бўлса,  
Мўлжалдагидан ҳам балки яқинроқ  
Бўларди орамиз коммунизмдан.  
Мабодо ёмон ҳам яхши деб айтса,  
Бир лоқайд бўлардим ёки устомон.  
Истайманки, яхши яхши деб айтсии,  
Ёмон ёмон кўрсин ва десин ёмон.

1962

\* \* \*

Тонғги жамолидан турфа гулларнинг  
Завқланиб, баҳтиёр кезасан ҳовлинг.  
Бепарво боқасан япроқларидан  
Аста кўтарилса шабнамнинг ҳоври.  
Билмайсан, бу менман, гуллар барғига  
Сени бир кўрмоққа қўндим дур бўлиб.  
Сезмай қиздирғанда бераҳм офтоб,  
Баҳтли кўзларингга беролмайин тоб,  
Изимга қайтаман бир ҳовур бўлиб.

**1962**

**110**

Чирт этиб узилди олтинсимон барг,  
Куз, дедим, рангига термилиб маъюс.  
Йўқ, деди, йўқ, шоир, ундеймас афсус,  
Яшаш умидини этолмасман тарк.  
Қуёшга шунчалик ошиқ-шайдоман,  
Не илож ўтида сарғаймай, ёнмай.  
Бугун хазон бўлсам меҳрига қонмай,  
Эрта ўзи билан бўлгум лайдо ман.

1962

## МАНА ШУНДАЙ БОШЛАНДИ БУ ШЕЪР

Худди деразамнинг ёнида чумчуқ  
Ярим соат бўлди, тинмай чирқиллар.  
Шеърга тутқич бермай асов фикрлар  
Мени тортқилайди, миямда зил юк.  
Чумчуқ чирқиллади, мен ёзолмайман,  
Охир асабимни бузди, қўзгади.  
Ҳайдадим,

пир этиб шохга қўнди-ю,  
Баттар чирқиллади, баттар бўзлади.  
Ҳайдадим,  
кетмади.

Безовталаниб,  
Баттар чирқиллади, баттар бўзлади.  
Шунда билдим пастда беғам юрарди,  
Сап-сариқ тумшуқли нимжон боласи.  
Онаси патирлаб ташвишини ер,  
Гоҳ ерга тушади,  
гоҳ шохни эгар,  
Гоҳ менга қарайди нотинч жавдираб.  
Уйга қайтдим улар меҳрини аяб,  
Мана шундай бошланди бу шеър.

1962

## ҚОҒОЗ ГУЛ

Ташқариди тинмай бўралайди қор,  
Уй ичи баҳордай,  
    \*  хатто гулданда  
Қоғоздан ясалган гулдаста ҳам бор.  
Гуллари ранг-баранг, нафис, чиройли,  
Бироқ ҳидламайди ҳеч қачон ҳеч ким.  
Баҳорда яшнамас, кузда сўлимас,  
Сув ҳам сўрамайди ҳаво бўлса дим.  
На шабада ўпар япроқларидан,  
На ари бол йигар ёноқларидан,  
На капалак қўнар,  
    на фунча унар.  
Ёмғир ювиб ўтмас чанг-ғуборини,  
Умрида билмайди булбул зорини.  
Субҳидам баргига титрамас шабнам,  
Шохидан узмайди бирон гулпаст,  
Енидан минг марта ўтганида ҳам...  
Ташқариди тинмай бўралайди қор,  
Сўнгги хазонларни узиб, учирив,  
Нинасини қўлтиқлаб совуқ юриби.  
Ойнадан қарайман,  
    қор уюмидан,  
Эгилмай чилланинг ел-қуюнидан,  
Қуёшни қидириб, баҳорни кутиб,  
Она-Ер иссигин кифтида тутиб,  
Мимжон тул новдаси чиқиб турабди.

Уйлайман,  
мана бу чинакам умр.  
Фақат ўзини деб, ўзин авайлаб,  
Бирор ҳавас қилмаган занд бахтидан  
Бир ўзи қувониб ва қилиб ҳузур  
Бир кичик хонанинг бўлгунча нақши,  
Ҳаётнинг қишини,  
ёзини кўриб,  
Қайноқ томирида ёниб, жўш уриб,  
Бир баҳор яшаган,  
яшнаган яхши.

1962

\* \* \*

Чўри ҳам эмасман, қул ҳам эмасман,  
Меҳнат, ақлим билан сафда тетикман.  
Партия уқтирган ҳақ-ҳуқуқимнинг  
Бахти ҳимояси йўлида ҳатто  
Кирмоққа тайёрман жангларга тикка.

*1962*

8\*

**118**

\* \* \*

Қанча қалин ёғса ҳамки қор,  
Заминида ётади баҳор.  
Аммо совуқ бир сўз умрбод  
Юрагингга бўлиб гўё бод,  
Бир ёмонни эсга солади,  
Аримайди, шундоқ қолади.

1962

116

\* \* \*

Бола эдим, онам ғарч туфли кийса,  
Энсам қотган эди, эсимда ҳали.  
Фашим келар эди сочин бўяшса,  
Уша гўр маҳалим, гўдак маҳалим

Бугун оқ толани пайпаслаб ушлаб,  
Қўздан яширолмай ҳайронман ўзим.  
Ойната боқдимми, ўчакишгандай  
Дарров шу толага тушади кўзим.

Қичқиргим келади: «Йўқ, йўқ, шошма», деб,  
Ешлийкниң барига қелар осилгим.  
Бўйнимга маржону қошимга ўсма,  
Келади сочимга гулларни осгим.

Юрагим шувиллаб кетади бирдан,  
Наҳот, баҳор ўтиб, кузак бошланди...  
Шу пайт қизим чиқиб нариги уйдан  
Эркаланиб келиб менга ташланди.  
Қоп-қора ипакдек сочин силадим,  
Тарант юзларидан ўпдим, ҳидладим,  
Бахту севинчимдан кўзим ёшланди.

1962

## ЁМФИР ШОВИЛЛАЙДИ

Ёмфир шовиллайди, тинч, иссиқ уйим  
Софинга тўлган, васлингга ташна.  
Ёмфир шовиллайди, чувалаб ўйим...  
Ха, ёмфир, дарёмас ё эмас чашма,  
Ёмфир шовиллар.

Чашмалар бўйини хаёл қиласдим,  
Сени кўрмоқ бўлсам, ҳатто бир нафас.  
Гуллар ҳид сочмаса малол келарди,  
Ғунчалар бағрини куйдирган ҳавас  
Биз деб билардим.

Тоғларта тирмәшиб, нурга чирманиб,  
Булатлар қўйнида юрардик сузиб.  
Елларга туташиб, энтикиб, шошиб,  
Так, деб юлдузларни берардинг узиб...  
Эҳ, орзу, орзулар.

Хаёллардан қанот боғлаб ўзига,  
У йиллар чақмоқдек бир ёниб сўнди.  
Муштоқу зор қилиб энди изига,  
Қиров бўлиб сочга билдирамай қўнди,  
Зорман изига.

Ёмфир шовиллайди, сени кутаман,  
Бир чойнак иссиқ чой, дилкаш бир суҳбат —

Эвазига ҳозир жонни тутаман,  
Энди шу қалбдаги соғинч, муҳаббат,  
Дилкаш бир суҳбат.

Эгнинг, сочингдаги ёмғир сувларин,  
Биллур деб атамай артаман қоқиб.  
Иситманг бор бўлса дилим қийналар,  
Таблетка тутаман рангингга боқиб,  
Куйиб, тутақиб.

Сенсиз ҳамма нарса бўм-бўш, ҳувиллар,  
Ёмғир шовиллайди, ёмғир шовиллар...

1963

## Қ У Ш

Бир хайрли иш иштиёқида  
Ачиниш, меҳр-ла қафасни очдим.  
Кечдим кўнглим ёзган қўшиқларидан,  
Шундан оладиган баҳрадан кечдим.  
Увишган қанотлар парвозга маҳтал,  
Балки тушида ҳам кўрар осмонни.  
(Кишанмас, ҳатто ип келади малол,  
Бир марта озодлик кўрган инсонга)  
Учишга яралган ожиз жонивор,  
Қани ёз чиройли қанотингни бир.  
У бўлса беларво менга жавдирав,  
Гўё шу қафасга михлабди тақдир.  
Узи бош чиқариб, ўзи чўчийди,  
Шўрлик ишонмасми ё шунча қўрқоқ?  
Сўнг пириллаб озгина жойгача учди,  
Лекин кетолмади қафасдан узоқ.  
Узоқ кетолмади, чунки шу қафас,  
Уни йўргаклаган, туғилган шунда.  
Осмон ҳавосидан олмаган нафас,  
Тотсайди, симларни парчалармиди....

1963

Тинматур юлдузлар чарчамади ҳеч,  
Асрлардан бери инсонни чорлаб.  
Кўз қисди, имлади ҳар оқшом, ҳар кеч,  
Дилта ғулу солди сирли пичирлаб.  
Ақл қанотига чирмаб нурини  
Сеҳргар қўйнига тортди ҳамиша.  
Бугун висол дами яқинлигидан  
Юзларин ёнмоқда, кўзлари яшнаб.  
Бардошда юлдуздан ортиқ кучим бор,  
Қўймайман ёнимга келмагунингча.  
Шамолдек беором елмагунингча,  
Юлдузлар сингари кутаман бедор.

1963

## ЗИНАЛАР

Кимнидир елкасин тутган йўлимда,  
Кимларнинг меҳнати очган кўзимни.  
Кимларнинг қалбига, ишига боқиб,  
Ойнадан равшанроқ кўрдим ўзимни.  
Улар беҳисобдир, гарчи тарихда  
На бир юлдуз бўлган, на бирон қоя.  
Улар кишиликтининг йўлига мағрур —  
Мардлик-ла ястангандир бир пиллапоя.  
Тошдан ўт чиқарган кимдир қачонлар,  
Кимдир таёқда ё қўлда ер чизган.  
Кимдир сукут билан боқиб дарёга,  
Биринчи мартаба ёғоч оқизган.  
Ким нина ясаган, кимдир ғилдирак,  
Кимдир биринчи бор қурган мўрини.  
Энг аввал буғдойни татиб кўрган ким?  
Кимдир ўйлаб топган сочининг ўримин.  
Қушлар парвозига солиб зеҳнини,  
Биринчи мартаба хаёл сурган ким?  
Зиналар, зиналар, буюк зиналар,  
Сизеиз улғаймади тарихда ҳеч ким.  
Битта поғонангиз бўлсан кошкийди,  
Кимдир босиб ўтиб олдинга юрса,  
Ҳеч қандай умрга келмасди раşким.  
Унутилган битта поғона бўлиб,  
Шарафли, муборак шу йўлда турсам.

1963

122

\* \* \*

Дунёда нимаки мавжудот бўлса,  
Барига руҳ берган, бағишлаган жон,  
Тошларга ҳам ҳусн, умр бахш этган  
Ижодкор, меҳнаткаш, жафокаш инсон!  
Аммо ўзи бир нарсага ҳамиша муҳтоҷ,  
Ёмғирга тўймаган чанқоқ ерсимон.  
Меҳр-муҳаббатга ташна, доим оч,  
Меҳр-муҳаббатга тўймайди инсон.

1963

123

Доим тонгга йўлдош бўлгани учун  
Қуёш чеҳрасидан аримас ханда.  
Шундан равшан эмиш кўнгли ҳамиша,  
Шундан ёшлик уни қилмасмиш канда.  
Тун бўлса иғвогар кўтарармиш бош,  
Кундуз у заифу тунда тоғ эмиш.  
Шундан ой юзида маъюслик ва ғам,  
Мармар сийнасида шундан доғ эмиш.

1963

## Н И Л У Ф А Р

Зилол сув бағрида ажиб гулдаста,  
Ёки сув париси кўриндимикан?  
Юзида биллурий томчидан парда,  
Балки табиатнинг ўзи рашк қилиб  
Назардан сақлашга уриндимикан?  
Ҳа, шундай. Табиат ўзи ҳам шайдо,  
Беқарор ел эмиш тоғу тошларда.  
Туну кун термилиб тўймабди ҳатто,  
Тўймабди иболи қарашларига,  
Охир ғарқ қилибди кўз ёшлирига.

1968

126

\* \* \*

Новдалар чайқалар сал турса шамол,  
Е қамчи бўлади бирор қўлида.  
Чинорни эголмас довул, бўрон ҳам,  
Чинор бўлгим келар ҳаёт йўлида.  
Новдадек синганни оқларман, аммо  
Қамчи бўлганни-чи? Ҳеч вақт, мутлақо!

1963

## УРУФ

Беўй улоқтирди уни аллаким,  
Билмади, орзуси фақат шу эди.  
Она-Ер кўксига лабини босиб,  
Энди мен яшайман, ўлмайман, деди.

1963

127

\* \* \*

Мен яхши биламан, пок бўла туриб,  
Таъқибкор кўзларга боқиш заҳматин.  
Ҳа, яхши биламан, ундаи қезларда  
Қўрқоқ, пучакларнинг қилган хизматин.  
Ният, ҳисларимни минг бор титкилаб,  
Бирон доғ тополмай бўлардим ҳайрон.  
Аммо уни мендан кўп топардилар,  
Топардилар ҳар кун, ҳар соат, ҳар он.  
Одамларнинг меҳри қўймади ёлғиз,  
Ишонч овутарди ҳам ухлатарди.  
Хаёл юлиб слиб даҳшатдан мени,  
Худди шу кунларга олдан элтарди.  
Эй, менинг жафокаш, дўст хаёлларим!  
Эй, эзгу ниятдан силқиган ўйлар,  
Раҳмат сизга минг бор!

Алдамадингиз,  
Бугун дилим ёруғ, ҳам юзим ёруғ,  
Ёруғдир шаҳарлар, кўчалар, ўйлар.

1963

## БАҲОР

Ҳуснингнинг менчалик шайдоси йўқдир,  
Менчалик тўймаган гадоси йўқдир.  
Кўкда ўйин қилган шўх қалдирғоч ҳам,  
Яшиллик юргурган ҳам ўт, оғоч ҳам,  
Бўтана сувларнинг юзидағи гул,  
Қирдаги лола-ю, тоғдаги сунбул  
Қалбимга солади рашксимон туйғу,  
Қалбимга солади рашксимон ғулу.  
Ойдинда мудраган беҳи гулининг  
Биллур косасига сифолсам дейман.  
Қолдуздан дур тақиб, яна қолганин  
Қўйним, этагимга йиголсам дейман.  
Ғунчалар лабига беозор тегиб,  
Толлар баргагини тортқилаб, эгиб  
Ўйнаган елларга рашким келади,  
Еллардек тоғлардан ошгим келади...  
Ҳисларимни бўлди шу дам ажиб ҳол:  
Бир бутоқ тепамда силкиниб хушҳол,  
Секин шивирлади:— Сен, эй одамзод!  
Бизлар сенинг учун бўлганмиз бунёд,  
Асли сенга менинг рашким келади.

1963

## ИЛҲОМ

Уйқумни тортқилар, ўрнимда минг чўғ,  
Бутун вужудимни кабоб қиласди.  
Мисралар минг тўлғоқ, минг бир дард билан  
Аста туғилади, боғлайди уруғ...  
Оҳ, бу меҳнатни фақат шоир билади.

1963

\* \* \*

Баъзан ҳориб-толиб юмуш-ташвишдан  
Ором истаб кўнглим тингиси келар.  
Қушлар қанотига енгил илашиб  
Жимжит соҳилларга қўнгиси келар.  
На қўшиқ ёқади, на кулги, суҳбат,  
Пашша ҳам учмаса, олсам дейман тин.  
Қотиб ўтираман, босади ғафлат,  
Қўлларим ортиқча туюлар секин.  
Үйим ҳам кўзимга шумшук, маъносиз,  
Даҳшатдан ўрнимдан тураман сапчиб.  
О, меҳнат, ҳаёту шодлик дояси,  
Бадбаҳт этма ҳаргиз сен мендан қочиб.  
Майли, чангалингда пийпаласанг ҳам,  
Товоним қабартса тошларинг тилиб  
Ҳислар гирдобида чирпирак қилиб,  
Шеър ишқида дилим қиймаласанг ҳам  
Майлига.

1963

\* \* \*

Қирда лолаларнинг бағрига шўнғиб,  
Баҳор ҳидларини шимиргансимон  
Ҳар куни сархушман, ҳар куни шодман,  
Чунки мен инсонман, инсонман, инсон!

1963

132

## ҚИЗИМГА

Жаҳон менинг бағримдами ё мен жаҳон бағрида,  
Юз баҳорнинг елларими соchlаримни силаган?!  
Минг гулшаннинг гулларидан роҳатбахш бу қўлчалар  
Бахтга кўмиб юрагимни, юзларим эркалаган.

1963

Қизгинам, ишларинг, ташвишларинг кўп,  
Менинг бахтим бўлган жанжал, сўроқлар.  
Менинг бахтим бўлган эркаликларинг,  
Менинг бахтим бўлган хушбўй дудоқлар.

Гард юқмаган уйни нима қиласдим,  
Дам-бадам йиғмасам ўйинчоқларинг.  
Хотиржам уйқуни нима қиласдим,  
Ёпмасам, устингни очган чоғларинг.

Баъзан полга тушган жажжи излардан  
Бахтимга боққандай қиласман ҳузур.  
Оппогим, ўргилай меҳнатларингдан,  
Оппогим, ҳамиша соғ-саломат юр.

1963

\* \* \*

Дилга яқин, аммо кўздан узоқ ёр,  
Бир елқан мисоли олис денгизда.  
Мен эса йилларки, қирғоқда тикка,  
Гоҳи умидсизман, гоҳи умидвор.

Тўлқинлар кўзимдан қочгундек нотинч,  
Пойи губорингни топмай қатида.  
Шарпанг келтиромай ўз қанотида  
Шамол ҳуштагида йиглайди ўкинч.

Асрлардан бери зордекман шундай,  
Дардинг билан бирга ўғилгандекман.  
Бир нафас кўрмасам бўғилгандекман,  
Олисан бўлса ҳам кўрингин кунда.

1963

\* \* \*

Фикрим ғаввос каби кўнглим тубидан  
Ҳислар дурдонасин излар дам-бадам.  
Борди-ю топмаса... Унда йўқ шоир,  
Шонргина эмас, йўқолур одам.

*1963*

1

**136**

\* \* \*

*Бир учрашууда болалар менга  
пионер галстуги тақиб қўйдилар*

Қаёқларда эдинг, қайларда эдинг,  
Багрим, болалигим, олов кўзлигим.  
Хаёллар етолмас жойлардан сени  
Ўзим хаёл бўлиб кунда изладим.

Галстугим менинг, оҳ, галстугим,  
Қаёқларда эдинг, лола юзлигим!  
Қаёқларда эдинг, ахир мен сени  
Жуда ҳам согиндим, жуда изладим.

Излаганимдандир бугун топганим,  
Излаганимдандир юзларинг гулгун.  
Үйларим, куйларим, вужудим билан  
Излаганимданми, учрашдик бугун.

Бўйларинг бўйимдан баланд келгундек,  
Кўзларингда теран фикр ёлқини.  
(Одамлар! Мен яна шоҳиди бўлдим,  
Тиниқ келажагин буюк халқимнинг).

Бўйингдан ўргилай, кел, елкам тутай,  
Токи шу бўйларинг чўкмасин асло.  
Токи галстугим, олов юзлигим,  
Кўксингда ҳамиша кўлсин мусаффо.

1969

\* \* \*

Нотавон кўнглим нетарди мубталоси бўлмаса,  
Не қилай, бу мубталоликнинг давоси бўлмаса.

Йўлларида беқадр тупроқ бўлишга розиман,  
Босиб ўтарга ўнинг кибру ҳавоси бўлмаса.

Ўзгаларга ёр ҳамиша хуштакаллуф, хушчирой,  
Не учун бу илтифотлар бир балоси бўлмаса.

Ўзгалар гул тутса мен наврўзни қошига қўяй,  
Гарчи мен кўзга илинмас бир гадоси бўлмаса.

Шунча кېңг олам Саида кўзларига тор бўлур,  
Васлига ҳар дам илинжу муддаоси бўлмаса.

1963

Ҳар нарсаннинг боши ва охири бор,  
Қаштами, умрми ва ёки ижод.  
Ҳаётга келишдаги қайф қаёқда-ю,  
Ишонмайман,  
Кетастиб десалар: мен шод..

Яна қандоқ ҳаёт, бир нафасини  
Бир нафас ташлашга кўз қиймас сира.  
Балки шунданмикан, баъзан сатрлар  
Қаљбга ўт сололмай тортгани хира.

Асаб ҳам қарийди, завқ ҳам, туйғу ҳам,  
Шеър ҳам қарирми шоир қалбида?  
Баъзан қаймоқ боғлаб, ширага тўлиб,  
Бир чўққининг боши ё охири бўлиб  
Шеър ҳам қарирмикан шоир қалбида?

Қариш ҳам ҳар кимга қилмайди насиб,  
Бу баҳтдан агарда бўлсам баҳтиёр,  
Бўйимдан баландроқ бўйни ахтариб  
Орзиқиб орқамга қарадим такрор.

Орқага ўтсаму ва бўйларини  
Бир кичик кўз бўлиб томоша қилсам.  
Менга кифояйди бир вақт шеърларим,

Шу улуғ даргоҳга, шеър даргоҳига  
Қимнидир етаклаб кирганин билсам.

Бешогирд одамдай ўрним бўш бўлса,  
Мендан ясасалар мустаҳкам девор,  
Қулашимни азоб билан кутардим.  
Кўп бебаҳт бўлардим, қоя бўлсаму  
Лекин бўлолмасам бирон пойдевор.

1963

## ҚАЛАМ

Қоғозни мадҳ этсам, сен қилма таъна,  
Биламан, қаддингни кўп йўндим, буқдим.  
Қора қошларингни аёвсиз тўқдим,  
Барибир гўзалсан, гўзалсан яна.

Қалбимдаги ишқни, ўт эзгуликни,  
Такрорлай-такрорлай бўласан адо.  
Айт, сенга, азизим, ким қилмиш ато  
Бунча фидойилик, бу гўзалликни?

Сенсиз кар ҳам соқов бўлурди қоғоз,  
Дилимни имосиз англаган дўстим.  
Сўзимни сабот-ла пойлаган дўстим,  
Ёзавер, қорайнib, куйиб, ёниб ёз!

1963

\* \* \*

Дарахтлар гуллабди мендан яширин,  
Ҳатто сездирмасдан тугибди ғўра.  
Яна пинҳон дилга гунчалар сири,  
Япроқлар каттайиб тортибди хира.  
Наҳотки оламга етгулик кўркин  
Шунча хасислик-ла яшири баҳор? / /  
Ёки ҳарадимми мен унга бефарқ,  
Тавсиф қилмадимми тақрор ва тақрор.  
Қиттай бефарқликка қилолмай тоқат,  
Шунчалик ўч олган экан табиат,  
Оҳ, қалбим, бир дам ҳам шу лоқайдлик-ла  
Инсондан муҳаббат сўрама ҳеч вақт.

1963

142

Кечада бўртиб турган ғунчалар бу тонг  
Олпоқ гуллар бўлиб кутди қуёшни.  
Эрта ғўра тугар, кейин бўлар бол.  
Сўнг сариқ либосин ечаркан хушҳол  
Кекса қиши тизига қўяди бошни.

Гарчанд қайтмаса ҳам бу баҳор, аммо  
Дов-дараҳтга янги баҳор келади.  
Новдалар қайтадан гулга безаниб,  
Куртаклар ям-яшил баргчалар ёзиб,  
Атрофда парвона шамол елади.

Инсон умрининг-чи, баҳори битта,  
Ёзи бор, кузи бор, лекин йўқ қиши.  
Беҳуда бемеҳнат ўтмаса баҳор,  
Куз келгандагуни такрор ва такрор  
Эслаб соғинишдан қўрқмайди киши.

Сочга қўнган қиров ҳам ярашар шунда,  
Дард билан ёнган дил кўзгуси бўлур.  
Серқуёш, серчаман баҳор ҳуснидек,  
Кузги меваларнинг хушбўй исидек,  
Умри умрларнинг эзгуси бўлур.

1963

## ҚОҒОЗ

Қалам тутганимда биринчи марта,  
Оппоқ чеҳра билан кулиб қарадинг.  
Дўсту сирдошликка доим ярадинг,  
Ташаккурлар айтай сенга минг қайта.

Энг яхши ҳисларим, туйғуларимни  
Бағрингга топширдим, оқлигингданми?!  
Эзгуликка ҳамроҳ, поклигингданми,  
Ҳатто яширмадим қайғуларимни.

Буюк ниятларни асраб ортмоқлаб  
Асрларга кўприк бўлган ўзингсан.  
Гавҳарга киприк бўлган ўзингсан,  
Ёмонни фош этиб элга, лаънатлаб.

Қаяча қораласам юзингни, шунча —  
Юзимни оқ қилдинг, холислигимдан:  
Элга эл, ёмонга олислигимдан,  
Дўст бўлдик, оппоғим, ўла ўлгунча.

1963

Фунча очилиши сирдир одатда,  
Лекин аямайди хуш бўйин, ҳуснин.  
Билмайман, қайси кун, қайси соатда  
Қалбимга жон бўлиб ўрнашган исминг.  
Билмайман, яхшиси, сўрама ҳеч вақт,  
Билмайман, қайси кун, қайси соатда —  
Менга илашган бу уқубатли баҳт,  
Билмайман, қайси кун, қайси соатда.  
Гўё у туғилиб, биринчи марта  
Эшитган сўзимдек олис, қадрдон.  
Кўзимга гоҳи нур, гоҳ бўлиб парда,  
Гоҳ олға етаклаб, гоҳ қўяр йўлдан,  
Билмайман, яхшиси, сўрама ҳеч вақт...

1963

\* \* \*

Ҳатто уйқусида хўрсинса қизим,  
Дилим зирқирайди, ранжиган балки,  
Димоғимни тутиб нафасига жим,  
Фунча лабларидан излайман кулги.  
Ўпиб-ўпиб уни қиласман ҳузур,  
Педагогика ҳам қолар бир ёнда.  
Ҳеч қандай ақлга бўйсунмас бир зўр  
Қуёш парчалари кезади қонда.  
Ишончимни юклаб меҳрим бўйнига  
Бахтиёр шўнгийман ҳислар қўйнига.

## ҚАЛБ

Ҳар нарсага қўйма, дейишар менга,  
Кўймаган юракни нима қиласман.  
Ортиқча юқ қилиб уни танага,  
Ёнмаган юракни нима қиласман.

Мен-ку, шоир ахир, ҳар бир инсон ҳам,  
Бебахтдир қалбининг қўри бўлмаса.  
Чироқ ардоқланмас эди дам-бадам,  
Парпирағ ёнмаса, нури бўлмаса.

1964

## С О Ч

Ошиқ бўлган унга не-не йигитлар,  
Шоирлар тўқиган ғазал, дил ёқиб.  
Тундек кокиллардан бағри тутақиб,  
Үртаниб куйлашган ёниқ байтлар.

Аёллик ҳуснига хўп ярашади,  
Қизлик назокати у билан майнин.  
Ноз билан орқангга ташлаб атайин  
Ўтганда кўрганинг ақли шошади.

Сочим узун бўлса, тим қора бўлса,  
Орқамда тўлғаниб турса юрганда.  
Майлийди, қўлларим толса ўрганда,  
Майлийди, қийналиб тик туриб ювсам.

Ўтган ҳам, кетган ҳам қараса қайта,  
Қизчалар тортқилаб қочишса суйиб.  
Йигитлар термилса кўзлари куйиб,  
Баъзан кўчасидан ўтган пайтимда.

Юз хил турмаклардим, лекин қирқмасдим,  
Ишда халал берса, чулғардим бошга.  
Еримнинг дилини солиб оташга,  
Юз хил турмаклардим, лекин қирқмасдим.

1964

\* \* : \*

Шеър кайфи кун бўйи қилди бетоқат,  
Дилим гижимланиб тунни кутардим.  
Аёллар тақдири баъзида ғалат,  
Бекалик қисмати не кундузларни  
Қонунга чап бериб юлиб ўтади.  
Пинҳоний кутаман сокин, жим тунни;  
Офтобни кутгандай интиқ, интизор.  
Олис-олислардан ташлаб тўрини  
Олис-олислардан тун қанот ёзар.  
Кела қол, камтарин, камсухан дўстим,  
Оппоқ қофоз узра тўқ сочларингни.  
Кела қол хаёлкаш, сирдош дастгоҳим,  
Ёза қол, ёза қол кулочларингни.  
Қалби ўт, ўзи гунг, содда ошиғим,  
Кела қол, офтобдай ҳисларим тўқай.

1964

Романлар, азизлар, ақл ўргатманг,  
Ақл ўргатсангиз келади ғашим.  
Гарчи чорак аср умримдан шодман,  
Лекция тинглашга етган бардошим.  
Сиз фақат қалбимға гапириңг дейман,  
Ишқ изҳор этгандай шивирлаб секин.  
Гапириңг, тұнлари бедор тинглайман,  
Құзимға күз тикиб ўргатманг лекин.  
Гапириңг, құшиқдай сеҳрли, майин,  
Токи сархуш бўлиб қолай ҳислардан.  
Ҳар куйга солингу панд берманг лекин,  
Панд бермай етакланг қутлуғ излардан.  
Романлар, азизлар, ақл ўргатманг,  
Ақл ўргатсангиз келади ғашим.

1964

\* \* \*

Гулларга термилиб баъзан юзингни  
Тасавур қилардим қалбда яширии.  
Балки шунданмикан, кўзимга, қизим,  
Ўтдек ёнишингнинг сабаби, сири.

Қора кўзилларга боқиб суқ билан  
Шундай бўлса дердим ёниб, энтикиб.  
Лабингни излардим, атир гулининг  
Олов фунчасига кўзимни тикиб.

Қалбу фазилатни йигиб кўплардан  
Бир инсон ясадим мукаммал, улуғ.  
Биламан, оналар хаёли ҳар вақт  
Юксак тилакларга, орзуга тўлик.

Тоза виждон билан, содда қалб билан  
Ардоқлаб ўстирсам, сева билсам чин.  
Иложи йўқ, шу хислатлардан  
Юрагингга тушмасдан учқун.

1964

\* \* \*

Гилос шохларига қор қўнган каби,  
Шафтоли кийибди кўйлак пушти ранг.  
Тантиқ шабаданинг тутган асаби,  
Новдалар қаддини кўтарар аранг.  
Нафис гулкосалар тўлғанар тинмай,  
Уткинчи ёмғирдан ёноғида ёши.  
Охир беролмайин шамолга бардош,  
Арига бол тутди шошиб, билдиrmай,  
Қуруқ вужудини топширди елга.

Шунга ўхшаш кетар чин инсон умри,  
Ажал юлиб олса — ишқи, кўз нури,  
Юрагининг тафти қолади элда.

1964

152

\* \* \*

Майса ниш урибди ариқ бўйида,  
Биринчи севгидек бирам беғубор.  
Қуёшга талпинган қиёқларида  
Биринчи севгининг соддалиги бор.  
Кўрмаган саратон офтобини еб,  
Кузнинг тўзонларин мутлақо билмас.  
Булут кўз ёшидан талтайиб, ишқ деб,  
Баҳор елларига юз тутади маст.  
Майса ниш урибди ариқ бўйида,  
Биринчи севгидек бирам беғубор...

1964

153

Шеърларим, қалбимдан силқан қонимсиз,  
Дард билан ёзаман минг бир тўлғаниб.  
Бир парча ўт бўлиб ловиллаб, ёниб,  
Шеърларим, қалбимдан силқан қонимсиз.

Фижжак тори бўлур юрак ўша пайт,  
Анвойи оҳангга тўлган, тўлиққан.  
Ҳаёт сирларини қатида йиққан,  
Фижжак тори бўлур юрак ўша пайт.

Унга камон бўлур ҳамма гўзаллик,  
Гоҳ ўзга кўзида жилоланган баҳт.  
Гоҳ куйиб, ўртаниб ёзилган бир байт,  
Унга камон бўлур ҳамма гўзаллик.

Япроқ шивири ҳам тегиб ўтади,  
Еллар қанотида юлдузлар тушар.  
Гуллар чайқалади, сайрайди қушлар,  
Япроқ шивири ҳам тегиб ўтади.

Кичкина уйимга сиғади олам,  
Тортишув, баҳслашув бўлур авжида.

Шоирлик бахтидан мен мамнун жуда,  
Қичкина уйимга сиғади олам.

Шеърларим, қалбимдан силқан қонимсиз,  
Дард билан ёзаман минг бир тўлғаниб.  
Бир парча ўт бўлиб ловиллаб, ёниб,  
Шеърларим, қалбимдан силқан қонимсиз.

1964

\* \* \*

Шохлар кўтаролмас ўзин ҳосилдан,  
Тиргович бўлмаса синиб тушарди...  
Айри елкасига опичиб зилдай  
Мевалар бехато етилиб пишди.  
Мақтов-ла ўргада кўрилди баҳам,  
Қачон экилгану қачон гул очган,  
Боғбоннинг қўлидан қанча сув ичган,  
Ташаккур айтилди ел, қуёшга ҳам.  
Фақат ётар эди тиргович четда  
Яхшиликни тилаб, миннатни билмай,  
Нолимай, ўкинмай ва малол олмай  
Фақат ётар эди тиргович четда.  
О, агар меҳрдан пиёла ясаб,  
Шеърдан май тутмоқнинг бўлса иложи.  
Тирговичлар учун ичинг деб қистаб,  
Тирговичлар учун деб солардим жар.

1964

156

\* \* \*

Ииллар ҳатто сочдан рангни ўчириди,  
Хуснга ташлади нурсиз бир соя.  
Аммо хаёлингга етмайин кучи,  
Ўзимга бутунлай берди ниҳоят.

Лекин сен чўчима, ўйларингни мен  
Фақат ўн саккизда туриб эслайман.  
Фақат ўн саккизда юриб излайман.  
Ўн саккиз ёшдаги йўлларингни мен.

1964

157

\* \* \*

Арчазор ёнида бир туп оқ қайин,  
Мармар танасини чулғабди олов.  
Қуёш нурларига чаяркан бетин,  
Каҳрабо япроқлар ёнади лов-лов.

Бошига кўтарган ерни ўпсам деб,  
Орзиқиб елларга тутади кўксин.  
Зумрад ёшлигимни қайта топсам дёр,  
Оҳ, яна бўлсан, дер, новдалар ҳусни.

Арчазор ёнида бир туп оқ қайин,  
Яшашни ўргатиб тураг атайин.

1964

\* \* \*

Сайр қилсангиз, бўлайин гулзор,  
Тингласангиз, бир булбули зор.  
Чанқасангиз, муздек бир чашма,  
Бўстон бўлай, кезинг беозор.

Ёр йўлида мунтазир кўрсам,  
Ойдин бўлиб бошлаб келайин.  
Фамингизни айтинг, олисга,  
Олисларга ташлаб келайин.

Аммо дўстга дўст бўлмасангиз,  
Ёмон ният тугсангиз дилга.  
Яхшиларга йўлатмам сизни,  
Чўгир бўлиб ётаман йўлга.

1964

\* \* \*

Фикр чарчатади баъзида, аммо  
Дам берсам жуда тез ўтмаслашади.  
Тинчини бермасам у дўстлашади,  
Пардасин кўтариб ҳар муаммонинг.  
Офтоб жилосидан ипак қатимлаб,  
Ойнинг билагига солиб аргимчоқ.  
Коинотни зумда нур каби ҳатлаб  
Сирли висолига очади қучоқ.  
Кундузи — у қувлар, тун кечалар — мен,  
Икков қўшилишиб шеърга сингамиз.  
Шундай енгиб келдик гафлат, жимликни,  
Бундан бу ёғи ҳам шундай енгамиз.

1964

## ҚОЯ

Қоялар, забонсиз, сирли қоялар,  
Асрлар изи бор пешанангизда.  
Тошбағир сийнангиз ҳатто нурдан ҳам,  
Шунча абадийлик, умрлардан ҳам  
Бир ҳаёт яратмас кошонангизда.

Қүёшга қанчалар яқинсиз, аммо  
Муздек кўксингиздан аримайди қор.  
Бундай виқор билан турманг қаршимда,  
Нуқтадек ~~б~~улсам ҳам ҳар қарашимда  
Ҳаёт бор, қалбимда балқийди баҳор.

1964

\* \* \*

Булут чиқмаса кўкка,  
Тиниқлиги қайдан билинур?  
Ишқ тушмаса юракка,  
Буюклиги қайдан билинур?  
Киш бўлмаса, офтоб  
Илиқлиги қайдан билинур?  
Дил бермаса ҳижронга тоб,  
Содиқлиги қайдан билинур?

1964

162

## АРЧА

Иzzат-икром билан ўтқаздик тўрга,  
Шохларига осдик зарлик чироқлар.  
Урмон нафасини таратиб уйга,  
Ун кун яшнаб турди кулиб, чарақлаб.  
Сўнг кўм-кўк чиройли ниначаларин  
Кўз ёшлари каби дув тўкди бирдан.  
Ингларди соғиниб ўрмон ҳавосин,  
Безор бўлган эди ясама қордан.  
Заминсиз, ёгинсиз, дўстсиз, ҳамроҳсиз  
Безаклар жонига кирмади ора.  
Баданин ачитган изғирин елсиз,  
Иссиқ хонада у топмади ором.

1964

\* \* \*

Қатра сингса ҳамки ернинг бағрига,  
Лоақал қонади тупроқ бир чимдим.  
Шеърларим қайсиdir дилнинг қаърида  
Бир орзу, эзгу бир ният уйғотиб,  
Бир туғён, гўзал бир ҳисни қўзғатиб  
Қатрадек йўқолса мен рози эдим.

1964

164

Қизча талпинади, дадаси эса  
 Асабдан қаттиқроқ қисган таёғин.  
 Азиз фарзандини кўтарай деса,  
 Тирак бўлишга йўқ унинг оёғи.  
 Эсимдан чиқмайди бу манзара ҳеч,  
 Ота кўзидағи ҳам ўқинч, ҳам баҳт.  
 Гўдак лабидаги маъсумлик, қувонч,  
 Бутун вужудимни қилганди карахт.  
 Шер бўлиб асрраган баҳти олдида  
 Не азоб ҳозирги нотавон туриш...  
 Билсайдинг, болажон, эй нуридийда,  
 Сени елкасига опичиб юриш  
 Баҳтини билсайдинг...

Ўкситма, ўзинг ҳам ўксима, эркам,  
 Ўрин ўтмаса ҳам келгин бағримга,  
 Бошимга кўтарай, иргитай кўкка.  
 Сен, ўзи бебаҳра шу баҳтни даданг  
 Кўпларга улашган, менга ҳам берган,  
 Кел, ўзим кўтарай оппоғим, эркам.

1964

\* \* \*

Ҳаётдан иолиса бирор, сўймайман,  
Айниқса, соғ бўлса қўли оёги.  
Ҳаёт сийлар бизни қувонч, баҳт билан,  
Не ажаб бўлса гоҳ алами, доғи.

Курашсиз, меҳнатсиз шодлик, кулгуни  
Ўғирлик мол дейман, қиласман ҳазар.  
Қалбимнинг парчаси сингмаса агар  
Розимасман бирор ҳадия этса зар.

Ғамимни айтмасам, токи ўзганинг  
Қўнглига бир он ҳам ғашлик солмасам.  
Бахтимни дўстларга хушнуд ёйсаму.  
Лекин уни ҳеч вақт йигиб олмасам.

Ҳаёт тўлқинида бир хасдек ожиз,  
Увол аталишга қиласман тоқат.  
Умримнинг бир они ўтмаса беиз,  
Худди ана шундай яшасам фақат.

1964

## ДАДАМ ХОТИРАСИ.

Дадагинам,  
Ҳар ўтган умримга назар ташласам,  
Қиттай ғубор сезсам, кўнглим ғашланар.  
Ранжитиб қўйдимми, деб руҳингизни,  
Жигаримни кабоб қиласар оташлар,  
Дадагинам!  
Гоҳ лентам, гоҳида ботинкам ипин  
Боғлаган меҳрибон қўлларингизни,  
Тоғдаги чашмадек мусаффо, тиниқ —  
Қалбингиз, муборак йўлларингизни  
Бир лаҳзага топсам,  
Оҳ, битта ўпсам.  
Уқишим соз бўлса, юз-кўзингизда  
Тенги йўқ бир қувонч порлаб кетарди.  
Шундай боқардингиз, гоҳ уйимишга  
Кичкина дўстларим чорлаб келганда.  
Дадагинам,  
Ўзингиз солгансиз менга шеър ишқин,  
Нега ўқимайсиз сатрларимни?  
Нега текширмайсиз дафтарларимни,  
Нега койимайсиз хатоим учун?  
Ҳеч нарса қолмасди назарингиздан,  
Сал чучук сўзлашим, юришимгача.  
Сув бўйида ўйчан туришимгача,  
Ҳеч нарса қолмасди назарингиздан.  
Ҳали ҳам шу назар қиласди таъқиб,

Йўлимга ҳамиша нур, чироқ ёқиб.  
Гоҳ жиддий, гоҳида мулойим боқиб,  
Меҳр кўзи билан қиласди таъқиб.  
Кичкина обрўйим балки шундандир,  
Шундандир каттакон баҳт тўла уйим.  
Кичкина обрўйим балки шундандир.  
Номингиз элимда ардоқлай олсам,  
Розиман қиз бўлиб туғилганимдан.  
Яхши ўғил каби мен сақлай олсам,  
Розиман қиз бўлиб туғилганимдан,  
Дадажонгинам!..

1964

\* \* \*

Билмайман, ҳар куни кекса бу дунё  
Қанчалаб гўдакка очади бағир.  
Лекин, биламанки, ҳеч қайси она,  
Эртадан бирон баҳт қилмаса умид,  
Фарзанд туғмас эди, бермасди умр.  
Олам манглайидан ажинни ёзиб,  
Бироқ туғилмоқда тинмасдан одам.  
Хитой, Америка, Вьетнамда ҳам  
Бомбаларни янчиб, низони эзиб,  
Одам туғилмоқда сира тинмасдан,  
Умидсизлик нима, асло билмасдан  
Туғилмоқда тилак, қудрат, курашлар.

1965

169

\* \* \*

Қўзларига сиңгиб жетар вужудим,  
Кирмаган тиканинг заҳрин тортаман.  
Унга озор етса, ўлган бўлсам ҳам,  
Қасоскор, даҳшатли бўрон бўламан,  
Дилларга ғулгула, сурон бўламан,  
Тинмайман, ҳаётга яна қайтаман.

1965

170

\* \* \*

Қор ёғар, қор ёғар бирам хушҳаво,  
Қор ёғар, қор ёғар, айни муддао.  
Келинглар, жўралар, бир дам кезайлик,  
Кимки нохуш бўлса топгуси даво.

Дараҳтлар шохида, бўғотларда қор,  
Тарновлар тишлаган новвотларда қор.  
Юзига биллурдан нафис тўр тутиб,  
Қор қўйнида жимжит оқади анҳор.

Қор ёғар, қор ёғар пояндоз бўлиб,  
Қор ёғар, қор ёғар бирам соз бўлиб.  
Қаранглар, жўралар, қизлар юзига  
Лаъл суриб ўтибди қор пардоз бўлиб.

Қор ёғар, қор ёғар бирам хушҳаво,  
Қор ёғар, қор ёғар, айни муддао.  
Юринглар, жўралар, бир дам кезайлик,  
Кимки нохуш бўлса топгуси даво.

1965

## И У Л Л А Р

### I

Йўллар, йўллар, обод, поёнсиз йўллар,  
Йўллар, йўллар, олис, озорсиз йўллар.  
Бу йўллардан гўё мени кифтида,  
Меҳнати, меҳрининг ўти, тафтида  
Кўтариб боради минг-минглаб қўллар.

Доим қулогимда лом ҳам шағалнинг  
Полвон бульдозернинг тинмас шовқини.  
Кўзимда кимлардир ташна лаб билан,  
Ғубор қўнган қошу тиниқ қалб билан  
Мириқиб шимирап тер томган сувни.

Ҳатто машина ҳам ҳарсиллаб қолиб,  
Энтикиб сув сўрар бу тоғларда гоҳ.  
Терлаган яғриндек ялтиллаб тошлар,  
Бу ерларда ўтган кураш, бардошлар  
Сиридан қилгандек бўлади огоҳ.

Йўллар, йўллар, достон сатрларидек  
Ҳар қадамда сизни ўқиса бўлур.  
Тилакларни улаб тилаклар билан,  
Юракларни улаб юраклар билан  
Яна олисларга йўллар йўл олур.

## II

Ён бағрида ўтлар қўзилар,  
Чўпон ҳайдаб олисдан кепти.  
Мени тотли гўшт есин депти,  
Хушбўй, тиник ўтларни излаб.

Яшикларин кўтариб атай,  
Асалчи ҳам чиқмиш шаҳардан.  
Мени асл асал есин деб  
Бунда тинмас эрта саҳардан.

Ташна бўлса зор бўлмасин деб.  
Булоқ қўзин очиб кетган ким?  
Олтин қўллар, меҳрибон қўллар,  
Сизга минг бор қиласман таъзим.

Йўл чарчатса ҳордиқ ёэсин деб.  
Чўққиларга суҳбатгоҳ қурган  
Эй, тинмаган, азиҳ одамлар  
Нима қилай, айтинг, буюринг.

Шеърим босмас қалбим ўтини,  
Ахир у ҳам сизники, сиздан.  
Нима қилай, айтинг, буюринг!  
Ўргилайми мен изингиздан!

Куйим, ўйим, бари сизники,  
Сизникиман токи жоним бор.  
Нима қилсан, нима ёссан ҳам  
Олдингизда қарздорман, қарздор.

## III

Тоғнинг кузи шунча кўҳликми,  
Қалбим, кўзим ҳайратдан соқов.

Сакраб учиб ўтган каклики,  
Дўланалар ёнарми лов-лов?

Ен бағирлар афсона-ку нақд,  
Ирмоқлари сутми ё кўзгу?  
Худди гулхан бунда ҳар дараҳт,  
Хазонлари учқуннинг ўзи.

Шунча рангни бағрида тутган,  
Қоялар-чи, виқорли, кибор!  
Аммо қайда гўззаликки бор,  
Унга инсон оёғи етган.

#### IV

Қорлар тўёлмасдан тоғлар ҳуснига  
Баҳор лола бўлиб очилар эмиш.  
Баҳор лола бўлиб сочилар эмиш  
Қорлар тўёлмасдан тоғлар ҳуснига.

Баҳорда йиғлармиш шалола бўлиб,  
Гоҳи шовиллармиш бўлиб зўр дарё.  
Ишқин шивирлармиш ирмоқ бўлиб ё,  
Гоҳ тўхтаб, гоҳида елиб-югурниб.

Баҳорда илдизлар бағрига сингиб,  
Тоғлар шарбатини сўр, деяр эмиш.  
Бўйинг чўз, тоғларни кўр, деяр эмиш  
Боғларда илдизлар бағрига сингиб.

#### V

Йўллар топиб ва топиб ҳамдам,  
Чўққиларда ёнгоқ унибди.  
Шу забонсиз тошлар узра ҳам  
Фолиб хаёт мағрур турибди

1965

\* \* \*

Қалбим торларини гоҳ тонғги насим,  
Гоҳ дағал бармоқлар чертар беаёв.  
Бир сатрим ирмоқдек қўйилади жим,  
Бир сатрим кўзимга санчилгундек ёв.

Қошкийди, ғазабкор, пичингга тўла  
Шеърларни ёзмасам, ёзмасам сира.  
Қошкийди, барчага кулги улашиб,  
Ҳеч кимнинг дилини қилмасам хира.

Аммо шоир дили, тили бир уммон,  
Асали тугамас, заҳари қочмас.  
Кўзига тушмаса ўша бир ёмон,  
У ҳам беҳудга заҳрини сочмас.

1065

175

\* \* \*

Тонг бўзариб келарди, юлдузларнинг жамоли  
Яна ҳам яшиаб бир дам очилгандай туюлди.  
Тонг ёришиб келарди, гўёки шу юлдузлар  
Коинотнинг бошидан кундуз бўлиб қўйилди.

1965

176

\* \* \*

Бадбўй шу ўсимлик дард аритармиш,  
Гўё дўстнинг берган аччиқ дашноми.  
Содиқ дўст ёмон кун асқатар эмиш,  
Агар шундай бўлса... Чиндан ошнами?

Кўз ёш пардасида бўлса-ю ҳозир,  
Кулгингни кўришга қилмаса тоқат.  
Шахсан мен булардан қиласман ҳазар.  
Чунки дўст баҳтидан тирикман фақат.

1965

\* \* \*

Нур бўлиб порлайди қалбим шеър ёзсан,  
Оташ ҳам тиниқ ўт бўлиб ёнур.  
Аммо ёмонликни кўрсан ё сезсан,  
Шундай тутайдики, дудга айланур.

Гарчи кўп ёндиму гоҳ-гоҳ тутадим,  
Гарчи ёмонликни яхшилик енгди.  
Аммо шу озгина тутаганларим  
Яна қанча ёнишларга етарди.

1965

178

Уйқуга бош қўйди офтоб оҳиста,  
Кечки шабадада тўлғанди гулзор.  
Ранг, нусха кўчириб, излаб пайваста,  
Қапалакнинг шунда тунагиси бор.

Атиргул юзида кулдиргич порлаб,  
Бираам яшинатиби жамолин, ҳуснин.  
Фунча бир кулгига энди очган лаб.  
Райҳон кокиллари уфурар исин.

Юзидан қон томган гултожихўроз,  
Илиги тўқ элнинг қарисисимон.  
Қаддини кўзкўзлар гулхайри танноз,  
Хиналар уятчан париларсимон.

Тож кийган гулсафсар хаёлчан, кибор,  
Шойигулнинг бағри ёнади лов-лов.  
Ер бағирлаб ётар бир гулибеор,  
Дўстларга қарашга кўнгли бермай дов.

1965

-\*\*-

\* \* \*

Чумоли уясин бузган болага  
Қизим куйиб-пишиб қиласарди ўгит:  
— Ўлдирма, аяси йиғлайди ахир,  
Аяси излайди, қўй, тегма, бор, кет!  
Зар сочса бунчалик қувонмас эдим,  
Бунчалик бўлмасдим баҳтли, бадавлат.  
Наҳотки, онани ўйлар гўдагим,  
Наҳотки, сололдим қалбига шафқат!

1965

180

\* \* \*

Баъзан рўзгордаги бирон буюмни  
Кўздек ардоқлаймиз чангдан ва намдан.  
Шунча аясадик агар одамни,  
Шунча асрасайдик ўксиш ва ғамдан,  
Юзлар табассумдан аримасмиди...  
Қасод бўлармиди дори бозори?!  
Кўрмай докторларнинг меҳрин, озорин  
Одамлар баъзан тез қаримасмиди?!.  
Судлар эснаб-эснаб бекорчиликдан  
Иш сўраб колхозга кетарди балки.  
Ҳарқалай, шунақароқ бўларди, дейман  
Ўйлардан эшитилса фақат куй, кулги.

1965

## СҮНГГИ ПУЛ

Қадамлар, шарпасиз оғир қадамлар,  
Кўзлар пардасига қалқан аччиқ ёш.  
Энг сўнгги сафарга кимни узатар,  
Ҳамкасми, қўшими ёки қариндош?  
Гуллар ҳусни шунча совуқми асли,  
Висол дамидаги кўрки қаерда?  
Бугун табиатнинг қанақа фасли,  
Ҳеч ким пайқамайди, кўзлари ерда.  
Майлига, ранглар ҳам ўчсин бир нафас,  
Майлига, офтоб ҳам беркинсин бир дам.  
Майлига, бир зумга йўқолсин ҳавас,  
Майлига, зил юқдай туюлсин қадам,  
Ахир орамиздан кетмоқда одам!  
Мотам сукутидан юрак қийноқда.  
Юрак қийноқдаки, бермагундай тоб.  
Аммо, мен истардим, юрак шу топда  
Ўз-ўзига шундай беролса ҳисоб:  
Дардин эшитдингми тириклигига?  
Бирон шодлик куни гул тутганмидинг?  
Ёки ўша кунни унутганмидинг?  
Қадрига етдингми тириклигига?  
Шу сўроққа тутса кўнглимиз бизни,  
Балки ўлим яна кетарди йироқ.  
Одамлар! Қадрланг бир-бирингизни,  
Гул ҳам, муҳаббат ҳам тирикка керак.

1965

## ИШОНЧ

Биронга ишониб баъзан панд ейман,  
Лекин ташломмайман шу одатимни.  
Балки, шу ишончдир саодатимнинг  
Умри, келажаги, бонси дейман.

Ахир ишонмаса биронта менга,  
Санчгани афзалроқ қалбимга тикан.  
Шу ишонч ошиён қурмаган жойда  
Айтинг-чи, чинакам шодлик бормикан?

1965

## ҚУШИҚ

Ҳалима Носировага

Ҳали бола эдим, ҳайрон бўлардим,  
Бош чайқаб тинглашса баъзан катталар.  
Лекин, неларгадир кўнглим тўларди,  
Нелардир қалбимни этарди талаб.

Кеча йиғлатганим учун эзғилаб  
Кучугимдан узр сўрардим секин.  
Қўйиб юборардим тиллақўнғизни,  
Нима бўлганини билмасдим лекин.

Билмасдим, дилрабо ўша қўшиқдан  
Тақдирим дилимга ўрнашганини.  
Билмасдим, шеър бахти, заҳмати шунда  
Қуй билан кўнглимга туташганини,  
Билмасдим.

1965

## ЧУЛИ ИРОҚ

Тарихни сўзлама менга, эй одам,  
Битта чалиб бергин «Чўли ироқ»ни.  
Битта чалиб бергин, токи яна ҳам  
Яхшироқ ажратай қорани, оқни.

Бу куй асрларнинг баридан тортиб  
Чўлларда толиққан ҳорғин карвоидай  
Минг хил тақдирларни устига ортиб,  
Қалбимдан жимиirlаб ўтади қондай.

Тарихнинг энг олис қатламларида  
Армонда ухлаган орзу-аламлар.  
Дунё манглайнига ажин туширган,  
Дардни, қарилкни яратган ғамлар,

Саҳро чечагининг аянч кулгиси,  
Ёмғирдан жон кирган тупроқнинг иси,  
Ҳаммаси ўтади қалбимни ўйиб.  
Туя бўйнидаги қўнғироқларнинг  
Ташналик эслатган жаранги бўлиб  
Ҳаммаси ўтади қалбимни ўйиб.

Тарихни сўзлама менга, эй одам,  
Битта чалиб бергин «Чўли ироқ»ни.  
Битта чалиб бергин, токи яна ҳам  
Яхшироқ ажратай қорани, оқни.

Ҳаддидан ошганга уни чалиб бер,  
Дўстлар дийдорини ғанимат билмай,  
Саробга шошганга уни чалиб бер!  
Чалиб бер, чалиб бер, андиша қилмай.  
Утмишни сўзлама, ўгит керакмас,  
Шу куйни бир марта чалиб берсанг бас.

1965

\* \* \*

Ердан нон ушоғин олганим кўриб,  
Нега истеҳзоли кулдинг, яхши қиз?  
Диндор ўйладингми сен хаёл суриб,  
Борди-ю, шу ушоқ дин бўлса агар  
Сира иккиланмай чўкар эдим тиз.  
Яна истардимки, дунё, элларга  
Якка-ю ягона дин бўлса шу нон.  
Куймасмиди, балки далалар, қирлар,  
Абад топармиди баҳтини инсон?!

1965

187

## КУЗ

Куз келди, ёноғи куйган япроқлар  
Кекса кўзлар каби тортибди хира.  
Аммо меваларга тўлибди шира,  
Етилиб товланар ишкомлар, боғлар.  
Табиат шунчалар одампарварки,  
Лол қолиб боқаман баъзан ишига.  
Биллур жига тақиб кумуш қишига.  
Ёз бўйи бузмайди гуллар таркини.  
Баҳорда дам-бадам ёмғир ювади,  
Япроқлар ҳуснини инсон кўрсин, деб.  
Ёзу куз қуёши булут қувади,  
Мевалар шарбатга тўлиб турсин, деб.  
Куз келди, ёноғи куйган япроқлар  
Кекса кўзлар каби тортибди хира.  
Аммо меваларга тўлибди шира,  
Етилиб товланар ишкомлар, боғлар.

1965

\* \* \*

Пўқламаган ҳар кунинг йилча бўлурми, ҳай-ҳай,  
Шунчалик шафқат билмас дилча бўлурми, ҳай-ҳай.

Хуш суратинг бир нафас тарк этмас хаёлимни,  
Кўз шаҳло-ю, қош эса нилча бўлурми, ҳай-ҳай.

Ҳар сўзда юз андиша қилғум донолиғингдан,  
Кўнглингнинг нозиклиги қилча бўлурми, ҳай-ҳай.

Гоҳ ханжар, гоҳ асалдек сўзларингдан доғдамен,  
Жон олиб, жон бергучи тилча бўлурми, ҳай-ҳай.

Васлингнинг умидида дунёдан ўтиб боргум,  
Қаноатда Саида филча бўлурми, ҳай-ҳай.

1965

\* \* \*

Ялангоч новдалар мудрайди карахт,  
Қорними кутади тамшаниб кўкка?  
Чайир панжаларин ёзиб ҳар дараҳт,  
Бедор қариядек ухлайди тикка.  
Дув тўкиб олтин ранг япроқларини  
Кимхоб пояндоздек йўлларга тўшаб.  
Нисор қилиб бутун жон-жаҳоннини,  
Кучдан қолган мунис онага ўхшар.

1965

180

Гуллар юзида ханда — бу боғдан ёр ўтдими,  
Одатин қилмай канда, яна бедор ўтдими?

Еллар нечун сарсари, кетолмайдилар нари,  
Кўнглимнинг моҳ пайкари кўзи хуммор ўтдими?

Райхонга рашк қилиб гул, бағри қон бўпти буткул,  
Яна райхон ҳидлаб ул, бундан такрор ўтдими?

Ҳар нарсада нур, виқор, ҳатто тупроқ бахтиёр,  
Бир-бир босиб беозор, ул беозор ўтдими?

Дилда такрорлаб отин, тилаб умру давлатин,  
Сәяси бўлиб тагин Саида зор ўтдими?

1965

\* \* \* -

Ишқда вафо керак, ҳаётда мардлик,  
Шоирга ҳамиша дил керак дардлик.  
Уни одамларга қанча юқтирса,  
Уни одамларга қанча уқтирса,  
Шунча кўпаяди оламда яхши.

1966

192

## ТУПРОҚ ДЕИДИКИ

Тупроқ кулгисидан яшарар олам,  
Тупроқ йигисидан қурийди ҳаёт.  
У йиғласа бўлмас бундан ортиқ ғам,  
Унинг йигисини кўрганмиз, ҳайҳот!  
Ернинг йиглашини кўрмоқ бўлсангиз,  
Қурбонлар қабрига яхшилаб боқинг.  
Чора топ, деб сизга чўккундайни тиз,  
Унутма, инсон, деб шивирлар сокин.  
Тақдиридан маъюс, дилхаста ўзи,  
Кошкийди, кошкийди топса бир илож,  
Бағрингизга бериб жигарингизни,  
Ўрнига гуллардан тақиб олса тож.  
У пинҳон йиғлайди, ёқа этмай чок,  
Қекса она каби дилида дарди.  
Одамлар! Курашинг, бирлашинг, токи —  
Шу азиз тупроқда қайғунинг гарди  
Қолмасин, бўлмасин, кўрмасин сира.  
Вайроналар белин букмасин мутлақ,  
Қуёшнинг чеҳраси тортмасин хира.  
Гуллар тиник бўлсин, қор бўлсин оппоқ,  
Тепкилаб, селкиллаб ўйин тушсангиз  
Япроқ бўлиб қарсак чалган она-Ер:  
Қўксим қадоқ бўлмас пошна изидан,  
Фақат йиғлатманглар, йиғлатманглар,

1966

13—859

193

\* \* \*

Жийда гулларидан ҳаво муваттар,  
Табиат кучига ўқийман таҳсин.  
Сочим, димоғимга яширгим келар  
Шу жажжи гулларнинг тенги йўқ исин.

Шоҳин синдиришдан тиёлмам ўзни,  
Истамасам ҳамки қилмоқни увол.  
Баъзан яхши нарса яхшилигидан  
Ўз умрига ўзи бўларкан завол.

*1966*

\* \* \*

Ғунчаларни уйғотган шамол  
Нечун баргни юлқилаб кетди.  
Бирин суйиб, бирин ирғитди,  
Табиатнинг ишидан мен лол.

Биригини койиди юлиб,  
Мұртлигига бергандай дашном.  
Бирисидан парвона бўлиб,  
Қанотида ташиди шабнам.

Лоқайдликни билмагани-чун  
Таъзим қилгим келарди унга.

1966

Билмайман, бу уйда яшаганди ким,  
Роса қилган экан меҳнат, ҳафсала.  
Бугун дил эзгучи сукунат ҳоким,  
Синган қовурғадек ётар вассалар.

Кўзимга етимдек мунгли боқади,  
Бир ёнда шувоғи тўкилган ўчоқ.  
Гўё жонли вужуд, бағрим ёқади  
Қўли синиб ётган тилсиз қўғирчоқ.

Гоҳ алам, гоҳида чексиз шодликлар,  
Балки умрларнинг гувоҳи бу уй,  
Фалвир баданида хотира сақлар,  
Хотирага шўнғиб сурган каби ўй.

Забонсиз шу тошлар, балки неча бор,  
Тинглаган тўй, базм, дўстлар сасини.  
Балки қатларида пинҳон ардоқлар,  
Юмшоқ йўргакларнинг хушбўй исини.

Меҳнат, умр бари, муҳаббат бари,  
Деворда панжалар изи — сирли хат.

Наҳот шунча қаттиқ табиат қаҳри,  
Наҳотки, илож йўқ, бир чора қаҳат?  
Фикрдан, ҳислардан увушган юрак  
Жавоб топган каби ёришди бирдан.  
Ахир одам омон, одамлар тирик,  
Ана, ўтмоқдалар шошилинч, бардам.

*1966*

\* \* \*

Машиналар ғиз ғиз ўтар ёнимдан,  
Бортида ёзувлар. Москва — Тошкент.  
Тошкентга Белорус, Украинадан,  
Шоферлар серташвиш, шоферлар шошган.

Ҳаммаси ардоқли жигарим мисол,  
Миннатдор назарим кетар эргашиб.  
Қалбим бу оқибат қархисида лол,  
Машиналар ўтар ёнимдан шошиб.

**1966**

**198**

\* \* \*

Кун ботиб бормоқда, турналар учар,  
Олисдан эшитилар чуғур-чугури.  
Терак учларида бир ёниб ўчар  
Уфқа тиз чўккан қуёшнинг нури.

Туржалар кетяпти, билмам, қай юртга,  
Қайси элатларга бошлишди сафар.  
Мабодо биттаси сал қолса ортда,  
Безовта бўлади, бузилар сафлар.

Бир қўзғалиб яна ростланди сафлар,  
Ортда қолган бири қўшилди бардам.  
Не деб чуғурлашар, недир гаплари,  
Яхшилик сезаман не десалар ҳам.

*1966*

**199**

\* \* \*

Қизим қўшиқ куйлайди...  
Ирмоқлар шовилларми ё қушларнинг наъмаси,  
Қуёшнинг шуъласими дилим тутган кафтида?  
Гўё дейди: ола қол роҳатларнинг ҳаммасин,  
Чидаш бера олсанг бас, муҳаббати, тафтига.

Қизим қўшиқ куйлайди...  
Ё табиат гулларга ранг улашар шу бугун,  
Ё зилол сув бағрига қалдирғоч тўш урдими?  
Субҳидамнинг еллари ўпидар дарёлар юзин,  
Гулшанларнинг атрини уфуришга турдими?

Қизим қўшиқ қўйлайди...  
Юлдузлар жимиirlарми ё шаршара тўзони?  
Эй наққош, атласингга жилвасини кўчиргил!  
Тингланг, азиз одамлар, тингланглару фазони —  
Тутунлардан тозалаб, уруш отин ўчиринг.

Қизим қўшиқ кўйлайди...  
Ё капалак қанотин ели тегди юзимга,  
Ё ёшлиқ бағридаги хаёл аралаш уйқу.  
Бир қатра шабнам бўлиб термиламан қизимга,  
Бир қатра шабнам қилиб қўйғанди мени түйғу.

Қизим қўшиқ куйлайди...  
Ёки оқшомни қувлаб тонг келяпти тоғлардан,  
Ё атиргул ғунчаси япроқ ёзди шу маҳал.  
Қаранг, азиз одамлар, далаларда, боғларда  
Куртакларни сийпалаб кезиб юрибди ҳамал.  
Қизим қўшиқ куйлайди...

1966

Дарёларнинг ул юзида уйларингиз,  
Олислардан эшитилар куйларингиз.  
Кундა-кунда кўролмасам бўйларингиз,  
Тун кечалар уйқу бермас ўйларингиз.

Дарёларни кечиб ўтсам, кечиб ўтсам,  
Күшлар бўлиб учиб ўтсам, учиб ўтсам.  
Шамол бўлиб гулшанлардан гул атрини  
Бошингиздан сочиб ўтсам, сочиб ўтсам.

Сув бўйида узоқ туриб сурманг хаёл,  
Сочларингиз мушкин олиб ўтса шамол.  
Ўзгаларга тарқатма деб қизғанаман,  
Дилгинамга келур малол, келур малол.

Дарёларда ёр сочини ювармикан,  
Гумонларни хаёлидан қувармикан.  
Иўлларига атиргулурайхон эксам,  
Бир қайрилиб, кўз учида суюрмикан.

1966

\* \* \*

Изғирин ачитар, осмон элар ун,  
Дараҳтлар танида меҳнатдан қадоқ.  
Қуриб-қовжираган танҳо бир япроқ  
Ел билан олишар мана неча кун.

Қуриб-қовжираган, рангидә қон йўқ,  
Шамол ҳам қўймайди зулм исканжасин.  
Япроқ ҳам айирмас шоҳдан панжасин,  
Ёнида ҳамхона, бир меҳрибон йўқ.

Йўқ, йўқ, қилолмайман мен уни ҳавас,  
Дўсту ёр, жигарлар ва қариндошсиз,  
Үртада бўлмаган дастурхон, ошсиз,  
Эй ҳаёт, олдирма, олмайин нафас.

1966

..

Кимсасиз бу қирда қайдан бу қабр,  
Нечун одамлардан олисда, танҳо.  
Унсиз бу чиройни қилманг деб қадр,  
Табнат ҳуснига қасдан ётар ё?

Бошига бир туп тол ташламиш соя,  
Билмайман, ким экан, ардоқлаган ким?  
Барглар шивирида мунча мунг, нола,  
Нечун булоқлар ҳам куйламайди, жим?

Нечун кўзларимни яшнатмас гуллар,  
Қалбимни эзади оғир алам, юк.  
Шабада ҳам мунча хунук увиллар,  
Чечакда дил тортар бир истара йўқ.

Барига шу кичик бир қабр сабаб,  
Офтобнинг бу жойга сочган шодлигин  
Шу қабр ўзига олгандек қамаб,  
Барига шу кичик бир қабр сабаб.

1966

\* \* \*

Субҳидамда сувга чиқсан бир йигит хомуш юрар,  
Ақлу ҳуши йўқ ўзида, гоҳ туриб, гоҳ ўлтирас.

Тим қаро кўзлар тикилмиш сувга айтиб арзи дил,  
Ё унинг кўзгусида бир моҳирёй ёрни кўпар.

Тонг шамоли сўрса ҳолин соchlаридан гоҳ ўпид,  
Оҳ уриб ундан йигит ёр шарпаси, васлин сўпар.

Ҳолига зимдан назар ташлаб дилим бўлди забун,  
Билмадим, ҳуши қаёқда, сурати бунда турар.

Қай париваш кўрмади пайваста қошлар ҳуснини,  
Дер Саида ишқ қадрин билмагани ишқ урар.

**1966**

**206**

\* \* \*

Далалардан мужда келар  
Шамолларнинг қанотида.  
Унда ёрим пахта терар,  
Пўлат зангор ғиротида.

Пўлат зангор ғиротини  
Боғлаб олсам сеҳрим билан.  
Чаманларнинг тароватин  
Олиб берай меҳрим билан.

Тонгги шабнам ҳўл қилибди  
Беқасам тўн енгларини.  
Ўзи доим сардор бўлиб  
Бошлаб юрар тенгларини.

Оқ олтиннинг гарди қўнмиш  
Пайваста ул қошларига.  
Дўппи тиксам суйиб-суйиб  
Киярмикан бошларига?!

Далалардан мужда келар  
Шамолларнинг қанотида.  
Унда ёрим пахта терар  
Пўлат зангор ғиротида.

1966

\*\*\*

206

\* \* \*

Бирорнинг тилидан сўзловчилар кўп,  
Мажлисдаги таклиф, нутқини ҳатто.  
Буларнинг билгани, ўргангани: хўп,  
Қўлбола тўтилар бирон «катта»га.

Минг шукр, яхши-ю ёмон сўзларим,  
Ютуқ-янглишларим менини фақат.  
Жавдираб боқмадим ўзга кўзларга,  
Буйруқ, манманликка йўқ менда тоқат.

Чучмал сўзга сахий эмасман унча,  
Ширин эшитилмас ҳар бир тўғри гап.  
Севиб, койиганим, сўкканим учун  
Тортган азобимга бир ўзим сабаб.

1966

207

## ДЕҢГИЗ БҮЙИДА

Даврлар, замонлар, асрлар балки  
Унинг тўлқинида йиғлайди сўзсиз.  
Унинг тўлқинида чайқалар изсиз  
Гўзаллар, гўдаклар, қасрлар балки.

Тўлқинлар олисга судрап нигоҳим,  
Гоҳи нола бўлиб, гоҳи куй бўлиб.  
Гоҳи кулги бўлиб, гоҳи ўй бўлиб,  
Тўлқинлар олисга судрап нигоҳим.

Қатраларга сингиб кетгандай мен ҳам  
Соҳилда тураман ҳайкалдай қотиб.  
Ҳиссим, хаёлимни бир дам йўқотиб,  
Қатраларга сингиб кетгандай мен ҳам.

Ҳушимга келтирас яна тўлқинлар  
Оёғимга суркаб оппоқ бошини.  
Оёғимга тўкиб ожиз ёшини,  
Ҳушимга келтирас яна тўлқинлар.

1966

\* \* \*

Итлар увиллайди, мушуклар нотинч,  
Шарпалар ғалати: сирли ва совуқ.  
Құноқда ётолмай питирлар товуқ,  
Нени бошлаб келар бу оқшом, бу кеч?!

Она-ер, азиз ер, дардингни олай,  
Қаеринг силасам тинчланар жонинг.  
Қаерда күпирмиш асабинг, қонинг,  
Айт-чи, қаерингга қулогим солай?

Гұдаклар күзининг қорачиғидан  
Кошкийди суғуриб олсан құрқувни.  
Қайтариб тинч тунни, ширин уйқуни,  
Бахт бўлиб порласам юлдуз чўғида.

Итлар увиллайди, мушуклар нотинч,  
Шарпалар ғалати: сирли ва совуқ.  
Құноқда ётолмай питирлар товуқ,  
Нени бошлаб келар бу оқшом, бу кеч?!

1966

\* \* \*

Мен на давлатдану, на баҳтдан камчил,  
На пулу майсабнинг қули, ошнаси.  
Менга чин дилингни, дилингни очгил,  
Мен ёлғондан холи сўзнинг ташнаси.

Шундай сўз айтгилки, қанот боғлайин,  
Танамдан арисин дард билан армон.  
Шунда сени ўзим бир ардоқлайки,  
Фақат сен гапирма, гапирма ёлғон.

Дилим меҳр тўла тиниқ бир чашма,  
Ҳали очилмаган минг бир кўзи бор.  
Сен шундай бир сўзни айтгил, адашма,  
Уни очадиган, ахир, сўзи бор.

Ипак ҳам бўламан, бўламан бўстон,  
Ҳузурбахш шабада, тикансиз бир гул.  
Яхши-ёмон кунда ягона дўстинг,  
Хулласи, сен бўлиб қоламан буткул.

Мен на давлатдану, на баҳтдан камчил,  
Табиат ранжитган на бирон хаста.  
Менга чин дилингни, дилингни очгил,  
Қошингта келдим мен ишқ, мөҳр истаб.

## ЎРОЛ ТАНСИҚБОЕВГА

Тоғлар қаршисида ҳайратдан мен лол,  
Бир сўлим ҳаводан яйради таним.  
Ҳатто эшитаман асалари бол —  
Ингиб гуллар ичра билмайди тиним.

Вужудимдан тортиб, ором ол, дейди,  
Бу не оҳанрабо, бу қандайин сир.  
О, ўзбек диёри, тенгинг бор қайда,  
Кўнглим, кўзим, ўйим — ҳаммаси асир!

Балки табиат ҳам бутун кўзи-ла  
Уз ҳуснига боқиб ўзи маҳлиё.  
Оёғим эркалаб сеҳри, нози-ла  
Муздек лаби билан ўпади гиёҳ.

Шудрингдан сиёҳу, минг хил ранг, бўёқ —  
Не майин сатрлар битилган бир хат.  
Ажиг ғазалмисол яқину йироқ  
Дилга қуйилади бўлиб муҳаббат.

1967

\* \* \*

Меҳнату ташвишдан бўлсам сал нарӣ  
Пучайиб қоламан ўзимга ўзим.  
Гӯё мен ҳамиша бир гужум узум,  
Фикрлар талайди мисоли ари.

Ором бермасинлар, майлига, бир дам.  
Майлига, сўрсинлар шарбат-қонимни.  
Пармалаб шеъримга қўйсин жонимни,  
Ахир меҳнат билан тирикдир одам.

1967

212

\* \* \*

Утган йилги пайванд кирди ҳосилга,  
Битди пўстидаги пиçoқ ўрни ҳам.  
Энди бир тан бўлиб чирманиб маҳкам,  
Хушбўй гулларини кўзкўзлар елга.

Ажратиб бўлмайди энди уларни,  
Қишини ҳам, ёзни ҳам кутади бирга.  
Кессангиз болтага бош тутар бирга,  
Бирга қўкаради, бирга қулайди.

Тирик етим қилиб ўғил-қизини  
Ажралиб кетсалар баъзан одамлар,  
Пайвандни эслайман мен шундай дамлар,  
Бир ўкинч кўзимга чиқади сизиб.

Наҳот бирга-бирга сурса-ю умр,  
Бегоналик турса соясин ташлаб...  
Пайванд гуркирайди кўзимда яшиаб,  
Бизда қонун шундай дегандай мағрур.

1967

213

## ШОИРНИ ЭСЛАБ

*Ғафур Гулом вафоти кунларидаги ёзилган*

О, замин, биз сенга кўп қилдик таъзим,  
Она деб атадик, улуғладик бот.  
Аммо неъматларинг ҳамма, ҳаммаси  
Танамиздан юлингган парча-ку, ҳайҳот!

Бу нафис чечаклар, йўқ, гуллар эмас,  
Завқсиз ҳувиллади боққанда қалбим.  
Булар қатларингда бенафас, бесас,  
Кулги қотган қанча гўзаллар лаби.

Ирмоқлар куйлаган сеҳрли қўшиқ,  
Ғунча лабидаги нафис, ним кулги,  
Балки, Алишерга армон бўлган ишқ,  
Дилда қолиб кетган ғазали балки.

Беҳзод қаламининг бўёқларини  
Шимириб, борлиққа пуркаганмисан?!  
Шабнам қилиб майса қиёқларига  
Инсон кўз ёшини суркаганмисан?!

Яратиб, қайтариб олмоқлик нечун,  
Нечун мурғак дилга оламдек яра?  
Қани бу гулшангага у ошиги чин,  
Бугун қалбим бўм-бўш бу ранглар аро.

Дилимни ўсмадек эзғилаб обдан,  
Хин огулларига қилгунча бўёқ,—  
Шоири замонни топмоқ-чун бир дам,  
Майли, вужудимни машъал қилиб ёқ.

Туғрудан яралган бу чаманзорда  
Беҳушу ҳайронман, ҳайронман бугун...

\* \* \*

Хўрсинма, азизим, хўрсинма сира,  
Сени хомуш, ғамгин кўргандан кўра  
Ўзимни оловга тутганим осон.  
Жилмайгин, жилмайиб менга бир қара,  
Ахир кулиш учун яралган инсон.

Енгилма, азизим, енгилма фақат,  
Мағлубни кўришга йўқ менда тоқат.  
Тик тутиб юришга яралган-ку бош,  
Дилимни зимистон ўрайди қат-қат,  
Агар кўзларингда кўрмасам оташ.

Лоқайд бўлма сира, лоқайдга мен ёв,  
Оlam тақдирига боқсанг бепарво,  
Одамга қолмаса агар керагинг  
Бир ўсиқ тирноқдай беҳис, беаёв,  
Юлиб ирғитаман дилдан, юракдан.

1967

\* \* \*

Дутор йиғлар эмиш, ҳар пардасида  
Елларга юз тутган чоғларин қўмсаб.  
Баъзан севишганлар ўйиб танасин  
Очган жароҳати — доғларин қўмсаб.  
Бир вақт шохларини яшнатган барглар —  
Шивири торларин куйлатар эмиши.  
Шундан у инсонни вафога чорлаб,  
Софинчга ўргатиб ўйлатар эмиш.

*1967*

## С О Ф И Н И Ш

Шовиллаган яшил, чексиз ўрмонлар,  
Ҳуснингизга сира келтирмасман шак.  
Лекин, не қилайки, олисдан чорлар  
Райҳонлар ҳид сочган торгина эшик.

Кўнглим ҳордиқ тусаб интилган эдим,  
Ёмғир ювгаи ўтлар ҳидига муштоқ.  
Саланглаб юришга кўникољмай, дим,  
Дил худди чумоли кўтарган ушоқ.

Тиниқ барглар елда шивирлаб аста  
Сукутингиз бузса, бор ажиб гашти.  
Аммо мен юраман соғинчдан хаста,  
Биз томонда ҳозир мева ғарқ пишди.

Бу тиниқ яшиллик, бу кўрку жамол  
Қўз-кўзлаб очади жилвали бағрин.  
Кечиринг, ўрмонлар, келмасин малол,  
Йўқ, менинг тургим йўқ, тутманг баримни.

Офтоб қиздирмоқда ҳозир юртимда,  
Лекин туни салқин, роҳати бадан.  
Бу оромни фақат кўп ташна юриб,  
Муздек айрон ичса билади одам.

Не-не шоҳ сатрлар туғилган бунда,  
Аммо илҳом мени қилиб қўйди тарқ,---  
Қўлга ўрганмаган ҳуркак оҳудек  
Тартибу столдан чўчиса керак.

Ахир мен аёлман, бир уй бекаси,  
Сатрлар етилса қозон бошида.  
Қофозга тушади яrim кечаси,  
Үйқуда жилмайган қизим қошида.

Иссиқдан бўшашган мисоли денгиз  
Жимгина уфққа узатмиш оёқ.  
Сокинлиқда яна чиройи тенгсиз,  
Кўм-кўк сув, кўм-кўк сув, сув, сув ҳамма ёқ.

Соҳилда яйрашар қувноқ болалар,  
Аёллар офтобга тутар баданин.  
Лекин мени чорлар олис далалар,  
Олов пуркагувчи қуёшнинг дами.

Гарчи денгизи йўқ, дарёлари бор,  
Қирқ кокил қизлардек мажнунтоллари.  
Меваси узилмас қиши, ёзу баҳор,  
Нектарга зориқмас боларилари.

Офтобдан бўрсилдоқ ерга сув урсам,  
Тупроқ ҳиди билан ҳаво омихта.  
Тонгда шабнам гуллари баргини ювса,  
Қатраси бўлади шеъримга нуқта.

Бир кунда шунчалик соғинч байтлари,  
Бир кунда шунчалик дард тўлмиш дилга.  
Кошки қанот боғлаб шундай пайтлари  
Одамзод чирмашиб учолса елга.

Мовий кўз бекалар, мени кечиринг,  
Лавр ҳиди тутган боршингиз жуда  
Танамни яйратди, яйрадим ичиб,  
Лекин бошқа истак кўнгил мавжида.

Зира, зирк солинган хушбўй паловнинг  
Бир чимдими ҳозир қилди хумори.  
Милдираб қайнаса шўрва оловда,  
Жамбилларни солсанг минг дардга дори.

Шовиллаган яшил, чексиз ўрмонлар,  
Хуснингизга сира келтирмасман шак.  
Лекин, не қилайки, олисдан чорлар  
Райхонлар ҳид сочган торгина эшик.

Кеча кузатишган дўсту қадрдон,  
Ногаҳон учратиб қилурлар ҳайрат.  
Баъзида ўзим ҳам ўзимдан ҳайрон,  
Гоҳи ғалатиман, ростдан ҳам ғалат.

\* \* \*

Баъзан табиатнинг сехри-ла оқиб,  
Олис-олисларга ташлайсан нигоҳ.  
Ранглар жилваланар қалбингни ёқиб,  
Ранглар жилваланиб ёнади ногоҳ.

Гўзаллик сирини яширгансимон  
Тоғлар парда тутиб ҳарир тумандан.  
Ажиб кўринади ҳаво, сув, осмон,  
Ажиб кўринади ўша томонда.

Шунақа чиройли кўринар йироқ,  
Шошилма, азизим, бунча энтикма.  
Аввал оёғингнинг остига бир боқ,  
Бирон гулни янчиб ўтмадингмиカン?..

*1967*

Кўп осуда эди бу олам бир вақт,  
Денгиз ҳам ёстаниб ухлар эди жим.  
На юлдуз бор эди ва на мунажжим,  
Беозор табиат мудрарди карахт.

Шунда дардинг билан мен бўлдим пайдо,  
Дардим сукунатни чилпарчин қилди.  
Ишқдан офтоб ясаб осмонга илди,  
Ўзим яратдиму ўзимман шайдо.

Ипак нурларига чирмасиб шунда,  
Оlamга ёйилдим сени ахтариб.  
Кундуз тополмасдан югуриб, ҳориб,  
Кўз бўлиб осмонга сочилидим тунда.

Сарсари изимдан увлади шамол,  
Тўлқин пайдо бўлди талпинишимдан.  
Олов нусха олди дил ёнишидан,  
Ҳаёт яратардим изларкан висол.

Қарагин, ҳаммаси фақат сен учун,  
Айт, яна неларни қиласан ҳавас.  
Дилда ёниш бўлса, меҳр бўлса бас,  
Ҳамма, ҳаммасига етади кучим.

1967.

\* \* \*

Бир дўст азасидан келдим эзилиб,  
У тушган қабрдек тор бўлди дунё.  
Ақлу ҳисосим хаста, қолган безиллаб,  
Оҳ, кошки бўлсайди дердим бу рўё.  
Бошқа бир танишим тўйга айтибди,  
Ташлаб ҳам кетибди таклиф қофозин.  
Гўё оёғимнинг остида шу пайт  
Ликиллаб турарди улкан тарози.  
Гўё дўзах, жаннат ўртасида мен,—  
Бири куйдиради қилиб жингиртоб.  
Бошқасин шодлиги бўлмаса эди,  
Бу ўт, балки мени қиласди хароб.  
Шамол деразамни очди-ю, аста  
Сузиб кирди майнин бир куй ўйимга.  
Қўшним боласига айтарди алла,  
Бу куй юрагимга, борлиқ, ўйимга  
Ҳузурбахш офтобдай жимиirlаб сингди.  
Нафис бир меҳрга, яшаш ишқига  
Юрак лим-лим тўлди, чўнг тарозининг  
Шодликлар тўпланган палласи енгди.  
Яхшики, оламда кўникиш бахти,  
Ўлғайиш, туғилиш соатлари бор...

1967

223



Сунбула сувлардан ғуборни олди,  
Кўксидা тошлар ҳам ярақлаб кулиб.  
Энди тонг уйқунинг мафтуни бўлиб  
Ошиқлар бошида туролмай қолди.

Деразам олдида дук-дук қадамлар,  
Шошилинч қадамлар, тинимсиз, дадил.  
Ритмидан қофия териб олар дил,  
Тонгни бошлаб ўтар азиз одамлар.

*1967*

## ЎГИРЛАНГАН ВАҚТ

Ҳисобига етолмай қоламан баъзан  
Қанча ўғирланган умрим-вақтимнинг.  
Қанча ёзилмаган шеърим-бахтимнинг  
Ҳисобига етолмай қоламан баъзан.  
Ҳиссиз, дабдабали бекорчи нутқлар,  
Жадвалини бузган автобус ҳатто,  
Имиллаган, бегам сотувчидан то —  
Жирканч ифволарни тинглаган вақтлар,  
Оҳ вақтлар, ем бўлган шўрлик вақтлар,  
Зиммангизда қанча қўшиқлар қолди,  
Изҳор этилмаган дил-ишқлар қолди.  
Айтилмаган қанча керакли гаплар,  
Гоҳ битган, битмаган, гоҳ чала боблар,  
Үқилмаган қанча китоблар қолди.  
Тўқилмаган қанча атласу шоҳи,  
Ишланмаган қанча сурат, станок,  
Келажакнинг олис кетган нигоҳи  
Манзилига баъзан кечикиб борган юк —  
Зиммангизда қолди изсиз вақтлар,  
Оҳ вақтлар, ем бўлган эсиз вақтлар.  
Жазога тортамиз мол ўғрисини,  
Бракка бошлаймиз бешафқат ҳужум.  
Лекин, нимагадир, гапнинг тўғриси,  
Сизни ўғирлатиб, олдириб қўйиб,  
Ҳатто пайқамаймиз ё турамиз жим,  
Оҳ вақтлар, ем бўлган шўрлик вақтлар.

1967

15—859

225

Ниҳоллар шохини әгмини момиқ қор,  
Аммо оёқларин қучиб она-ер,  
Иссиқ лаби билан ўпид аста дер:  
Сабр қил, сабр қил, келади баҳор.

Инсонлар меҳридан бағримда ҳаёт,  
Қуёш шуъласини шимирган қатим.  
Қайноқ сийнамдаги пок мұхаббатим  
Баҳорга етказур сени саломат.

Уч ой эринмасдан шивирлар шундай,  
Шундай әритади қору музларни.  
Аммо, одамлар бор, тирик одамлар,  
Бемаврид қаритар не-не қизларни.

1967

Шеърларим, келтиргил киприк, қошимга  
Ўзим юролмаган йўллар гардини.  
Бешафқат юклайман мургак бошингга  
Юрагимнинг бутун армон, дардини.

Онам қиз тұғдим деб қилмади афсус,  
Таъна ёғилмади ёхуд онамга.  
Палақмон тошидек олти мушфиқ қиз  
Отилиб кетмадик олти томонга.

На тоға, амаки, на хола, амма,  
Бирон-бир жигар йўқ сўрагундек ҳол.  
Ёлғиз баҳт — онамнинг бағрида аммо,  
Беозор улғайдик олтита ниҳол.

Отам курашларда излаган толе,  
Бизни оғушига олди беминнат.  
Доктор, ўқитувчи, бири олимса,  
Қаминани яна юрт қилди иззат.

Бу хилда тақдирлар менинг элимга,  
Менинг партиямга, Ватанимга хос.

Ҳа, менинг партиям ушлаб қўллардан  
Зулму зулматлардан этгучи халос.

Оддий ҳақиқат бор минг бўёқдан соз,  
Минг марта «яшасин» дегандан афзал.  
Донолик қидирмай ана шуни ёз,  
Дил қўшилган таъзим мақтовдан гўзал.

1967

\* \* \*

Асфальтни қоқ ёриб унибди гиёҳ,  
Йўловчи кўзини тортар дам-бадам.  
Ўтган ҳам, кетган ҳам ташлайди нигоҳ,  
Бағри тош ҳам унга қўймайди қадам.

Бўстонда майсани жиз этмай босган —  
Юракка бу ерда тўлади шафқат.  
Шунчаки кўкатмас, асфальтда ўсган,  
Бу буюк интилиш, бу ҳаёт, қудрат.

1967

-  
229

\* \* \*

Осмон ёришмоқда ёмғирдан кейинч,  
Гулларнинг лабида ловиллар шабнам.  
Қалдирғоч жой излар қурмоқ бўлиб ин,  
Пайваста қош каби қанотлари нам,

Баргларга илинган ғуборни ювиб,  
Қўз ёшдек томчилар ерга тўкилар.  
Кимдир қарсак чалди чумчуқни қувиб,  
Ранг олган голоснинг шохи силкинар.

Тўйган чақалоқнинг юзиdek хушранг,  
Дудогидек хушбўй бўрсилдоқ ғунча.  
Кеча гулкосадан мўралаб аранг,  
Худди шу голосдек эди тугунча.

Баҳор ранг улашиб, хушнудлик ташиб,  
Менинг ҳовлимга ҳам бўлибди қўноқ.  
Ва лекин васлига тўйдирмай, шошиб,  
Фироқ тушган ишқдек кетибди йироқ.

Лабларининг ҳусни қолибди гулда,  
Осмонга кўчибди кўзин ёлқини.  
Жимиган ҳисларни қўзғатиб дилда,  
Шукрки, бенасиб қўймади мени.

1967

230

## АНДИЖОН

Табиат шунчалар улкан бу ҳисни,  
Билмадим, қаердан қилибди ато.  
Номингни қидириб кўёзим жавдирап,  
Газета ўқиган пайтимда ҳатто.

Суратлар ичидан сен, шаҳаримни  
Иzlайман истагу ҳаяжон билан.  
Суратлар ичидан ҳамшаҳаримни  
Иzlайман термилиб меҳру жон билан.

Гарчи Ватанимнинг ҳар жойи азиз,  
Ҳар жойи туғилган шаҳримдай дилдор.  
Лекин, Андижоним, сенинг меҳрингда  
Яна ҳам гўзалроқ алланарса бор.

Балки зеҳим кўзин очган мактабим,  
Болалигим ўтган кўчаларингми?  
Балки юрагимга муҳаббат қўйган.  
Дилда пинҳон қолган кечаларингми?

Балки қариндошдан афзал, аҳилроқ  
Маҳаллам, қадрдон қўшниларимдир?!  
Балки болаликда кўча тўлдириб  
Параадда айтилган қўшиқларимдир?!

Балки юрак тафтин машъала қилиб  
Адиরда порлаган чироқларингдир?!

Балки пахтакорнинг кўз нури сингган  
Юлдуздек чақнаган чаноқларингдир?!

Балки кўнгиллари кўзгудек тиниқ,  
Меҳнаткаш, камтарин, тантни одамлар  
Сеҳрлаб олганми қалбимни бутун  
Даланг, боғларингни кезганим дамлар?

Ишқилиб, ҳаммаси қалбимга яқин,  
Бағрига тортади оҳанрабодек.  
Андижоним, десам жоним яйратиб  
Эркалаб ўтасан тонгги сабодек.

Ҳар ишда карвоннинг олдида кўрсам,  
Фаҳрдан осмонга тегиб юраман.  
Озгина чекинсанг, орқада қолсанг,  
Ўкиниб бошимни эгиб юраман.

Лекин андижонлик ерга қаратмас,  
Даврада сўзини бермаган ҳеч вақт.  
Азамат, ўз сўзли ҳамشاҳарларим,  
Сизга ҳамشاҳарлигим менинг учун баҳт.

Табиат шунчалар улкан бу ҳисни  
Билмадим, қаердан қилибди ато.  
Номингни қидириб кўзим жавдирар,  
Газета ўқиган пайтимда ҳатто.

1968

\* \* \*

Баҳор шамоли эсар,  
Ноз уйқуда дов-дараҳт.  
Баҳор шамоли эсар,  
Новдалар ҳали караҳт.  
Яланғоч бутоқларга  
Қўйиб майин юзини.  
Шивирлаб қулогига,  
Айтарми дил сўзини?!  
Баъзан қаҳрига олиб,  
Чайқалтириб ўтади.  
Гоҳи силаб, эркалаб,  
Талтайтириб ўтади.  
Гоҳи араз қилгандай  
Жимиб кетади бирдан.  
Яна елиб пайдар-пай  
Қайтади дала, қирдан.  
Ором бермайди бир зум,  
Гоҳ ишқ сўзлаб, гоҳ эртак,—  
Новдаларда табассум  
Қилмагунича куртақ,

1968

233

## ЁМОН ҚИЛИҚ

(Болаларга)

Құнғироқ тұгмасини  
Әркін босди-ю, қочди.  
Озгина ۋاڭтдан кейин  
Бир қампир эшик очди.

Аланглади атрофга,  
Ғудранди койиниб.  
Үнга күп малол келди  
Әркиннинг бу «ўйини».

Ҳеч нарса билмагандек  
Олисда турар Эркин.  
Сұнг бошқа дарвозанинг  
Олдига борар секин.

Яна босар тұгмани,  
Ұзи ғизиллаб қочар.  
Гоҳида ёш, гоҳ қари  
Албатта эшик очар.

Қарайдики, ҳеч ким йүқ,  
Кириб кетади гапсиз.  
Лекин, билар, бу ишни  
Қылган бирон одобсиз.

1968

234

\* \* \*

Сени менга ёмон деса ким,  
Кечирмайман бир умр уни!  
Мени сенга ёмон деса ким,  
Қаро бўлсин рўзгори, куни.  
Дилим андаккина ғашланиб,  
Чимирилиб олганим учун,  
Дилинг андаккина ғашланиб,  
Бир дам қовоқ солганинг учун  
Кечирмайман уларни ҳеч вақт!  
Улар севги кушандалари,  
Улар эгов умрга, бахтга,  
Кечирмайман ўшандайларни,  
Кечирмайман,  
кечирмайман ҳеч!

1968

235

Не қилай, дунёнинг ташвишлари кўп,  
Не қилай, барига етмайди вақтим.  
Қўйгин гиналарни, дея қолгин хўй,  
Елғиз ўзингсан-ку шодлигим, баҳтим.  
Эркалаб кузатиб, эркалаб кутиб,  
Нозу тавозе-ла чой тутиб қўлда —  
Яшашга фурсат йўқ, аммо столда  
Қарагин, ярақлаб турибди кулдан.  
Чекма деёлмайман, етмайди кучин  
Ва лекин хаёлан уни ўчириб,  
Хонангни тутундан поклаш дардида  
Үйғоқ ўтираман сендан нарида.  
Хатинг бор ҳар қофоз бисотим менинг,  
Бегараз кўнгилни кафтда тутгандай,  
Ортмоқлаб ўтганман бўрондан уни.  
Иллар бу дардларни энди ютгандай.  
Ҳа, йиллар ўтмоқда қайрилмасдан ҳеч,  
Мен эса йўқолган шодликлар изин  
Ахтариш, қайтариш дарди-ла нотинч,  
Узайтмоқ бўламан умр тизгинин.  
Үйлар оташида бўлиб жизғанак,  
Тунларни тонгларга киприк бамисол —  
Ҳар хил мақом билан улайди юрак,  
Үйлар гирдобида мен хаста, беҳол.  
Аммо илғаб олар қулогим аниқ,  
Машинканг чиқиллар, бедорсан сен ҳам.

Эшик тирқишиндан бир чизиқ ёниб,  
Офтоб бўлиб кириб ёритар хонам.  
Машинканг чиқиллар, тўхтайди баъзан,  
Биламан, чекяпсан, чекяпсан улаб.  
Қошки очиб қўйса деб деразани,  
Камроқ чекса-чи, деб бўламан хуноб.  
Хонангни тутундан поклаш дардида  
Бедор ўтираман сендан нарида.

1968

## ЕР КЕЛАДИ

(Қўшиқ)

Андижоннинг сойи оқар ўйноқлаб, тошиб,  
Соҳилидан ёр келади биз томон шошиб.  
Соҳилида ёр кўринса биз томон шошиб,  
Келганида уйларимга тураг ярашиб.

Олислардан таниб олдим қадди-бўйини,  
Босолмайман юрагимнинг титроқ ўйинин.  
Илинаман хуш бўйини райҳон, гулларнинг,  
Элтгим келур ариқларнинг майин куйини.

Йигитларнинг ичидаги кўрки, сардори,  
Зулайҳодек бир умрга мен харидори.  
Сувлар соғдим салқин еллар берсии деб ором,  
Кипригим-ла териб олай йўллар губорин.

Узи экиб берган ўсма кўкарди қийғос,  
Қош-кўзимга қўйиб андак қилибман пардоз.  
Жўралари, гапга тутиб тўсманглар йўлин,  
Хаёлларим қачонлардан васлига пешвоз.

Андижоннинг сойи оқар ўйноқлаб, тошиб,  
Соҳилидан ёр келади биз томон шошиб.  
Соҳилида ёр кўринса биз томон шошиб,  
Келганида уйларимга тураг ярашиб.

1968

\* \* \*

Севдирган ҳам, бездирган ҳам тил,  
Баъзан бездиради севгани учун  
Меҳр-муҳаббатдан ёнса агар дил,  
Сўздан билинади тафтиниңг кучи.  
Совуққонлик билан ёзилган шеърдек  
Дилга киролмасдан қолса қофозда.  
Яхиси, маъқулдир ўтирганинг тек,  
Уша сўзларингни сақлаб оғизда.

1968

239

\* \* \*

Сув бўйида мажнунтол,  
Соч ёзган сулувмисол.  
Туширганми узугин,  
Термилиб сурар хаёл.

Ултиридим соясида,  
Багрида, қоясида.  
Ишқ дафтариҳ ўқидим  
Сувнинг ҳикоясидан.

Софинтирса юрагим,  
Висол бўлди тилагим.  
Қачон келар ёнимга  
Дилгинамниғ тираги.

Хеч кетмасин йироққа,  
Чидолмасман фироққа.  
Мажнунтолдек кутарман  
Келмагунча биз ёққа.

Сув бўйида мажнунтол,  
Соч ёзган сулувмисол.  
Туширганми узугин,  
Термилиб сурар хаёл.

1968

240

\* \* \*

Ақлим танибманки, миннатсиз бир баҳт,  
Миннатсиз умрни қиласман орзу.  
Кам-күстсиз ҳаётни этаман деб тахт,  
Танҳо ташвиш чексанг, дилим эзилар.

Иўқ, сира юк бўлмай, бўлайнин мадор,  
Токи равон бўлсин мен-ла йўлларинг.  
Йиқилсанг йиқилгум демасман зинҳор,  
Турғизмоққа чўзгум нозик қўлларим,  
Иўқ, сира юк бўлмай, бўлайнин мадор.

1968

\* \* \*

Субҳидам гулшанда ёр биздан нечун пинҳон кезар,  
Не хаёллардан танимда тўлғаниб минг жон кезар.

Куйидан ортиқ бу оламда ҳаловат топмадим,  
Гарчи васл уммиди йўқдир, ўртада ҳижрон кезар.

Майсаларда титраган шабнамча бўлди кўзларим,  
Ул тағофил бир авайлаб ўтмайин чандон кезар.

Ишқида мен шоҳ эрурман, у гадоси ўзганинг,  
Балки кўнглидан сўроқ айлаб ўзи ҳайрон кезар.

Наргису райҳону гуллар, таъзим айланг пойига,  
Бу Саида наздида бир соҳиби даврон кезар.

1968

\* \* \*

Ёмғир савалайди, аммо шошмайман,  
Томчи қуйилади киприкларимдан.  
Сув тошиб оқади кўприклардан  
Ёмғир савалайди, аммо шошмайман.

Табиат ювмоқда дов-дараҳтларни,  
Олам губорсиздек кўзимга шу дам.  
Бир енгил руҳ билан ташлайман қадам,  
Табиат ювмоқда дов-дараҳтларни.

Атрофда барқ урар тиниқлик, тинчлик,  
Ҳавода сузади бинафша ҳиди.  
Ишқилиб, бузмасин порохнинг дуди,  
Атрофда барқ урар тиниқлик, тинчлик.

Ёмғир савалайди, аммо шошмайман,  
Томчи қуйилади киприкларимдан.  
Сув тошиб оқади кўприклардан  
Ёмғир савалайди, аммо шошмайман.

1968

## ОЙМОМОЖОН, ОЙМОМО

— Оймоможон, оймомо,  
Кундуз нега оппоқсан  
Бувижоним сочидек?  
Тунда худди чироқсан  
Юлдузларнинг тожидек.  
Тилламисан, мисмисан  
Еки пахтадек момиқ!  
Айт-чи, бизга дўстмисан,  
Дўст бўлсанг, тургил ёниб.  
— Бувинг ухлатганида  
Кечқурун алла айтиб.  
Офтоб ҳам тоғ ортига  
Кетганда аста қайтиб,  
Деразангдан сочиб нур  
Мўралаган ўзимман.  
Қуёшнинг шуъласидир  
Ярқиратган юзимни.  
Гарчи сендан олисман,  
Аммо ўртоқман, дўстман.  
Ҳаммасини биласан  
Ақлли бўлиб ўссанг.  
— Гоҳ тандирдан узилган  
Думалоқ кулчам мисол.  
Гоҳ тишланган патириу  
Юзингда бордек асал,  
Ажойибсан, фалати.

Оймоможон, бер айтиб.  
Ер тўсиб қолганида  
Гоҳи бир ёнбошимни,  
Мени истаб қолма деб,  
Қўрсатаман бошимни.  
Яхиси, муаллиминг  
Гапирганда қулоқ сол.  
Қитобингда бор бари,  
Ҳаммасини ўқиб ол.  
Билимдон бўлиб ўссані,  
Гапимга солсанг қулоқ,  
Қосмонавт бўлиб бир кун,  
Менга бўласан қўноқ

1968

## ТА Н Б У Р

*Танбурчи Абдумута: Абдуллаевга*

Ҳислардан яралган бир нафис оләм,  
Бағрида мезондан енгилман ҳозир.  
Күз ёшдан тиникроқ баргдаги шабнам,  
Нафасдек узилар тупроқдан ҳовур.

Ҳокими мутлақдир бунда фақат қалб,  
Танамда қон эмас, югурмоқда нур.  
Салқын шаббодадек хаёл аллалар,  
Шаршара бошида қушлар чуғури.

Ой ҳам сеҳрланмиш терак учиды,  
Юлдузлар очмоқда осмон тилсимиин.  
Вужудимни олар оташ ичига,  
Бармоқлар титратган шу нозик симлар.  
Ҳокими мутлақдир бунда фақат қалб...

1968

\* \* \*

Бош эгиб тингласам бирон игвони,  
Силтаб ташламасам — ҳаром шу куним.  
Майли, бошлаб юрай доим ғавғони,  
Майли, хаёлларим билмасин қўним.

Меҳнатсиз бир тийин кирса уйимга,  
Эътиқод, имондан шу кун мен жудо.  
Бошқача яшаш ҳеч келмас ўйимга,  
Шу менинг жаннатим, шу менга худо.

Катта маъракага бўлмаса пулим,  
Чин дўст нон-чойимдан ўгирмас-ку юз?  
Шуни қадрласа кўксимда қўлим,  
Афзалроқ бахтим йўқ қилгани кўз-кўз.

Ораста бўлмаса уйим мабодо,  
Узр учун унга шеър ўқиб бергум.  
Шу кеч қалам, қоғоз учов пиёда,  
Мижжа қоқмай тонггача юрдик.

Куиларим шу тахлит ўтади чопиб,  
Шу тахлит бошлагум янгисини ҳам...

1968

Тинмай шитирлайди ҳовлида ҳазон,  
Чирт-чирт узилади сарғайган япроқ.  
Хаёлдан ўтади яқину йироқ,  
Дил худди муаллақ титраган мезон.

Куни кечагина ғуж-ғуж гуллардан  
Новдалар яшариб, яшнаб туради.  
Бағрида қуёшу шамол юрарди,  
Бир ғулув уйғотиб чеҳра, дилларда.

Хаёл олиб кетар яна олисга,  
Қотган куртакларга боқаман беҳуш.  
Үтган дамлар гүё туюлади туш,  
Хира суратмисол тушади эсга.

Атрофда куз кезар паришонхотир,  
Шумшайган дараҳтлар термилар сокин.  
Ненидир шивирлар, шивирлар лекин:  
«Афтидан, унутдинг, унутдинг, шоир.

Ахир шеър ишқида маъюс бўлмасдан  
Мисранг тўкилганми қоғозга равон?  
Айтгил-чи, қай бирин ёзгансан осон,  
Кўзу вужудингга хаёл тўлмасдан?

Үйчан новдамиизда ухлайди баҳор,  
Куртакни авайлаб, аллалаб аста.  
Кўзингга қўринсак гоҳ хомуш, хаста,  
Бир гўзал назмнинг иштиёқи бор.

Назмимиз битганда бўламиз гулгун...»  
Атрофда куз кезар паришонхотир,  
Унутма, унутма ҳеч қачон, шоир,  
Бир түғён олдидан жимжитлик ҳоким.

1968

\* \* \*

Майли гапирсинглар, қилсинглар иғво,  
Демак, жигларига тегар эканман.  
Фикру ўйларига бўлиб бир ғавғо,  
Санчилар эканман мисоли тикан.

Қоралик ин қўйган улар ичига,  
Гўё бир чақимчи, бекорчи қўшни.  
Мен қудуқ қазийман игна учидা,  
Бутун юрагимни сатримга қўшиб.

Биронни боламдек сўйиб, аядим,  
Биронни дилимда отамдек кўрдим.  
Кимнидир жеркидим, ёмон қарадим,  
Бироннинг ҳолини меҳр-ла сўрдим.

Шундай яшадим мен, шундай яшайман,  
Олов бўлиб ёнди бағримда юрак.  
Бу ўт — яхшиларнинг йўлин ёритиб,  
Ёмонни ёқмаса неучун керак?

1968

250

\* \* \*

Тўзғийди ўрикнинг гуллари тинмай,  
Қапалак мисоли учишар елда.  
Гоҳ ерга ёпишиб шамолдан, селдан,  
Оппоқ ёноғига суртадилар лой.  
Аммо шу ҳолда ҳам чирэйли, нафис,  
Гўё бир кулдиргич заминга қўнган.  
У мамнун ўзидан — ўрнида унган  
Чигитдан ғўрани қилгандайин ҳис.

1968

251

\* \* \*

Бир олма келади тўлқинда ўйнаб,  
Қирмизи ёноғи тортади нигоҳ.  
Тутолмасдан кимдир оқизоқ ўйнаб,  
Олис соҳилида балки урар оҳ.

Бўтана тўлқинлар кўмади баъзан,  
Аммо ёноғига юқмайди гарди.  
Йироқ тушиб борар тўлқинда сузиб,  
Кимнингдир армони, кимнингдир дарди.

Кимдир тутиб олар уни албатта,  
Тўлқинларга ёзив кучли қулочин.  
Ҳуснига суқланиб кўтарар кафтда.  
Эҳтимол, кутмоқда шундай бир лочин.

Балки бир тишлару отар тупроққа,  
Ўйлаб ҳам ўтирмас, кўрмас тушида.  
Аммо у лаҳзалик ўйиндан йироқ —  
Тушган бир кимсанинг пок ишқи ҳди.

1969

252

\* \* \*

Ишқ дарсида мени лол айлади Лайло тамом,  
Улки устозликда танҳо, мен эдим хатсиз авом.

Чарх зайларнинг ҳама хил шевасидан очди сўз,  
Сўнг деди: умримни энди сен ўзинг эткур давом.

Билмадим, бу илтифотми ёки душманнинг иши,  
Неки кўйга солса солди мени шу ўтли калом.

Е ақл солди бошима ёки олди борини,  
Ичкизисб ашки қўшилган бодасидан битта жом.

Қалб ҳазинанг менга бўлсун, тақдирингни олмагум,  
Минг шукр, ёр васлидан обод уйим ҳар субҳу шом.

Посбон бўлсин Саида бу тиниқ дил мулкига,  
Бўлмасин нопок пойидан покиза гулзор ҳаром.

1969

\* \* \*

Сал нарсага қасам ичмоқлик нега,  
Қаердан бу заиф, бу ожиз журъат?  
Йўқ, бундай одамлар ёқмайди менга,  
Бебурдликдан шундай қилганлар одат.

Алишмайман бўлса олтину олмос,  
Шундоққина айтган битта сўзимга.  
Рост сўзнинг ҳеч қачон баҳоси бўлмас,  
Нечоғлик ҳақлиги аён ўзимга.

Елгиз бир имону битта эътиқод,  
Ватан, халқ олдида эгажакман бош.  
Зарур бўлиб қолса қилмоқ қасамёд,  
Қасам ичмоққа шунда бераман бардош.

1969

254

\* \* \*

Ой юзини аста чулғади булут,  
Үчди теракларнинг танга чамани.  
Ноҳуш бир ғашликка ташлаб сен мени  
Наҳотки бутунлай қилолмадинг унут?

Ой-ку, шўнгигиб чиқар булут остидан,  
Коинот беланар қайтадан нурга.  
Севгисиз дил эса бошлайди гўрга,  
Наҳот, сен умримнинг қолдинг қасдида?!

1969

265

\* \* \*

Сенга совуқ бир сўз айтгим келарми,  
Хотирангни қилгим келарми мажруҳ?!  
Озор етказмоқни кўнглим тиларми,  
Қалбимда ғолибми ё қувғинди руҳ?!

Мўйқалам олмаган ранглар кўп ҳали,  
Қоғозга тушмаган нафис ҳислар ҳам.  
Ифода тополмай уни айтгали  
Юзи қора бўлиб турибди қалам.

Сўзларга минг жило берган эҳтирос  
Қурғоққа дуч келган ирмоқдек тинди.  
Илк шеърларим эслаб, титкилаб қоғоз  
Уларни излайман ўзим ҳам энди.

Кунларим ўтганда сенсиз, қулгусиз,  
Азалий маккор ишқ қўйганда туртиб.  
Кўп гапларни сенга айтганман унсиз,  
Жимжит кечаларда танҳо ўй суриб.

Шу совуқ юлдузлар берса гувоҳлик,  
Еллар тилга кириб шивирласа, оҳ,  
У дардларни унутиб мангумангуга,  
Бахтнинг боқийлигига бўлардим гувоҳ.

1969

256

\* \* \*

Қуюқ киприкларга қўнгандек уйқу  
Шаҳар узра секин тун чўкди вазмин.  
Энди чироқлардан тўкилган ёғду  
Маъюс сийпалайди йўловчи изин.

Яна Зуҳро чиқди кошонасига,  
Қўзида қотган ёш, лабида кулги.  
Тож қилиб тақсам дер бирор бошига,  
Бирорга бир чақа ўтмас, қалбаки

Тунни тонг қувлади, юлдузни — қуёш,  
Шабнам ҳам оҳиста ўчди бир ёниб.  
Гуллар сергакланиб кўтардилар бош,  
Мусича патини тарап қувониб.

Бу сўлим сабоҳда нелар кечдийғин,  
Ўйлайман, хайратда термиламан жим.  
Неча юлдуз ёниб, нечта ўчдийкан?..  
Ўйламаган маъқул, маъқулдир балким...

1969

Қим қўлига олса ҳам шарҳи дилим сўзлар дутор,  
Жон қатида асраган сиримни айлар ошкор.

Узга кўнглин овламоққа достонимни очур,  
Гоҳ қулиб айтар яна, гоҳида йиглаб зор-зор.

Ҳисларимдан парда боғлаб олгани етмасмиди,  
Сочларимдан ҳам яна ул бераҳм боғлабди тор.

Бор вужудим титратиб ишқ аҳлидан таҳсин олур,  
Бир асиридан нотавон озодлигим кўп душвор.

Соч-торим тирноғидан минг узилса розиман,  
Бир қўлига олса-ю, бир бор юзига босса ёр.

Ишқ даштида, Саида, танҳо кезарман демагил,  
Ҳар тўкисни тингласанг, кўнглида бир армони бор.

1970

\* \* \*

Туни билан сени ўйладим,  
Тушларингга кирмоқчи бўлиб,  
Ўйларингда юрмоқчи бўлиб  
Туни билан сени ўйладим.  
Ё чимирилдинг, сескандинг ёки,  
Ё хўрсиниб аста жилмайдинг.  
Кирган бўлсам тушингга кошки,  
Кирганимни ўзим билсайдим...  
Туни билан сени ўйладим.

1970

250

## ЛАЙЛАҚ ҚИЗИҚ ҚУШ ЭКАН

Лайлакка маза экан,  
Одати қизиқ экан.  
Ез бўлса учиб келар,  
Қиши бўлса кўчиб кетар.

Чинор шохига ини  
Қолаверар ҳувиллаб.  
Қишида шамол гувиллаб  
Қорга кўмади уни.

Бўлса агар қанотим  
Ва ёки учқур отим,  
Зумда кезсам оламни,  
Лекин уйим, даламни  
Сира ташлаб кетмасдим.  
Бевафолик этмасдим.

Яланғоч куртакларни  
Уйғотгунича қуёш,  
Тинглаб қиши эртакларин  
Берардим чидам, бардош.

Юртимнинг тўрт фасли соз,  
Биридан бири гўзал.  
Бегона эл ёзидан  
Ўзимизнинг қиши афзал.

Гарчи лайлакка маза,  
Одати кўп bemaza.

Ҳеч элда йўқ қўними,  
Йўқ умрининг унуми.  
Мен одамман, қушмасман,  
Ҳеч унга ўхшамасман.

1970

\* \* \*

Инсофли бўл, дейди кексалар,  
Ҳаддан ошиб кетса агарда бирор.  
Аввал тушунмасдим шундай десалар,  
Энди эзгуликнинг буюклигига,  
Емондан яхшининг суюклигига,  
Назаримда, мана шу битта сўз гаров.  
Шу сўзсиз етармиди дунё шу ёшга,  
Одамзод шунчалик улғаярмиди?!  
Муҳаббат ё ғазаб тўлиб оташга,  
Виждон деган нарса тўлғанармиди?!  
Қимдан эшийтмайин бу қутлуғ сўзни,  
Қалбидан қалбимга оқсан каби нур.  
Осмонга бир устун қўйилганидек,  
Оlam кенгайгандек қиласман ҳузур.

1970

■ ■ ■

*Шоира сингилларимга*

Куни кечагина шеър ёзмоқ учун  
Офтобни қувгандай тунни кутардим.  
Оқшом кўрсатолмай ҳокимлик кучин,  
Менинг кўзларимдан бедор ўтарди.  
Кичрайиб сингирди қорачиғимга,  
Қоғозга тушгунча чекиб минг заҳмат.  
Ё қўниб қаламнинг олмос учига,  
Шеър бўлиб қалбимдан тингларди раҳмат.  
Бугун у келади ғолибона, шод,  
Кипригимни силар юмшоқ қўллари.  
Иўқ, тегма кўзимга, тегмагил ҳайҳот,  
Кошки соchlаримдан ўтса йўлларнинг...  
У энди бўйсумас, чекинмас нари,  
Қалам учига ҳам қурмайди тилсим.  
Сўзсиз қичқиради мудроқ назарим:  
Иўқ, сира бўлмасман, бўлмасман таслим.  
Гулчеҳралар бўлиб қувгум ғафлатни,  
Ойдин бўлиб тунлар тўкарман илҳом.  
Дунёдек бедорман, бедорман ҳар вақт,  
Биринчи севгидек соф ва навқирон.  
Иўқ, сира бўлмасман, бўлмасман таслим.

1970

Олам гулга тўлди яна бу фасл,  
 Кунлар мана шундай, шу тарзда оқар.  
 Сувсиз ерларда ҳам бир мижжа қоқар  
 Капалак умридек ўтлар муттасил.

Қабрлар узра ҳам сокин яшиллик,  
 Бу ерга келгани беролмасдим тоб.  
 Бунда кўз ёшларга айтилмас жавоб,  
 На дийдор кўришга бор бирон эшик.

Хотиржам эдим-ку, мен ахир сендан,  
 Гулдек сўлишингни қайдан билайн.  
 Кўргим келса энди нима қилайнин,  
 Хурсанд қилганмидим, шодмидинг мендан?!

Бугун сатрларим маҳзун, бағри хун,  
 Изтироб, қийноқда туғилган ўйлар.  
 Аёлсиз ҳувиллаб қолганда уйлар,  
 Сўз борми гўдагин овутмоқ учун.

Муҳаббат ёритган уйда ҳам шунча —  
 Бемаврид, бемаҳал ўчарми чироқ.  
 Яқин йўллар бирдан тушарми йироқ,  
 Ногаҳон очилмай сўларми ғунча?!

Келинлик либосинг кир бўлган эмас,  
Қай қўлда ушлайнин, қай кўзда боқай.  
Армон, армон ўти бағримни ёқар,  
Ҳамдард бўлолмайин қолдим бир нафас

Иигирманчи аср, доктор бор, дебман,  
Faфлатда қўймаса эди эътиқод.  
Учиб бормасмидим чиқариб қанот,  
Бошингда парвона бўлмасмидим мен!

Ҳамон қулоғимда онам йифиси,  
Ўлгунча чиқарми бу жондан ўтинг.  
Субҳидам елидек ҳилпираб ўтдинг,  
Қайси гулзорларда қолдийкан исинг?

Билмайман, шабнамдек қайларга учдинг,  
Хайр-маъзур қани, доғда қолдим мен.  
Тақдирдан бир умр юлиб олдим мен,  
Сен учун шеъримнинг умрига ўлчаб.

1970

## МАШИНКА

Жонсиз, ҳиссиз, муздек темир бўлмасанг  
Сўзлар ҳароратидан эриб кетардинг.  
Бўйтонлар ёзганда, билмам, нетардинг  
Жонсиз, ҳиссиз, муздек темир бўлмасанг?

Шақир-шуқур, тинмас бу овоз тун-кун,  
Осмону заминда сўзлар қуюни.  
Бири чулдираса ҳиссиз қуюниб,  
Бири тарагади офтобдек майин.

Шақир-шуқур, тинмас бу овоз тун-кун,  
Газета, китоблар сонсиз лашкари.  
Бирида инсоннинг уммон ашклари,  
Бири шошар табассум бўлмоқлик учун.

Яхши ҳам темирсан муздек ва жонсиз...

1970

## ДАРЁ БУИИДА

Бир ёнда чархпалак айланар секин,  
Қўзалар сув тўкар ёғоч ариқقا.  
Бир томонда мотор патиллар якка,  
Дарёни шимириб суғорар экин.

Боболарнинг ўткир ва лекин содда  
Зеҳнига сукутда мен бўлиб мафтун.  
Нафасига қулоқ солсам бугуннинг:  
Шиддаткор, талабчан, сезгир гоятда.

*1970*

Ер узра қўнди оқшом,  
Ой шуъласи бир майин.  
Кел, оппоғим, кел, эркам,  
Мен сени аллалайин.

Дудоғинг гулдан хушбўй,  
Юзларинг ундан хушрўй.  
Кел, оппоғим, бағримга  
Жажжи бошгинангни қўй.

Товуқ ухлар қўноқда,  
Шамол тинган бутоқда.  
Ўт-ўланлар жимгина  
Ором олар ўтлоқда.

Юлдуз чарақлаяпти,  
Ой ҳам ярақлаяпти.  
Қизча ухладими, деб,  
Мендан сўроқлаяпти.

Ер узра қўнди оқшом,  
Ой шуъласи бир майин.  
Кел, оппоғим, кел, эркам,  
Мен сени аллалайин.

\* \* \*

Нечоғлиқ маъсумдир гўдак чеҳраси,  
Ҳали гард юқмаган покиза кўнгил.  
Хўмрайсанг қўрқади, кулади кулсанг,  
Офтоб ва шабнамда ювилган бир гул.  
У шундоқ туғилди, мурғак дилида  
На гина-кудурат, на ёвуз армон.  
Улғайгач, ким бўлар юрту элида  
Яхшилик йўлида бўларми дармон?!  
Ҳозир у қийқириб кўнгил хушлайди,  
Суюкли, ардоқли ҳозир нечоғлиқ.  
Уни ким кузатар, ким қаршилайди,  
Бундан кейингиси шуларга боғлиқ.

1970

200

\* \* \*

Қария ақлидек кузнинг осмони,  
Япроқлар қуюни хотирасидек.  
Гүё охирлатиб баҳор достонин,  
Узи қайлардадир ўтириби тек.  
Гавжум соҳиллар ҳам бугун тинч, маъюс,  
Офтобдан сарғаймиш майсалар учи.  
Атрофга ўт қўйиб юборгандек куз,  
Назаримда ёнар дараҳтлар ичи.  
Таланган карвондек боғлар ҳам ғариб,  
Муздек еллар энди уларга ҳамдам.  
Гүё вужудимда руҳим ҳам ҳориб,  
Сўроққа тутади мени ушбу дам.  
Баҳор эсга тушар — илк муҳаббатинг,  
Имлаб адаштирган камалак излар...  
Энди улар сунбула сувидек тинган,  
Ҳисобот сўрайди улғайган ҳислар.  
Атрофда куз кезар ўйчан ва сокин,  
Умрингга бир назар этмоққа қистар.  
Хазон ёмғирида кезаман секин,  
Ҳаётимда бир чўғ, бир нурни истаб.

1970

Тиним йўқ, қўним йўқ бу оламда ҳеч,  
Тиним йўқ, қўним йўқ еру самода.  
Тиним йўқ менда ҳам на эрта, на кеч,  
Кунлардан гоҳ шодман, гоҳида доғда.

Баъзида чиндан ҳам бир глобусдеқ  
Жаҳон жой бўлади қорачигимга.  
Баъзан Туполевнинг хаёлларидек  
Оташин бир қудрат қалқир ичимда.

Хаёлни тутгувчи соқчилар қайдা,  
Хаёл билганмикан ҳеч қачон сарҳад?  
Ишим бор ҳар юртда ва ҳамма жойда,  
Менга одам бўлса бўлгани фақат.

Одам бўлса фақат меҳригиёли,  
Кийгани зарми ё жулдор жандами.  
Орзуда имлаган тотли иқболдек  
Лабига қўндириб ўтсам хандани.

Одам бўлса фақат меҳригиёли,  
Ёвузликка исён бўлиб яшаеа.

Наврўзги бир тутам субҳ шамолидек  
Юзу кўзларига руҳ бағишиласам.

Ҳисларга на дину на тиллар тўсиқ,  
Урфу одатлар ҳам беролмас бардош.  
Барибир тушунгим ким шод, ким ўксик,  
Дуниёда бир хилдир кулги ва кўз ёни.

*1970*

Одамлар талашар ҳаво, ер, сувни,  
Ҳатто талашади харобаларни.  
Табиат яратган эди-ку уни,  
Ахир ҳамма учун бирдек баробар.  
Хўмрайган тоғларнинг қалбидаги ҳам дарз,  
Асов тўлқинлар ҳам минг пора-пора.  
Инсон-чи, гоҳ топиб, гоҳ қилиб фараз,  
Кашфиёти билан доим овора.  
Шундай жойлар борки, умрлар арzon,  
Бир бурда ион учун жонлари гаров.  
Баҳорни бемаврид ютади ҳазон,  
Инсон инсон учун бўлар экан ёв.  
Бир қуёш порлайди осмонда ғолиб,  
Яхшики, одамнинг етмас оёғи.  
Йўқса, олам ярми зулматда қолиб,  
Нурии пуллармиди бошқа бир ёғи...  
Шунда ҳам барибир бир ватандошим  
Қалбини машъала қилиб жаҳонга,  
Одамзод йўлига қўярди илиб.  
Шунда ҳам, барибир, шу совет ҳалқим  
Занжирбанд қуёшни ҳимоя қилиб  
Қўшин тортар эди ҳатто осмонга.

1970

Сўппайган гилоснинг чайир кафтида,  
Ҳурпайган бир уя туар ҳувиллаб.  
Гоҳ ивиб тушгундек ёмғир забтидан,  
Гоҳ шамол беаёв силтар гувиллаб.

Чол маъюс боқади унга дамо-дам,  
Қисилган кўзларда мунгли бир хаёл.  
Ёки хаёллари қушларга ҳамдам,  
Сайраб учишларин эслар эҳтимол.

Томоша қилгандир, балки энтикиб,  
Учирма қилганда полопонларин.  
Энди маъюс туар нигоҳин тикиб,  
Ташлаб қайга кетди улар инларин.

Битта мусича ҳам совуқдан беҳол,  
Маъюс термилади инга бўғотдан.  
Балки сарин еллар эркалаб хушҳол,  
Яшил барглар ичра уни уйғотган.

Мен ҳам кузатаман уларни зимдан,  
Фалати ҳиссиёт —чувалар ўйим.  
Шунаقا, фарзандлар қадим-қадимдан  
Тарқаб, ташлаб кетар оталар уйин...

1970

Ҳасад нималигин билмайман ҳануз,  
Ҳаёт бундан сўнг ҳам сийласин шундай.  
Билмаганим учун қилмасман афсус,  
Назаримда, ул ҳис зимиштон тундай.

Аммо севдим жонни узиб бергундек,  
Ипаклардан хаёлий тахтлар тўқидим.  
Қалбим тиниқ сувда титраган нурдек  
Гуллар япроғидан қўшиқ ўқидим.

Ёмон кўрдим яна, жиркандим ҳатто,  
Вужудим қақшатди баъзида газаб.  
Аммо кўролмаслик... Менинг наздимда  
Ҳамма азоблардан оғирроқ азоб.

Сенингсиз ўтганда йиллардек ҳар дам,  
Оlam туюлганда бўм-бўш қутидай,  
Меҳнат оғушидан изладим ором,  
Худбинликдан шундай олисда ўтдим.

Шундан кўнглим доим осойишта, тинч,  
Бахтимнинг тожидир ёруғ ўйларим.  
Шундан кемирмайди дилимни ўкинч,  
Шундан, фақат шундан равон йўлларим.

1970

Онангни севгин, деб ўргатмоқ ғалат,  
Хоин қалб шу сўздан ўнгланармиди?  
Сут билан кирмаган бўлса муҳаббат,  
Номусни биларми, тўлғанармиди?  
Жонидан жон олиб, қирқиб умрини,  
Ҳуснини ўғирлаб қочгучи бола  
Қошки бир онанинг бўлсайкан шўри...  
У ҳамманинг шўри, ҳаммага бало.  
Новвот ичидаги ипмиди она,  
Шимиб-шимиб туфлаб ташласанг лоқайд.  
Қалб эмас, ҳаттоки дарз тушар тошга,  
Унинг кўзларига ўқинч қўнган пайт.  
Онангни севгин, деб ўргатмоқ ғалат,  
Андиша солади танамга титроқ.  
Одам туғилишининг ўзи муҳаббат —  
Бўлса-ю, юқмаса бу унга бироқ —  
Фарзанд аталарми, дерларми инсон,  
Соялар киравми ҳеч қачон сафга.  
Севгисиз вужудда не қилсин виждон,  
Булар арзимайди насиҳат, гапга.

1971

Асрим нафасига соламан қулоқ,  
Гоҳ нотинч, гоҳ мағрур ва гоҳида лол.  
Доим ўй ўйлашдан тоқатларим тоқ,  
Бир чивин шарпаси келади малол.  
Мана, эллик йилки, нон-насибамиз  
Дўсту юпунлардан дариғ тутмадик.  
Гоҳ унда, гоҳ бунда жароҳат сизиб  
Бу олам танига соғлиқ битмади.  
Дунё яшармоқда ҳуснга тўлиб,  
Аммо гўдакларнинг уйқуси нотинч.  
Телевизор ёнида безовта бўлиб,  
Урушдан қўрқишиб ухларлар ҳар кеч.  
Бизларнинг болалик бошқача эди,  
Қапрон ленталарни билмасакки ҳам  
Бувилар эртакка хўп уста эди,  
Учар гиламларда кезардик олам.  
Ою юлдузларнинг сохта жамоли,  
Сеҳри ҳам йўқолди эртак тўқишига.  
Қўйинг бу ёлгонни, дейдилар кулиб,  
Барини билишар, бари ўқишган.  
Ақл пармалади еру осмонни,  
Заковати очди кўкка нурли йўл.  
Таажжуб, шунчалик қодир бу инсон,  
Ҳали қайлардадир бир нотавон қул.  
Асрим нафасига соламан қулоқ,

Гоҳ нотинч, гоҳ мағрур ва гоҳида лол.  
Баъзан ўй ўйлашдан тоқатларим тоқ,  
Бир чивин шарпаси келади малол.  
Ва лекин ҳаққим йўқ чекинмоққа ҳеч,  
Лоқайдлик жиноят ушбу замонда.  
Шабнам тоза бўлсин, эл бўлсин деб тинч,  
Муҳаббат ва газаб сақлагум қонда.  
Қаерда туч бўлса, бордик бўлиб нур,  
Шунга ўрганганимиз, бўлмасмиз бошқа.  
Асрим шиддатидан мен баҳтли, мағрур,  
Жилмайиб боқаман ҳар тонг қуёшга.

1971

Саратон ҳансиар бояларда бугун,  
 Чалажон шабада очолмайди кўз.  
 Олтин раңг япроқдан кўтариб тугун  
 Ҳали қаёкларда тентираиди куз.

Қуёш уйғонади тонг шиддат билан  
 Вужуд-нафасидан қуайб нурини.  
 Ажиб бир енгиллик, ажиб баҳт билан  
 Деҳқон ерга тўкар юрак қўрини.

Токи жилва билан ташриф қилсин куз,  
 Нишолдадек тошсин пахта чаноғи.  
 Токи боғлар ҳуснин қилганда кўз-кўз  
 Ҳақиқдек товлансин олма ёноғи.

Ифор қовунларнинг кўтариб ҳидин  
 Нимтатир шабада тўйдирмай ўтсин.  
 Токи офтоб, тердан кўпчиган ердан  
 Куз кўнгил узолмай миннатдор кетсин.

*1971*

\* \* \*

Бувилар дуога қўлларин очиб,  
«Боши тошдан бўлсин»,— дер жигарларин.  
Бувалар елкага ортиб, опичиб,  
«Боши тошдан бўлсин»,— дер жигарларин.  
Азиз бувижонлар, азиз бувалар,  
Ёдингизда бўлсин яна бир тилак.  
Боши тошдан бўлсин жигарингизнинг,  
Аммо тош бўлмасин кўксидা юрак.

1971

280

\* \* \*

Мажлис ҳайъатида ёзилур қарор —  
Келажакка мужда, муҳим ҳисобот.  
Токи нелар қилдик, кўнгилда не бор,  
Авлодлар излашиб юрмасин исбот.

Унда тиллар эмас, гапирсин диллар,  
Айнан нусха бўлсин қалбларимиздан.  
Оҳорини тўкиб қўймасин йиллар,  
Бошқача сўз чиқиб лабларимиздан.

Тарихга айлангач сопол ҳам сўзлар,  
Забонсиз тошлар ҳам сақлолмас сукут.  
Аммо энг заҳматкаш авлод-ку бизлар,  
Йилларнинг қатида бўлмасмиз унут.

Қўзу юракларда тераник, шиддат,  
Қон босими ортиқ вужуддай замон.  
Оlamга баҳш этиб ҳусн ва қудрат,  
Ўзи нозик тортиб бормоқда инсон.

Гарчи насибамиз луқмаи ҳалол,  
Тутган-қўйганимиз гарчи хўп ноёб.  
Қайтадан жонланур таржимаи ҳол,  
Қайтадан бошланур савол ва жавоб.

Шунда илашмаса изимга ғубор,  
Синовлардан ўтсам гумонсиз, осон.  
Тарихдан синчковроқ, билмайман, не бор,  
Ҳатто Темур афтин чизди-ку рассом.  
Синовлардан ўтсам гумонсиз, осон...

*1971*

Уйга ҳайдаб қўйди бу қиши ҳаммани,  
Кенглик, яшилликни қўмсайди кўзим.  
Қанчалар севаман қириу далани,  
Қиши ҳақида шеър ҳам ёзмайман ўзим.

Қор ёғар тинмайин, еру кўк оппоқ,  
Новдани ёпгандай ўрикнинг гули.  
Яна мен эсладим аёлнинг шу чоқ  
Тоғора ушлаган кўпикли қўлини.

Бир вақт урф бўлган гарч туфлиларни  
Эслатиб ғижирлар юрганингда қор.  
Аста йўл очаман кураб уларни,  
Хаёлимда эса бинафша, баҳор. /

Гарчи уйлар иссиқ, дастурхон тўкин,  
Узун кечаларда дўстлар гурунги.  
Ҳар дамда кутаман баҳорни лекин,  
Шумшайган қушларга термилиб мунгли.

Яхмалак отишиб болалар ҳам шод,  
Тамшаниб талтаймиш дараҳтлар шохи.  
Софинч билан баҳорни мен қиламан ёд,  
Кўзимда гулларининг майни нигоҳд.

Қандга лаби теккан гўдак каби ер,  
Сўриб-сўриб уни қиласи ҳузур.  
Менинг хаёлимда лола тутган қир,  
Шабнам қўнган ғунча аста барг ёзур.

Исфара боғлари гуллаган пайтми,  
Деразам кўзига тушибди акси.  
Менинг димоғимга урилар ҳадеб,  
Бўтана сувларда ялпизнинг иси.

Оқ соч томларда ҳам ажиб бир сукут,  
Борлиқни чулғамиш енгил бир хаёл.  
Сўлим соҳилларни қилолмай унут,  
Мажнунтол ишқида мен афтодаҳол.

Тезроқ эритса-чи қорларни офтоб,  
Субҳидам жилмайса ним пушти шафақ.  
Ҳозирча қор ёғар, қор ёғар шитоб,  
Далалар, кўчалар, дарахтлар оппоқ.

1972

\* \* \*

Бир он тўхтаса-чи учқур бу дамлар,  
Бир он силкитмаса тезкор қанотин.  
Қаришдан бир нафас тинчиб одамлар,  
Бир онгина тутса мангулик отин.

Бу фақат маҳсулсиз, афсусли хаёл,—  
Вақтдек чавандозни жиловлабди ким?  
Аммо елкасига мушкул ва малол  
Юкларни ортмоқдан туролмасмиз жим.

У ҳамон пишқириб югурап бироқ,  
Нуқра бўлиб сочга қўнар нафаси.  
Инсондан ўч олмоқ бўлиб чамаси  
Таранг, тиниқ юзга ботирап тирноқ.

1972

285

Жимжитлик бўлмасин, бўлмасин зинҳор,  
Гарчи аталса ҳам номи сукунат,  
Юракни ёргундек шум овози бор,  
Тўхтаб қолган каби туюлар ҳаёт.  
Йўқ, асло севмайман сукунатни мен,  
Еллар қанот қоқсин бутоқлар аро.  
Чарх урсин қушлар ҳам, олмасинлар тин,  
Уларнинг базмидан яшарсин ҳаво.  
Сойлар шовиллаши тўхтамасин ҳеч,  
Гоҳ булат, гоҳ нурдан бўзарсин осмон.  
Шоирнинг қалбидек, ўйидек нотинч  
Ҳаёт томирида жўшаверсин қон.  
Майли, гувилласин машиналар ҳам,  
Овозга мўл бўлсин яқину йироқ.  
Майлига, шовқиндан толиқсин одам,  
Сукунатда қолиб кетмасин бироқ.

1972

Ҳаммадан қолади бу кўҳна дунё,  
Ҳам кекса, ҳам гўдак муҳаббат мисол.  
Билиб билмасликка оламиз гўё,  
Айрилиқ абадий, ғанимат висол.

Сен менга бемалол суюнавергил,  
Мушкулинг, дардингни — борин тўкиб сол.  
Шундай қилсанг, бир оз тортасан енгил,  
Таскин бермоқ менга келмайди малол.

Ииги ҳам, кулги ҳам эмас-ку боқий,  
Тошдан қаттиқ бўлмас одамда бардош.  
Ҳаёт шаробини тутганда соқий  
Баъзан аралашиб қоларкан кўз ёш.

Ҳамдард бўлолмаслик қолдирап армон,  
Яхшига ёр бўлиш боғлайди қанот.  
Бирга жарга тушгум ва ошгум довон,  
Дўстсиз, садоқатсиз ҳаётми ҳаёт?!

Сен менга, азизим, ишонгил, ишон,  
Сен менга суюнгил, суюн бемалол.  
Бахting ҳалол бўлса ҳеч ким ҳеч қачон  
Ташвишинг, ғанингни олмайди малол.

1972

## БОҒ КҮЧА

Нечун боғ кўчага мен шунча мафтун,  
Хатто юрагимда шабада эсар?  
Чинорга чирмашган қайроқи узум,  
Ариқ бўйидаги камтар гулсафсар —  
Нигоҳимни қўйиб юбормас нега?  
Нечун вужудимда кезади ҳайрат,  
Ҳориган елкасин тираб деворга  
Мудраган жийда ҳам кўзимга санъат.  
Арғимчоқ солланар, гийқиллар дараҳт,  
Онанинг пинҳоний инграшисимон.  
Нега хаёлотдан мен гоҳи караҳт,  
Хатто бўлакчадек бу ерда осмон?  
Шуълаларни босиб кенг асфальт йўлда  
Шамолдек гувиллаб учганда неча,  
Қичик тош тушгандек каттакон кўлга,  
Ёддан чиқибмиди ўтмишим, кечам.  
Нечун юрагимда бунчалик ҳислар  
Ларзага солади ажиб бир туйғу.  
Тўғри, булар ўтмиш, кечаги излар,  
Аммо болалигим, ёшлигим ҳам шу.

1973

## О Н А Ж О Н

Яна баҳор келди тап-тақир, сийдам,  
Рангларсиз, гулларсиз мен учун бугун.  
Ажинлар чизиги ичида дийдам,  
Қалбимда ўлимнинг дастидан тугун.

Бинафша, лолалар шумшук ва ғариб,  
Дилга муздек тегар, бермас ҳаяжон.  
Бутун гўзалликлар сизни ахтариб,  
Изингиздан кетдими, дейман, онажон.

Сувларнинг қўшиғи сиз билан кетмиш,  
Бўм-бўш бўлиб қолмиш гўё Андикон.  
Наҳот, булар энди тотли бир ўтмиш,  
Наҳотки, сиз йўқсиз энди, онажон.

Ҳушёрман, дер эдим ўзимни ўзим,  
Бугун юрагимда минг битта армон.  
Бу оламда неки ранжитмиш сизни  
Барига гўё бир мен гуноҳкорман.

Сиз айтган аллани айтиб ўтурман,  
Сиз берган юракни машъала қилиб.  
Қайдаки, гумроҳлик бўлса тутурман,  
Қўйман одамлар йўлига илиб.

Яна йиллар ўтар, баҳорлар балқир,  
Яна кўзларимда рангланар гуллар.  
Қалбимни битта ўй кемирап, юлқир,  
Йўқ энди висолга элтгувчи йўллар.

Наҳотки, сиз йўқсиз энди, онажон...

1973

## МАЖНУНТОЛ СОЯСИ

Жазирама кунларнинг олов дақиқалари  
Бир мажнунтол тагида роҳатга айлангуси.  
Оламнинг тарам-тарам тиниқ ҳақиқларига  
Офтобнинг етти рангин ҳаммаси жойлангуси.

Бўтана сувлар оқса ялпизларни торгқилаб,  
Қалқиб-қалқиб кўринса қовункоса пўстлоғи.  
Қапалаклар учишса алвон рангни орқалаб,  
Ҳеч жойдан тополмасман ҳордиқнинг дурустроғин.

Оқ яктак, оппоқ соқол чоллар силкиниб кулса,  
Лорсиллаб кетгусидир сувга қурилган сўри.  
Лабда қимтиб узилган узумдан бол тўқилса,  
Соқолларда товланар қуёшнинг етти нури.

Тер тепчиган манглайни силаб ўтса шабада,  
Не жононлар қўлидан майинроқ туюлади.  
Шундай жойда бир чимдим ухлаб олсанг мабодо,  
Мажнунтол баргларидан сиҳатлик қуйилади.

Қошига лойقا инган бир тўда болакайлар  
Ўрдак полопонидек сувга урса ўзларин,  
Хаёлларидан ҳозир кўтарилимиш хоккейлар,  
Қорайган юзларида йилтиллайди кўзлари.

Ненидир тутиб кетди қалдиргоч бир шўнғишида,  
Анжирга кўзин тикиб хилват пойлар зарғалдоқ.  
Деҳқоннинг яхна чойи сувда турар чойдишида,  
Шимирсангиз бадандан сизиб чиққуси чарчоқ.

Бўтана сувлар оқса ялпизларни тортқилаб,  
Қалқиб-қалқиб кўринса қовункоса пўстлоги.  
Капалаклар учишса алвон рангни орқалаб,  
Ҳеч жойдан тополмасман ҳордиқнинг дурустрогин.

1973

\* \* \*

Сарин·еллар йўлин буриб менга олиб кел,  
Дарёларни изга солиб, куйга солиб кел.  
Эритиб ой, юлдузларни лиbosлар яса,  
Ёшлик ўтган бўлса ҳам, бир ясанай роса...  
Шуълалардан ипак тўқиб қатим-қатимлаб,  
Вужудингдан ишқ барқ уриб, интизор ҳатлаб,  
Етти иқлим чаманларин атрин олиб кел,  
Булбулларни эргаштириб, куйга солиб кел.  
Қўлингдан бу келмаса гар, фақат кулиб боқ,  
Кулишни ҳам эплолмасанг... келмагин мутлоқ.

1973

293

Хаёлимни бузма, қўйиб бер эркин,  
 Қалбимни ҳисларга берайин тутиб.  
 Майли, улар менга бермасинлар тин,  
 Барibir умр ҳам бормоқда ўтиб.  
 Тирикларни ўйлаб ҳайратланаман,  
 Улганларни эслаб толаман ўйга.  
 Гоҳида зил чўкиб, гоҳ қанотланиб,  
 Гоҳо нуқтаман, гоҳ сиғмайман уйга.  
 Руҳ абадий деса ишонмоқ керак,  
 Ҳаётда шуъладек қолганлар озми?  
 Ўйласанг ёришиб кетади юрак,  
 Асрлар қаъридан берарлар овоз.  
 Маҳзун бўлсанг табассум бўлурлар ҳамон,  
 Ҳамон маслаҳатгўй, ҳамон етакчи.  
 Шундандир уларнинг руҳлари омон,  
 Уларки, юрибди нур бўлиб учиб.  
 Ўзи бир нигоҳга зор-зор ўтиб,  
 Минг ошиққа тил бўлиб қолганлар қанча?!

Не мушкулотлардан келади қайтиб  
 Шоир ҳисларини шеърга қўйгунча.  
 Олдда йўл қисқарап, орқада олис,  
 Фақат хотиралар келар илашиб.  
 Шунданми, гоҳ шодман ва гоҳида терс,  
 Яшамоқ пайтидир ўйлаб ва шошиб.  
 Ёшлигим жим, сокин тунни безади,  
 Намозшом гулидек кўзлардан пинҳон.

Энди вужудимда ҳорғинлик кезар,  
Орэу-ҳавасларга бўлганда имкон.  
Одамлик изладим душманимдан ҳам,  
Дўст қийналса жоним типирчилади...  
Шуларни ўйлайман, биламан шундан  
Ёшлик ҳам отини тез қамчилади.  
Шуларни ўйлайман, ўйларим чексиз,  
Яхшилик, ёмонлик, ўлим ва ҳаёт,  
Бирорга бемаврид келган қазо-ю,  
Бирорга текинга берилган қанот.  
Майнинлик, теранилик, ваҳшийлик, тундлик.  
Уз ўрнига тушган мукофотгача.  
Вазминлик, баъзида шиддаткор зудлик.  
Таъбни кир қилгучи хурофотгача —  
Ўйлайман, қалбимдан ўтади бари,  
Гоҳи эркалатиб, гоҳ жароҳатлаб.  
Кошкийди тубанлик чекилса нари.  
Эзгулик ўтмаса ҳеч кимни четлаб.  
Хаёллар тортқилар юз бир томонга,  
Юз шодлик, қийноққа қиласи дучор.  
Майли, юрагимда ёнсин аланга,  
Аммо, хаёлларсиз яшамоқ душвор.  
Хаёлнимни бузма, қўйиб бер эркин,  
Уларсиз яшамоқ тутқунилик менга...

1973

Қўй энди, дам олсин магнитофон ҳам,  
Бунда табиатнинг ўзи нақ ҳофиз.  
Бунда табиатнинг ўзи созанда,  
Дардини минг тилда айлар талаффуз.

Оппоқ парча булат судралади жим,  
Бағрида кўз ёшми, шабнамми, не бор.  
Аммо шарпасини илгар қулогим,  
Қулоқ тут, куй айтар нафис, мафтункор.

Қулоқ тут, гиёҳлар майин шивирлар,  
Худди бир сеҳрга, сирга ўхшайди.  
Мунча ҳам беозор, мулойим улар,  
Балки бир қадамдан чўчиб яшайди.

Қулоқ тут, тоғлар ҳам шиддаткор куйлар,  
Коммунарлар мисол елкама-елка.  
Куй айтар олисда оқарган уйлар,  
Бир куйлаб ўчади ҳатто кўланка.

Япроқлар юзига юзимни тутиб,  
Келар шивирини тушунгим, уққим.

**Емғир ювиб ўтса, шамол қуритиб,  
Чайибди яна ҳам тиниқроқ кўкка.**

Бунда ҳамма нарса қўшиқ айтяпти,  
Гоҳ қувонч, гоҳ андуҳ тинглаяпман мен.  
Ўзинг тил топмасанг, уқмасанг галин,  
Таржима қилмоқни билмаяпман мен.

*1973*

\* \* \*

Шеър ўқигим келар,  
Қўйма сатрлардан  
Юрагимга тушса жимгина ларза.  
Мени бошлаб кетса ажиб туйгулар  
Яшиллик юргурган қир, адирларга,  
Яланг оёғимни силаса майса.

Шеър ўқигим келар,  
Чарчоқ ҳисларга  
Сўлим ва мусаффо ҳаво пуркаса.  
Қалбдаги бўшлиқни тўлдириб,  
Оламни муаттар исларга,  
Яна чаманларга буркаса.

Шеър ўқигим келар,  
Нотинчликка чанқоқ,  
Қанотли ўйларга ташна юрагим.  
Сергак этса оҳанглар, куйлар,  
Ўтказдириб тунларни уйгоқ,  
Ташна лабга ўхшар юрагим.  
Шеър ўқигим келар...

1973

\* \* \*

Атласимнинг жилвасида Ўзбекистон боғлари,  
Мен тўқийман токи яйраб кийса деб ўртоқларим.

Танда тортсам ранг, ипакнинг гулларига рашк қилур,  
Кифтида гул орқалаб оқсан чаман ирмоқлари.

Арқоги офтоб нуридан, ўриши ой шуъласи,  
Ҳам яна юлдуз чиройин қат-қатига боғладим.

Не саодатки, яна энг яхши кун — тўйлар учун  
Шоҳи-ю атлас бўлур ёрнинг белбоғлари.

Боғласа ёр белларига баҳт ила қувват берур,  
Дил ўтидан байт битилган каштали қирғоқлари.

Атласимнинг рангларида Ўзбекистон боғлари,  
Мен тўқийман токи яйраб кийса деб ўртоқларим.

\* \* \*

Мен сени шунчалар ёниб севганим  
Севиши сенга ҳам ўргатмоқ учун.  
Ўзимни ўйламай, сени деганим,  
Сенга ҳам ўзимни ўйлатмоқ учун.  
Шаънингни булбулдек юз тилда айтдим,  
Сени ҳам булбулдек куйлатмоқ учун.  
Бахтими таърифлаб ғазаллар битдим,  
Сени ҳам бахтиингдан сўйлатмоқ учун.

Уйқум қочиб кетди,  
Уй ва хаёллар  
Қуюндай титкилаб тун қоронғусин  
Қайларга элтмади мени бу кеча.  
Тизгинин қўймади бебош шамоллар,  
Олдинда севгининг сирли ёғдуси,  
Кўзимдан кетмадинг яна бу кеча.

Муҳаббат тангриси  
Бутун ҳунарин  
Кичкина жонимга жойлагунча то  
Тинмаганим дейман афсундан оғзи.  
Бутун умр кутдим иқрор хабарин,  
Бир умр яшадим бўлиб мубтало,  
Худди шунинг учун мен тақдирдан рози.

Меҳрли нигоҳинг,  
Суйгучи кўзларинг  
Таъқиб-терговийга бўлсам мұяссар,  
Қафтингга томардим бир қатра ёшдек.  
Гулларга кўмардим босган изларинг,  
Уйланмай елардим ҳузуринг сари,  
Кўрқмасдим на сувдан ва на оташдан.

Бир нурли оламсан  
Чаманларга зеб.

Рұхимга ҳаловат, гиёларға ранг.  
Яна нелигингга шеърларим гаров.  
Сен туфайли мени, вужуди ишқ, деб,  
Ижтимоийликдан ўчирса бирор  
Ҳаво етмагандек гоҳ аҳволим танг.

Аммо мен севгиман,  
Ишқдир ҳар сатрим.  
Дилларни дилларға талпинтиргувчи  
Даққи юракларни тутар уволим.  
Агар насиб қылса менинг бир қатрам,  
Ҳокимлик истаги, бойликдан кечиб,  
Ҳар қандай қўлдан ҳам тушарди қурол.

Сен туфайли мен ишқ,  
Сен туфайли мен баҳт.  
Иўлларим ҳам тугаб қолурди сенсиз.  
Сен туфайли оқшом қўйни тўла нур,  
Сенсиз орзуларим, ақлим ҳам караҳт,  
Үйларим қаноти толурди сенсиз,  
Дилда борлигининг ўзи бир ҳузур.

Ҳаёллар пармалаб тун қоронгусин,  
Қайларга элтмади мени бу кеча...

# ДОСТОНЛАР



## РУҲ БИЛАН СУҲБАТ

Одамлар тарқаган аллақачонлар,  
Тўйхонага ҳам ҳукмин ўтказганди тун.  
Ўчоқда кул босган чўғлар милтиллар,  
Самовардан ҳамон ўрмалар тутун.  
Машшоқлар ўтирган сўри ҳам бўм-бўш,  
Тупроқда энг сўнгги раққоса изи.  
Бирор каравотда ухлайди пиш-пиш,  
Бирор муздек сувга чаяди юзин.  
Фақат уйқу келмас она кўзига,  
Шодлигу хотира қалбини қамраб,  
Беҳуш эргаштириб уни изидан  
Ўтқазмай, ётқизмай юрарди судраб.  
Қарашмоқчи бўлар гоҳ синглисига,  
Гоҳ туриб қолади хаёлчан, сокин  
Гоҳи келган каби ҳуши-эсига,  
Энтикиб атрофга қарайди секин.  
Иигиб олинмаган ўртада стол,  
Ноз-неъмат беҳисоб: сомса, кабоб, нон.  
Келин-куёв олди урмагандай қўл,  
Қадаҳлар ҳам ярим турар ёнма-ён.  
— Ҳеч нарса емабди, оч ётдимикан,  
Уялган бечора, оҳ, бу келинилик...  
Она юрагига ботдию тикан,  
Танига бир нарса югурди илиқ.  
Шукур, ўзи тетик, яна пазанда,  
Суйганин оғзига тутади ҳали.

Келин ҳам ўглидек унга арзанда,  
Бир азиз меҳмондек кутади ҳали.  
Қўшалоқ капитардек аҳил ва иноқ,  
Шу уйга файз бериб яшасалар, бас.  
Шу орзу, овунчда умри ўтди тоқ,  
Таянч, далда бўлди шу эзгу ҳавас,  
Набиралар қуритса кошки тинкасин,  
Қувноқ шовқинлари ҳовлини тутса.  
Бағрига босиб, гоҳ тутиб елкасин,  
Қолган умри кошки шунаقا ўтса.  
Ширин хаёлларга тўлган кўзлари  
Сўлиган гулларга тушди-ю, тинди.  
Олиб келишганди бир тўда қизлар,  
Гулдонга сув қўймай солибди кимдир.  
Авайлаб, оҳиста сув пуркади она,  
Силади тирилган майнин япроғин.  
Ранглар жилоланиб, товланиб яна,  
Нечун янгилади онанинг доғин.  
Гулдаста қўлида, маъюс ва сокин,  
Аста кириб келди жимжит уйига.  
Тўрдаги суратнинг ёнига секин —  
Қўйди-ю, шўнғиди яна ўйига.  
— Сарупо киймадинг қайната бўлиб,  
Ҳеч йўқса, гуллардан бўлгин баҳраманд.  
Одам келди бугун ҳовлингга тўлиб,  
Фарзандинг ёнига қўшилди фарзанд...  
Шодлик, ўкинчданми кўз ёшлар оқди,  
Она қалби сўзсиз чекарди фигон.  
Хира кўзлар билан яна суратга боқди,  
У ҳамон ўшандай, сукутда ҳамон.  
— Суратда ҳали ҳам ўша-ўшасан,  
Ҳамон кўзларингда ёшлиқ, кулги, нур.  
Ҳали ҳам ўшандай чиройли, ёшсан,  
Ҳали ҳам ўшандай забардаст, мағрур.  
Боқишинг ҳали ҳам ўшандай илиқ,  
Дилингда нелар бор, айтмайсан фақат.

Қатра кўз ёшимга туролмасдинг тек,  
Нега индамайсан, оҳ, сурат, сурат!  
Бир нафас тилга кир, майли, бир секунд,  
Дарё бўлиб оққан ёшларим ҳаққи.  
Кўйингда минг тошга урилса ҳамки,  
Минг тошдан қаттиқроқ бошларим ҳаққи,  
Бир нафас тилга кир, майли, бир секунд.  
Ҳаётни яратган табиат наҳот,  
Бир дамни аяса, номардлик қилса.  
Тан олмайман унда, ой, қуёшини,  
Нималар деяпман, билмайман, хайҳот!  
Сени излайвериб ҳолдан тойдим мен,  
Сени излайвериб қариб қолдим мен.  
Поездлардан ўтиб, еллардан ўздим,  
Аммо висолингга етолмадим мен.  
Хаёлим излашдан, кўнглим бўзлашдан,  
Сени ахтаришдан сира толмадим.  
Дарёларни кечиб, тоглардан ошдим,  
Куйган буғдойзорлар, боғлар қолмади.  
Охири оқ қайнин остида танҳо,  
Турган қабр узра аста чўқдим тиз.  
Бу сен бўлмасанг ҳам тақдиринг бир, о,  
Балки бу ёшгина йигиттир, эсиз!  
Муздек тупроғингни минг марта қуцдим,  
Муздек ёноғингни ўпдим неча бор.  
Дарё бўлиб оқдим, қуш бўлиб учдим,  
Ҳузурингга чопдим такрор ва такрор.  
Қишида курагани бордим қорларни,  
Ёзда сув сепгани ошиқдим ҳар вақт.  
Баҳор офтобига чирмашиб доим,  
Гоҳи гул ўтқаздим, гоҳида дараҳт.  
Бир нафас қўймадим мен сени ёлғиз,  
Бир дам танҳоликка ташлаганим йўқ.  
Сенсиз йиғламадим, кулмадим сенсиз,  
Сенсиз кўнглимни ҳам хушлаганим йўқ.  
Сени йиқитган ўқ менинг танамда

Бутун жароҳати билан түрибди шундок.  
Жонингга жонимни улаб минг ўлдим,  
Азизим, оқарган соchlаримга боқ.  
Гапир, гапирсанг-чи бир сўз лоақал,  
Юзимни куйдирган ёшларим ҳаққи.  
Кўйингда минг тошга урилса ҳамки,  
Тошлардан қаттиқроқ бошларим ҳаққи,  
Гапир, гапирсанг-чи бир сўз лоақал...  
Сийрак киприклар жисплашди бир дам,  
Энтикиб, хўрсиниб кўз ёшин ютди.  
Унесиз тилга кирди сурат ҳам бирдан,  
Она қулоқ бўлиб ўзин унуди.

### С у р а т

Йиглама, азизим, йиглама фақат,  
Кўз ёшингни кўрсам, дилим куяди.  
Йигласанг, ҳали ҳам қилмасман тоқат,  
Утмас пичоқ билан кимdir сўяди.  
Тўлғанаман, аммо ета олмайман,  
Кўз ёшингни, эркам, арта олмайман.  
Йиглама, азизим, йиглама фақат,  
Кўз ёшингга сира қилмасман тоқат.  
Табиатдан сира-сира иолима,  
Унинг ўзи кутар инсондан эҳсон.  
Яхшироқ назар сол кўнгли, ҳолига,  
Минг хил ташвиши бор бошида, билсанг.  
Осмонида қанча йўлдош учяпти,  
Баъзиси кўтариб дўзахдек даҳшат.  
Сувлари остида атом кўчяпти,  
Унинг юрагида армони қат-қат,  
Сен ундан иолима, йиглама фақат.

### О н а

Қўй, буни эслатма, эслатма сира,  
Ўғлимнинг баҳтидан юрай хотиржам.

Қўнглим ойнасини айлама хира,  
Бироқ тинч эмасман, нотинчман, ажаб...  
Сен бошқа дамларни эслат, азизим,  
Бирга юрганимиз хушвақт онларни.  
Эсингдами баҳор, боғимиз бизнинг,  
Тўйимизга келган қадрдонлар-чи?  
Шунча йил ўтибди нафасдай, сувдай.

### Сурат

Бир зарб-ла ёзилган достондай ширин.

### Она

Йигит эдинг ўшанда худди суқсурдай.

### Сурат

Сен ҳам гўзал эдинг мисоли Ширин,  
Кўнглимни яшнатган бир чечак эдинг.

### Она

На уйқуга тўйган ва на кулгуга,  
Кўрса кўз куйгундек келинчак эдим.  
Бировнинг қайгуси йиглатар эди,  
Агар қўшиқ айтса бирга куйлардим.  
Ҳаётга баъзида ўлмаслик учун  
Келгандай бўлардим, шундай ўйлардим.  
Бахтимнинг поёни, чеки йўқ эди,  
Бу шайдо юрагим ҳар нарсадан лол.  
Ишқингдан шунчалар кўнглим тўқ эди,  
Ундан айрилишни қилмабман хаёл...  
Эсимда, куз эди, мева ғарқ пишган,  
Боғлар олтин либос кийган ажиб пайт.  
Лекин ҳалқ бошига мусибат тушган,

Мен ҳам вокзалдан зил-замбил бўлиб  
Үйингга, онангнинг бағрига қайтдим.  
Мунчоқ кўзларини пилдиратиб шўх,  
Үғлинг ётар эди беланчагида.  
Эсласам, юрагим эзилади, уҳ,  
Ҳаммаси кўзимда, ха, кечагидек.  
Үлар ҳувиллади, кўнглимиз вайрон,  
Қайнана-келин жим, сукутда қолдик.  
Тўрт ўғил ўстирган онанг ҳам ҳайрон  
Соатлаб бечора ўтиради тек.  
Аканг кетган эди, уканг ҳам кетди,  
Беҳасса буқридек қолдим эгилиб.  
Бу кунни кўргунча минг рози эдим,  
Кимдир баданимга туз сепса тилиб  
Маъюс кўзларига ҳар боққанимда,  
Қалбимни қиймалар эди ҳижронинг.  
Туғиб туғмагандек фироқда, ғамда  
Оlamdan кўз юмди онаижонинг.  
Сира чидомладим бу айрилиққа,  
Дод дедим, зирқираб титради үлар.  
Қарғадим тақдирни юзма-юз, тикка,  
Шўрлик, қилсан дерди набира тўйлар.  
Урф-одатни ҳам ўша кун буздим,  
Хотинликни йигиб отдим бир ёққа.  
Тобутин бир бошин кўтардим ўзим,  
Одамлар гоҳ койиб, гоҳ тутди ёқа.  
Үғлим йўқ, деб яна ўксима, она,  
Сени кўттармаган бу елкаларим  
Бўлгани яхшироқ пора-ю тилка,  
Үғлим йўқ деб яна ўксима, она.  
Сен ҳам армон қилма бағрим, азизим,  
Сўнгги йўлга уни узатмадим деб.  
Ташлаб кетган эдинг менга ўз изминг,  
Мен ҳам битта жонинг, бир парчанг эдим.  
Тунлари койидим тақдирни бедор,  
Нечун бизда шунча аччиқ ўчи бор!

## С у р а т

Қисматда не гуноҳ, ўйлабсан хато,  
Бу — ожиз ва муте одамлар сўзи.  
Тақдирнинг ўзи ҳам аламда ҳатто,  
Қора қилганлар бор тақдирнинг юзин.

## О на

Ҳа, буни билардим, қисматдан ўзга  
Кимни ҳам бўғардим ўша дамларда.  
Фашист олис эди қўлу кўзимдан  
Ғажиб ташлай десам бу аламларга.  
Туғиб, қотил боққан оналарни гоҳ,  
Хаёлан тик қўйиб қиласар эдим суд.  
Шунда онанг тушиб ёдимга ногоҳ  
Дунёда ўзимни сезардим масъуд.  
Ўйга сигмай қолдим, бир ўқ ясасам,  
Битта қўлқоп тиксам ҳарна-ку, дедим.  
Ҳамма шундай дерди, энди эсласам,  
Мен ҳам ўшаларнинг биттаси эдим.  
Оҳ, бизнинг одамлар, дилкаш одамлар,  
Ҳеч қачон танҳолик сездирмадилар.  
Жигар бўлишди-ю, энг оғир дамлар  
Бағридан бир нафас бездирмадилар.  
Қулгим, йиғимни ҳам бирга бўлишди,  
Улар кўмагида жойландим ишга.  
Улар кўмагида ақлим тўлишди,  
Олисдан ўт очдим ёвга, урушга.  
Кўпчилик аёллар эдик заводда,  
Бирам аёлларки, қошлиари қундуз.  
Меҳнатдан ўзгани билишмас, содда,  
Тунни тун дейишмас, кундузни кундуз.  
Биттаси йиғласа, бари эгар бош,  
Бирининг шодлиги барчага татир.

Ишқ тўла қалбларда ғазаб ва оташ,  
Бир жон қилиб қўйган уларни тақдир.  
Ўғлинг ўсар эди, «дада, дада», леб,  
Талпиниб қолганда суратингга гоҳ  
Мен эса ўқинчдан ич-этимни еб,  
Хўрсиниб кўксимга босардим, эвоҳ!  
Энтикиб ўпардим сочи, юзидан,  
Бағрин тўлатмоқни қилардим хаёл.  
Барибир қоларди гўдак кўзида  
Бир кўнгли яримлик, бир мунгли савол.  
Иўқ, сен билмайсан, бу мурғак, ожиз —  
Дилга жавоб излаб бўлмагансан лол.  
Жигарим оташга тегарди жиз-жиз,  
Сочларим оқарган шунда эҳтимол.

### С у р а т

Бу кўзлар ҳасратин, оҳ, мендан сўра,  
Суягимдан ҳамон чиқиб кетар дуд.  
Жазавага тушиб руҳим югурап,  
Қотган тилларим ҳам қилолмас сукут.  
Етимлик нима гап, шу мурғак жоҳлар —  
Кўксига беаёв отишган-ку ўқ.  
(Жонингдан айланай, оҳ, болажонлар,  
Унутиб бўларми у кунларни? Иўқ!)

Узига ниқталган тўппончани ҳам  
Үйинчоқ деб билган митти қўлчалар —  
Шалпайиб тушгаnda қандайин алам,  
Айт-чи, бу аламлар қандай ўлчанар?  
Мурда кўкрагини бепарво сўриб,  
Инграган гўдакни кўрганмисан ҳеч?!

### О на

Бас, бўлди, раҳм қил ҳолимни кўриб,  
Ҳатто тинглашга ҳам етмайди кучим.

## С у р а т

Ўзинг гап бошладинг, энди қулоқ сол,  
Ҳали туғилмаган набиранг учун  
У кунни унутма, доим эсга ол,  
Қалбингда ҳамма вақт сақлагин ўчин.  
Ҳаққинг йўқ бепарво бўлишга бир дам,  
Ҳеч кимнинг ҳаққи йўқ, тингла, қулоқ бер,  
Овоз келяптими олисдан, ердан?

## О н а

Сезяпман. Наҳотки тилга кирди ер?!

## С у р а т

Бу бизмиз, азиизим, қўл ушлашиб бот,  
Чирмасиб ётибмиз она тупроқقا.

## О н а

Вой·бў, шунча кўпмисиз, наҳот,  
Шовқин эшитяпман яқин-йироқдан.

## С у р а т

Тириклардан кўра, балки кўпроқмиз,  
Тириклардан кўра ҳам иноқроқмиз.  
Халқининг баҳти деб, сургунда юриб,  
Буюк революцияни тайёрлаб кунда,  
Эрининг изидан қувғинда юриб —  
Хормаган ажойиб аёллар шунда.  
Ленин шаҳарининг чўкмаслиги-чун  
Кўксин қалқон қилган йигит, чоллар ҳам,  
Ҳиссиз ваҳшийларнинг ўқига учиб  
Бевақт хазон бўлган навниҳоллар ҳам.

Партизан яширган она-ю ўғил  
Ҳатто ўзимизнинг мард Остонақул,  
Фашистни титратгани Раҳимовгача,  
Тўйчи Эрийгитов, Ҳакимовгача —  
Ҳаммамиз шу ерда, ўқ, томир бўлиб  
Ерни елкамизда тутиб ётибмиз.  
Тўлғаниб, ғазабга, ташвишга тўлиб  
Вьетнам устида бомба, ўқларнинг  
Тезроқ тинишини кутиб ётибмиз.  
Дўстлар қабримиизга қўяётганда,  
Тинч ётинг, дейишган бошларин эгиб.  
Ерда шунча ғавғо бўлаётганда  
Бажармоқ мумкинми улар ўгитин.  
Жуда ҳам нотинчмиз, жуда нотинчман,  
Қандай ором олай ер кўрпасида,  
Сув, осмон, авлодим турса дучма-дуч  
Ҳаёту ўлимнинг қоқ ўртасида.  
Ўрмонни ёқмоқ-чун кифоя гугурт,  
Атомни ушлаган ваҳший қўллар бор.

### О на

Барибир у қўллар жуда-жуда мўрт,  
Уни жиловлашга қодир диллар бор.

### С у р а т

Итни қопмайди деб бўлмас, азизим,  
Тушларингга кириб, сергак бўл, дейман.  
Одамлар! Доғ суртманг ақл юзига,  
Дунёнинг умрига тирак бўлинглар.  
Қачон уруш оти ўчса оламдан  
Она тупроқ ичра узатиб оёқ,  
Хотиржам бўларкан авлод, боламдан,  
Хаёл-хотирангдан кетаман йироқ.

## О на

Ҳатто, ит уришса зирқирап қалбим,  
Одам одам пайин қирқмоқ бўлса-чи?  
Сўзсиз қичқираман, нега туғилдим,  
Қулоқларим батанг бўлиб қолса-чи!  
Уртада бўлсин деб қадр ҳам иззат,  
Айрилиқ ва ўлим яралганими ё?  
Шунда ҳам тантлил қилиб табиат,  
Буюк бир ақлни берган-ку аммо.  
Шу ақл тантана қилар, азизим,  
Тантана қилади шафқат ва виждон.  
Қуни кечагина Тошкентимизда  
Тилу дил топишиди Ҳиндур Покистон.

## Сурат

Бизларни кўрсанглар, жон кириб кетди.

## О на

Тошкентнинг мусаффо, эркин ҳавоси  
Ёвуз ниятларни чилпарчин этди.  
Икки халқ эришди муддаосига.  
Азиз пойтактимга тикилди кўзлар,  
Кўплари хурсанду кўпи аламда.  
Дунё эфирида Тошкент сўзлади,  
Ғурур эркалади дилу танамни.  
Тинч ухла, бўлмагин сира безовта,  
Сизлар бош қўйған бу қутлуғ тупроқни  
Хўрласак ва ёки берсак бировга  
Бўлганимиз яхши ўзимиз ҳам хок.  
Ўликлар қучоқлаб ётсаю маҳкам,  
Наҳотки, тириклар туради лоқайд?  
Унақа тириклик нимага малҳам,

Унақа тириклик кимга керак, айт!  
Оналар номидан сўзлаяпман мен,  
Аёл қудратига ким келтирап шак..  
Дунёни сўраган подциоҳлар ҳам  
Бирининг гўдаги, бирига ошиқ.  
Ингирманчи асрнинг голиб туғида  
Қалбимиз қони бор, буюклиги бор.  
Ойни кафтга олган фан ютуғида  
Биз силаган бошнинг тиниқлиги бор.  
Ҳаёт яратмоққа яралганимиз биз,  
Яратиш топташдан мушкул ҳамиша.  
Шундан билса бўлур қудратимизни,  
Масъулмиз оламнинг ҳамма ишига.  
Фарзанд нафасидек ширин нарсани  
Яралгандан бери билмайди олам.  
Мана, димогимда ҳамон нафаси,  
Ҳатто куёв бўлиб қолса ҳам болам.

### С у р а т

Қайнана бўлдим де?

### О н а

Шундоқ, дадаси.  
Келинимни кўрсанг, қилгундай кўз-кўз.

### С у р а т

Сочлари узунми? Қанақа эси?

### О н а

Ҳаммаси жойнда, камсухан, камсўз.

### С у р а т

Үғлим-чи? Қадрингга етадими у?

## О на

Албатта. Бўй-басти қўйгандай ўзинг.

## С у р а т

Қара, тонг отяпти, бермадим уйқу,  
Чарчадинг чамамда, қизарган кўзинг.

## О на

Сира ундан дема, тирик бўлсанг ҳам,  
Барибир шу кеча ухломас эдик.

## С у р а т

۷

Ёруғ тушиб қолди, ҳовлига қара,  
Ҳали ҳам кеч эмас, мизгиб ол жиндек.

Мусича кукулаб, булбул сайради,  
Ойнадан нур тушди она юзига.  
Нурга ўралгандай яшинаб, ярқираб,  
Келини жилмайиб турар кўзида.  
Ойи, деб илк марта чақирар уни,  
Чойга таклиф қиласар эъзозлаб балки.  
Лекин она қалбин, шу бедор тунни,  
Шу кунги суҳбатни у билармикан?..

1963—1966

## ҚУШНИЛАРИМ

### КИРИШ

Талай шеърлар ёздим, дилимда ётган  
Шодлигу қайгуни битдим эрта-кеч.  
Аммо бир алам бор тикандек ботган,  
Унинг жароҳати тугамади ҳеч.

Тирикман, тўқ, тўкин яшаялман ҳам,  
Бурчми, одамликми, виждонми қарзим,  
Ишқилиб, тимдалаб турар шу ярам,  
Балки у тутқазган менга куй, созни.

Балки гўдакликда мажруҳ бўлган дил  
Бугунги баҳтидан энтикканидан.  
Кўшиқ шайдосию шоир бўлгандир,  
Шундандир қўшиққа жонни тиккани.

Бунда ёзганларим барн ҳақиқат,  
Ҳаммаси маҳаллам аҳлига аён.  
Шоирнинг пинҳоний ғуссаси фақат,  
Қилмоғи мумкиндинир бир нафас ҳайрон.

### I

Маҳалламдан аста бораман ўтиб  
Болалик йилларим кечган кўчадан.  
Туғилган шаҳримдан қолганман кетиб,  
Софиниб келаман анча-анчада.

Лекин менга таниш ҳар гўша, ҳар уй,  
Ҳар битта дарвоза, ҳар битта дараҳт.  
Олис-олисларга тортқилайди ўй,  
Қалбим хаёлларнинг кўксидага карахт.  
Бу ерда ҳеч нарса ўзгармагандек,  
Девор наҳрасига бош қўйган тут ҳам.  
Довучча пайтидан сийлаган қантак  
Ҳали ҳам маҳалла аҳлига ҳамдам.  
Чанг қўнгандай япроқлар саргайган бир оз,  
Қари танасида бормикан изим.  
Ана, чак-чак томган сувида наврўз  
Сочимни ювганим қадрдон узум.  
Ҳаммаси ўшандай, фақат қўштерак,  
Баҳайбат қўштерак кўринмас бугун.  
Орзиқиб тушарди боққанда юрак,  
Бола хаёлимга ташларди тугун.  
Тубида бўларди ҳовузу супа,  
Сувида сузарди бақаю ҳазон.  
Сўлим саҳарларда шу ердан сўфи  
Жимжитликни бузиб айтарди аzon.  
Маҳалла устидан гамгин ва сирли  
Ваҳима уйготиб ўтарди сузиб.  
Мени ҳам хаёлга тушириб асири,  
Ширин тушларимни кетарди бузиб.  
Бизларга бу даргоҳ бир жумбоқ эди,  
Ҷўчиб қочар эдик аста суқиб бош.  
Офтоб қиздирганда кирманглар, дерди.  
Кирманглар, дердилар, қорайганда қош.  
Шу даргоҳ ўзгарган, фақат шу даргоҳ,  
Қадими дарвоза бўялган кўкка.  
Қизча юргилаб чиқди баногоҳ,  
Аёл кир ёярди тортилган илга.  
Сўлим бир боғчаки, мевалар шигил,  
Ишкомга ёнбошлаб мудрайди узум.  
Гўдаклик йилларин эсладими дил  
Кия дарвозадан узолмай кўзим —

Терак ҳайбатини ахтардим бир дам.  
Гуллар ханда урди қаршимда кулиб.  
Жувон кир чаяди гүё бу ердан  
Қўрқувларни ювган фаришта бўлиб.  
Чуғур-чуғурлашиб бир тўда қизлар  
Ҳайнқмай, чўчимай кириб кетиши.  
Қўғирчоги бўлсам қўлларидағи,  
Ўйинчоги бўлсам йўлларидағи.  
Оҳ, жажжи қизларжон, мени бу қизлар  
Яна болаликка асир этиши.

## II

Бунда мен таниған биринчи олам,  
Биринчи кўрганим қадрдан қўшни,  
Шу жойда илк марта меҳрибон онам  
Мени аллалаган меҳрдан жўшиб.  
Осмон тиниқлигин сезганман шунда,  
Ер узра биринчи қўйғанман қадам.  
Мана шу кўчадан кўтариб қўлда  
Бағрида эркалаб ўтарди дадам.  
Баҳор гўзаллиги, қуёш жилоси  
Шу жойда сингиган кўзу дилимга.  
Шу жойда ҳаётнинг илк алифбоси  
Бийронлик баҳш этган гўдак тилимга.  
Беҳи гулидаги майин чиройга  
Ҳайрату сукутда бўлиб маҳлиё,  
Юлдузларни санаб, термилсам ойга,  
Сирли кўринарди бу олам гўё.  
Чақириб, номимни атаб илк марта,  
Дарвозамга келган дугонам, дўстим.  
Оҳ, қани у кунлар келсайди қайта,  
Мунча тез улғайдик, мунча тез ўсдик.  
Мунча тез ўтиби маъсум у кунлар,  
Гуласи узилган парпиракмисол —  
Қайга фойиб бўлди, қани у тунлар?

Бир эртак айтишсак, бир сурсак ҳаёл.  
Беркинмачоқ ўйнаб ойдин тунларда  
Югуриб, қыйқириб баъзан тонггача.  
Шу кичик, бағри кенг, пастқам уйларда  
Баҳам кўришардик туздан нонгача.  
Биринчи оламим, азиз маҳаллам,  
Аҳил қариндошдан аҳилроқ, иноқ.  
Сени эсга олсам яйрайди таним,  
Озгина олислик туюлар фироқ,  
Ҳайбатли бинолар қисибди гарчи,  
Мунғайиб ёнида сурасан хаёл.  
Аммо, сен, азизим, менга, мен учун  
Ирмоқлар макони азим тоғмисол —  
Пурвиқор, юз олтин уйга бергусиз  
Мунису муҳтарам, гўзал, кўркамсан.  
Жаннатдек жойлар ҳам татимас сенсиз,  
Меҳру оқибатда жонга оромсан.

### III

Қимдир нон ёлади, ширин ҳид сузар,  
Яна болаликка югурап ўйим.  
Гўё шу дам онам кулчалар узар,  
Дўппимни тутаман қўлларим куйиб.  
Яна қизлар кирап югуриб, елиб,  
Қалдирғочдек қўниб ариқ четига.  
Кулчани бўқтириб тўймас эдик еб,  
Оқизоқлар қилиб сувнинг бетида.  
Сувларки, оқарди тўлиб, ҳайқириб,  
Кўзгудек беғубор, тиниқ, ярақлар.  
Қани унга бирор кўрсин тупуриб,  
Шунчалик муқаддас эди ариқлар.  
Ховучлаб ичганда юрак яшнарди,  
Томоқ оғриғини билмасдик, ажаб.  
Совуқ сув ичма, деб онам уришса,  
Қўшнига чиқардим чопқиллаб, қочиб.

Үрик шохларини қилиб гоҳ ларzon,  
Липлага тўлдириб довуччаларни,  
Тишлар қамашгунча ер эдик баъзан,  
Данагин гоҳ чақиб, гоҳ кўчаларга  
Иргитиб, кийикдек сакрардик тинмай.  
Фаму андуҳ нима, ўйламай, билмай,  
Офтобда қорайиб, сувда чўмилиб,  
Гоҳ уйлар ясардик қумга кўмилиб.  
Яланг оёқ лопта ўйнаганимиз,  
Кўчаларга сиғмай қайнаганимиз,  
Келинчакни кўрсак кўзимиз ўтиб  
Шивир-шивирлашиб сўзлаганимиз.  
Мунча тез ўтибди у маъсум кунлар,  
Гуласи узилган парпиракмисол —  
Қайга ғойиб бўлди, қани у тунлар?  
Бир эртак айтишсак, бир сурсак хаёл...

#### IV

Ана, келишмоқда қизлар бир тўда,  
Дугонамга ўхшаб қора қош бири.  
Қўлларда китоби, серфикр жуда,  
Балки ўйлашарлар оламнинг сирин.  
Дарвозалар бирин-кетин очилиб,  
Сийраклашиб қизлар, кўча жимиди.  
Бири қиё боқиб кулди-ю, қочди,  
Ё мени таниди, билмам ким эди.  
Қизгина, шошмай тур, шошмай тур, жоним,  
Шу ҳовлида бордир шўхлигим, кулгим.  
Узилиб кетганда шода маржоним,  
Тизиб берган жувон бувингдир балки.  
Бизлар кашта тиккан ўша лой супа,  
Намозшом гуллари ҳали бормикан?  
Шолчадачувалиб турли ранг ипак,  
Қизгина, сенга ҳам интизормикан?  
Кашта тикар эдик бунда йигилиб,

Ранго-ранг ипакдан яшнаб дилимиз.  
Сувда оқиб келган тутни сузиб еб,  
Ширасидан ёрилгудек бўлиб тилимиз,  
Ҳовуч-ҳовуч сувни ичардик яна.  
Ҳовли-ю супага сепсак нимтатир,  
Шабада эсарди бирам хуш, майин.  
Атрофга таратиб гуллар атрини.  
Жамбулурайхонлар яшнаб кетарди,  
Худди ўзимизга ўхшаб кетарди.  
Ҳовузга узилиб тушганде олма,  
Атрофга ёмғирин тўшаб кетарди.  
Қийқириб кулардик талашиб гоҳи,  
Ёқут тарамидан кўзимиз яшнаб.  
Ажиб бир ҳислардан ёниб нигоҳи,  
Сузилиб гоҳ онанг бошларди қўшиқ.  
Унинг куйларига беркинганд соғинч,  
Қизгина, сенмидинг ўшанда балки.  
Шошмай тур, жонгинам, эшигингни оч,  
Ҳовлингда бор менинг ёшлигим, кулгим.  
Мунча тез ўтибди маъсум у кунлар,  
Гуласи узилган парпиракмисол —  
Қайга гойиб бўлди, қани у тунлар?  
Бир эртак айтишсак, бир сурсак хаёл.

## V

Ҳали ҳисларнимиз топмасдан камол,  
Ҳали орзуларнинг узилмай кети,  
Ҳали ойдинларда кўрмай мажнунтол,  
Упа-сурма билмай кўзу бетимиз  
Ҳаёт гирдобига шўнғиди бошлар.  
Оlamга сифмаган шодликлар тинди,  
Қолиб кетди лопта, кашта, тўптошлар,  
Бирдан катта бўлиб қолгандик энди.  
Оталар урушга жўнади бир-бир,  
Тирик етим бўлиб қолди болалар.

Йигитлар айттолмай кетди дил сирин,  
Уларсиз ҳувиллаб кӯча, далалар —  
Кўзларга тун мисол чўкди бир алам,  
Юзларни тарк этди офтобдай кулгу.  
Кексалар қаддини эгиб қўйди ғам,  
Оналар кўзидан йўқолди уйқу.  
Юрт бошига тушган шундай оғир дам,  
Ақлу ҳисларидан куйгандек ўзи.  
Бир умрга ташлаб бизларни дадам,  
Бир умрга юмди меҳрибон кўзин.  
Онам ўттиз ёшда бир жаҳон ҳусн —  
Бир этак бола-ла қолганида тул,  
Тақдирнинг бешафқат зулми савдосин  
Англаб олган эдим ўшанда буткул.  
Бошқалар кутарди, кутмас эдик биз,  
Улар кўзидағи умид учқуни  
Қаддимизни кўтариб туради сўзсиз,  
Мақсаду нонимиз бирлиги учун.  
Эгасиз шумшайган ҳовлидай бўлиб,  
Гавжум кўчамизда кулгилар тинди.  
Ойдин кечаларда йигитлар тўлиб,  
Қўшиқ айтиб ўтмай қўйишиди энди.  
Ўн саккиз баҳорни, ўн саккиз ёшни  
Бўз кўйлагу малла жомакорларда  
Кутиб олган эдик, азиз тенгдошлар,  
Ҳаққимиз қолгандир не баҳорларда.  
Ойна қаршисида соатлаб туриб,  
Вақтимиз йўқ эди эзмаланишга.  
Аммо сочимизни авайлаб ўриб,  
Селкиллатиб жўнаб қолардик ишга.  
Бу ҳарир либослар, шоҳи-ю атлас  
Кўрмаган ўн саккиз баҳоримизни.  
Энди қилиб қолсак қизилни ҳавас,  
Ёшлар мазах қилиб кулишар бизни.  
Субҳи саҳарларда навбат кутардик,  
Кўзларга сургудек ноннинг увоғин.

Баъзан очликни ҳам унутар эдик,  
Кўриб, қора кийган қўшнининг доғини.  
Белимиз букилса қўямиз деб бош,  
Уғил ўстирганди бунда бувалар.  
Келин олиб юртга берамиз деб ош,  
Сандиқ тўлатарди мунис бувилар.  
Сеплар қолиб кетди тугунга тушмай,  
Тўйга аталган дон тироглиқ қолди.  
Келинлик либосин оҳори ўчмай,  
Не-не парисифат, не-не нозанин  
Хижрон чангалида дил ранги ҳазин,  
Пардоз буюмлари ўроғлиқ қолди.

## VI

Мана, тўкиб тураг бульдозер савлат,  
Кемтиқ қилиб узун кўча бошини,  
Бунда Қаюм ота кута-кута хат,  
Ҳеч кимга кўрсатмай мунгли ёшини  
Бўлди Абдуваҳобнинг ўтида нобуд,  
Ўғли елкасини кўрмай тобути.  
Абдуқаҳдор кетди, Лутфулло кетди,  
Қўчкорбой, Маннопжон ва Мусахонлар.  
Ёлғизу арзанда Қутбилло кетди,  
Кетди Мадаминбек ва Исохонлар.  
Эй, азиз одамлар, қай бирин айтай,  
Хали мен турибман кўча бошида.  
Нарига ўтишга тоқат йўқ, қайтайн,  
Ортиқ санамоққа етмас бардошим.  
Меҳнату меҳрга бўлгандек ҳайкал,  
Бир ёнга тушибди пештоқли уйлар.  
Бундан ўтганимда кўзимга ҳар гал  
Келади битмаган, чала ёзувлар.  
Фиштин иморату сўлим бир ҳовли,  
Гуллар уфурарди атрофга ҳидин.  
Кўчам бир адабни йўқотған балки,

Жўнаб кетганида бундан Патиддин.  
Эҳтимол, бу уйлар бўларди музей,  
Бир эзгу, умру буюк меҳнатга.  
Начора, афсуски кетди бузилиб,  
Тушмай бир қарору ва бирон хатга.  
Эй, азиз одамлар, қай бирин айтай,  
Ҳали мен турнбман кўча бошида.  
Нарига ўтишга тоқат йўқ, қайтай,  
Ортиқ эсламоққа етмас бардошим.

## VII

Маҳалламдан аста бораман ўтиб,  
Бир оз одамови, камсухан, сокин.  
Кулги, шодлигидан, тўйидан тортиб,  
Чеккан изтироби қалбимда лекин.  
Мана, узун йўлак, кичик дарвоза,  
Қайноқ хотиралар яна тортади.  
Хосият бувининг қилганин қазо  
Эслайману тағин алам ортади.  
Беш ўғил, азамат беш ўғил кетди,  
Айтишга осондир, бу ҳазил гапми.  
Гарчи жимжитгина оламдан ўтди,  
Лекин чин қаҳрамон эди шу кампир.  
Мулойим, хушсухан, бирам беозор,  
Ўйнаб кириб қолсак кулиб турарди.  
Бир оёғин силаб аста ер босар,  
Бир оёғи оқсанб, секин юрарди,  
Муштдек юрагида тогдек ғам-алам,  
Яна кўрармикан беш ўғил-мардин.  
Балки дупуримиз малол келса ҳам  
Ичига ютгандир ўшанда дардин.  
Ўғилларки, яна муаллим, доктор,  
Агроном бўлувди кенжатой бири.  
Одобда уларнинг тенглари йўқди,  
Начора, биттаси қайтолди тирик.

Отинг ўчкур уруш, қонхўр аждаҳо,  
Не-не йигитларни ютган шумқадам.  
Оlam сендан қачон бўлар мусаффо,  
Қачон яшар экан беташвиш одам?!  
Қанийди, кўзида кекса онанинг  
Юрсалар солланиб беш келин, овсин.  
Қанийди жам бўлса Валиевларнинг  
Униб-ўсган гўзал бир оиласи.  
Ана, чиқиб келар ўрта ёш жувон,  
Неъматжоннинг содиқ беваси, дўсти,  
Унинг тўрт фарзанди кўзи ниғорон,  
Ота дийдоридан бенасиб ўси.  
Йўқ бунда бағри бут бирон хонадон,  
Одамлар қаддини ушлади сабот.  
Кетган йигитларни бир-бир санасам,  
Достоним рўйхатдан бўлиб иборат,  
Топиб бўлмас эди, балки давомин,  
Оҳ, қайси бирининг айтайин номин...

### VIII

Биринчи оламим азиз маҳаллам,  
Аҳил қариндошдан аҳилроқ, иноқ.  
Сени эсга олсам яйрайди таним,  
Озгина олислик туюлар фироқ.  
Ховлиларни ўрик гулига буркаб  
Баҳор ёзганида бунда сепини.  
Мирзатеракларнинг мунҷогин излаб,  
Маржон қилмоқ учун терардик ипга.  
Чулғаб олар эди мени ажиб ҳис,  
Бўтана сувларда оқиб ўтса гул.  
Тинглардим завқимдан ҳайрону маъюс,  
Богда сайраб қолса ногаҳон булбул.  
Лолақизғалдоқлар имларди томга,  
Шотига тирмашиб чиқиб олардим.  
Нур ичида ёнган тиниқ оламга

Ошиқу маҳлиё бўлиб қолардим.  
Офтобда чўғланиб деразалари  
Туарди мактабим бундан кўриниб.  
Тиниқ кўкда сузган булут музлари  
Томчи ташлаб ўтса гоҳи уриниб,  
Полақизғалдоқнинг косаларидан  
Териб ичмоқликни қилардим хаёл.  
Ўзимни ҳис қилиб афсоналарда  
Кўкатлар ичида ўтирадим лол.  
Кўриниб туарди бундан қўшнилар,  
Оҳ, яна хотира, аччиқ хотира  
Нега ҳам хаёлим томга бошлади.  
Энди енгил тортган дилимни хира —  
Қилмай қўя қолса нима бўларди,  
Тилмай қўя қолса нима бўларди.  
Ут босган ариқнинг лабидаги тут  
Маъюс термилади, ана, олисдан.  
У кунни қандайин қилайн унут,  
Қувонч чил-чил синса бешафқат ҳисдан.  
Қариб мункиллаган Тўфа холанинг  
Ховлиси туарди ғарид, ҳувиллаб.  
Чархи секин-секин чекарди нола,  
Иғи айланарди аста ғувиллаб.  
Арслондай уч ўғил кетган урушга,  
Эл бошига тушган савдо, не қилсин.  
Қарилник, кирайин деса бир ишга,  
Юрмаса беасо ахир не қилсин.  
Кенг енгига ўраб калаваларни  
Бозор томон аста ташларди қадам.  
Лекин шу бир туп тутнинг меваларини  
Қўни-қўшнилар-ла кўрарди баҳам...  
Ўйларим, тарқалинг, бас, етар энди,  
Қийналган жонимни баттар эздингиз.  
Гўё боғлаб мени отнинг думига,  
Сира ҳам аямай олам кездингиз.  
Ҳеч уйқу бермайсиз, гўё ўрнимга

Тикан ва хасларни ташлаб кетасиз.  
Гоҳ дўст ҳажрида ботириб ғамга,  
Гоҳи ёшлигимга бошлаб кетасиз.

## IX

Андижон — қадимий заҳматкаш шаҳар,  
Меҳнатдан элининг қўллари қадоқ.  
Бунда тиқилинчdir ҳамиша ишлар,  
Ёзу куз ишлари бўлмайди адо.  
Лекин меҳмон учун вақти доим бор,  
Дилдан узатилган аччиқ кўк чойи.  
Бунда яйраб кетар келганда баҳор,  
Кўз-кўз қилиб бутун сепи, чиройин.  
Қуёш ҳам ардоқлаб ошиқ бўлган чин,  
Нефту оқ олтиннинг макони, юрти.  
Тер ҳиди анқиган кўйлаклар ичра  
Не гўзал, ажойиб қалбларни кўрдим.  
Жонсарак чоллару тинмас кампирлар  
Ёшлик нигоҳи-ла сизга боққанда  
Очилиб меҳнатнинг қудрати, сири,  
Танангизга илиқ бир нур оқади.  
Ез бўйи парвариш этар пахтани  
Ҳар фасл ўзининг ташвиши билан.  
Биламан, жуда банд бунда катталар  
Шеър ўқишдан масъулроқ иш билан.  
Шаҳар кенгаймоқда, бўлмоқда обод,  
Туну кун бағрида зўр қурилишлар.  
Шаҳар Советининг йўли мабодо  
Тушиб қолса кўчам «Янги турмуш»га,  
Зора сатрларим унга ҳам ёқиб,  
Менинг ҳисларим-ла бир марта боқиб,  
Юзлаб тақдирларга бўлиб рўбарў,  
Хаёлдан бир нафас туриб қолса у.  
Тўғри, ўртоқ раис, кўчамдан аммо,  
Чиқмаган биронта машҳур қаҳрамон.

Қаҳрамон эмасми қилса жон фидо,  
Ахир қайтишмади кетғанлар омон.  
Қатор ўғил берган оналар умри,  
Бир ҳайкалга, раис, арзиса керак.  
Қаҳрамон чиқмаган кўчамдан, тўғри,  
Балки шунинг учун ўйчансиз андак.  
Ҳар кўчага ҳайкал, мумкинмас ахир,  
Деб балки куласиз, дилда эътиroz.  
Майли, кўчаларга ҳайкаллар тўлсин,  
Шаҳар ҳайкаллардан иборат бўлсин,  
Инсон унинг билан қилинса эъзоз.  
Биламан, ҳайкаллар кўтармоқда қад,  
Ёнида турганман таъзим ила жим.  
Ёнида турганман сукутда кўп вақт,  
Кўз ёшим тийишга етолмай кучим,  
Она-Ер қурбонлар қонидан гўё  
Ўчмас олов ёқиб ётар кифтида.  
Биламан, мардлигу поклик доимо  
Ватан ардоғида, элнинг кафтида.  
Аммо не қилайки, шоирлик ҳисси —  
Эзгуликка тўймас юрагим яшар.  
Кўчамдан кетғанлар ёниқ нафаси  
Юзимга урилса дейман ҳамиша.  
Бунга келин бўлиб тушмаган қизлар,  
Бунда туғилмаган гўдаклар ҳаққи,  
Тўхтаб қолган тўйлар, саргайган юзлар,  
Рўёбга чиқмаган тилаклар ҳаққи,  
Бир ҳайкал қурмоққа режа тузсангиз,  
Ундан сўнг кўчамни, майли, бузсангиз.  
Токи етмиш йиллик қадрдон қўшни  
Учрашиб турсалар бунда гоҳ-гоҳ.  
Аввал-ку, бўлишиб ердилар ошни,  
Энди ганиматдир бир дийдор — нигоҳ.  
Бунда лола, гуллар очилиб турса  
Навқирон ёшдаги умрдек яшноқ.  
Ўлганларнинг руҳи шодмон юрса,

Машъал тутган зийрак йўлчига ўхшаб.  
Азиз қўшниларим, қадрдон кўчам,  
Борди-ю, орзуим очолмаса гул,  
Ранжитмасин сизни, ранжиманг ҳеч ҳам  
Тилагим бўлмаса раисга мақбул.  
Меҳнату меҳримдан бериб мен сайқал  
Шеърим билан сизга ўрнатдим ҳайкал.

1968

# АЛЛА

*Онамга бағышлайман*

Қайдан сўз бошламай, дунё умрининг  
Қайси бир жилдини варақламайин,  
Етганча хотирам, меҳрим, шуурим  
Оналар номини ардоқлагумдир.  
Қўкка устун қўйиб, ер ҳуснин очган,  
Юлдузга ном берган боболар ҳақи,  
Илк марта гўдагин ўпган, опичган,  
Эмизган, юргизган момолар ҳақи,  
Аҳли донишларни туғиб, ўстириб  
Узи унут бўлгани отинилар ҳақи,  
Фарзанд — давлатидан бир четда туриб,  
Ийманиб яшаган хотинлар ҳақи,  
Ҳисларим, жунбушга келинг бир нафас,  
Ҳисларим, қофозга тўкилинг равон.  
Шундай бир меҳнатдан очмоқчиман баҳс,  
Уни бошларману қилмасман тамом.

## I

Мен унинг йиғисин эшиитмай ҳеч вақт,  
Чидашим осонроқ дўзау ўтига.  
Бошдан-оёқ олам туюлиб бадбахт,  
Дунё чаппа айланиб кетар кетига,  
Бир қатра ёш кўрсам унинг бетида.  
Йўқ, унинг йиғисин эшиитмай сира,  
Қалбимни шерларга тутмоғим осон,

Бошимга қуласа бу гумбаз-қаср,  
Сув ўрнига зардоб ютмоғим осон,  
Онани кўргунча noctor ва сарсон.  
Ким уни йиғлатса, кўр бўлар бешак,  
Одамлар назари куйдирар охир.  
Ҳатто афсус ермиш у ётган бешик,  
Она-ку, билмайди қарғиш ва қаҳр,  
Одамлар назари куйдирар охир.  
Йўқ, унинг йиғисин эшиитмайин ҳеч,  
Инсон бу қийноққа бўлмасин дучор.  
Унга сигинурман ҳам эрта, ҳам кеч,  
Унинг дуосисиз кўкармоқ душвор,  
Одамлар, одамлар, бўлинглар ҳушёр.

## II

Қуёш уйғонаркан, киприклари-ла  
Бир-бир териб олиб кўк юлдузларин  
Пуркаб юбораркан ҳув, йироқларга,  
Тонг бўлиб оқаркан унинг излари.  
Шамол денгизларнинг тўшини ёриб,  
Тўзғитиб, шопириб дур хазинасин  
Элаки қиларкан офтобга қориб,  
Безамоқчи бўлиб тонгнинг сийнасин.  
Нурларга илашиб биллурий шабнам  
Ғунчалар лабини тарк этгани чоқ,  
Офтоб бўясасидан ловиллаб бирдан  
Сергакланиб гуллар ёзаркан япроқ.  
Чақалоқ лабидан олиб сут ҳидин  
Масрур учар эмиш еллар ҳам саҳар.  
Йўқса, тонг шуничалар бўлмасди тиник,  
Ҳаво ҳам бўлмасди бунча муаттар.  
Тонгни олқишлишашиб қушлар сайраса,  
Куртаклар жонланиб уқаласа кўз,  
Интилиб, қиёғин чўзаркан майса  
Офтоб қулоғига айтмоқ бўлиб сўз.

Тенгиз бу санъатни қўзғатған овоз,  
Майину ва мудроқ она алласи.  
Субҳ-сабоҳ ҳамиша унинг билан соз,  
Унинг билан гўзал саҳар палласи.  
У алла айтмаса тонглар отмайди,  
У алла айтмаса қўёш ботмайди.  
У алла айтмаса дилларнинг ғашин  
На сувлар ювмайди ва йўқотмайди.  
Унингиз яшамоқ бўларди даҳшат,  
Балки маймунилигича қоларди одам.  
Ва ёки бўларди ҳиссиз бир ваҳший,  
Гўзаллик, теранлик бўлмас эди ҳам.  
Алла тингламаса одам боласи  
Қаердан оларди муҳаббат кучин.  
Тилаклар, орзулар бўлади ҳосил,  
Онажонлар алла айтгани учун!  
У аввал мунг эди, аччиқ бир нолиш,  
Севги ва афсусга тўла бир оҳанг.  
Аёл кўз ёшидан ҳўл бўлиб болиш,  
Уни ютар эди мисоли наҳанг.

### III

Онам алла айтса синглимга гоҳи,  
Мурғак юрагимга ларза тушарди.  
Вужудимни ўртаб алланинг оҳи,  
Айтманг, деб ёлвориб уни қучардим.

Меҳрибоним кетди-ю, алла,  
Меҳри кўзимдан кетмади, алла.  
Меҳрибоним йўқ учун, алла,  
Ҳеч ким мени ёд этмади, алла.  
Мен кетарман бош олиб, алла,  
Қаро кўзимга ёш олиб, алла...

Буни ким тўқиган, кимлар тўқиган,  
Қайси бир вужуддан узилган бу ўт?  
Қанча-қанча шеърий китоб ўқидим,  
Ҳали қилолмайман мен уни унут.  
Балки илк шеъримдир ўша изтироб,  
Одамликка қўйган илк қадамим ё.  
Гўдаклик йилларим ўтказиб шитоб,  
Кенгликларга мени этган маҳлиё.

#### IV

Кенгликларга интилади дил.  
Кенгликларни қўмсайди кўзи.  
Деворларни кўтариб буткул,  
Кенгликларда изғийди эси.  
Ёлғиз қолса тутқундир гўё,  
Қанотсиз қуш, бсгул, беосмон.  
Далаларни кезса ҳам яёв,  
Инсон бўлсин ёнида, инсон.  
Қандай юрган эди чачвоида,  
Чимматларни тешгандир кўзи,  
Меҳр экиб ёруг жаҳонга,  
Меҳрга зор ўтганди ўзи.  
Қандай юрган эди чачвонда,  
Қандай тўғсан юзини чиммат.  
Ахир шу нур, шу юрт, шу Ватан,  
Умри эди, умридек қиммат.  
Очиқ юз-ла боқмаса бир дам,  
Бўғилади, диққанафасдир.  
Келмаса дўст, келмаса одам,  
Шинам уйи унга қафасдир.  
Хуркитилган оҳу мисоли  
Иўқ, ўйлари эмасдир қўрқоқ.  
Чўққиларга яшар интилиб,  
Кун нурига бўлади арқоқ.  
Фариштани чўчитиб кўкда

Валентина изи турибди.  
Олисларда, ўша кенгликда  
Аёл қалби, кучи юрибди.

V

Ҳеч ким сўрамаган таржимаи ҳол,  
Ўзи ҳам ёзмаган нутқу ариза.  
Сийлагану тантىқ тутмаган иқбол,  
Тақдирдан гоҳ хижил ва кўпроқ рози.  
Меҳнат дафттарчасин тутмаган мутлоқ,  
Қадоқ бўлса ҳамки қўли меҳнатдан.  
Ўтди олифталик, ҳашамдан йироқ,  
Яна йироқ тутди ўзни миннатдан.  
Маникюр нелигин билмас тирноғи,  
Рост, бир вақт уларга қўйганди хино.  
Аммо унинг тиккан ироқиларин  
Болалар киярди қўйишиб бино.  
Денгиз шовқинини қилмас тасаввур,  
На ўзга элатга сайру саёҳат.  
Шу осмон остида ўтказди умр,  
Холдан тойса ҳамки юрди саломат.  
Ҳуснини улашди фарзандларига,  
Ҳатто соchlарининг тим қора рангин.  
Жонин малҳам қилиб ҳар дардларига,  
Меҳри-ла юволди кўнгиллар зангин.  
Оз эмасди улар, беш қиз, уч ўғил,  
Қандай юришарди ўйни тўлдириб.  
Бири дилларини қилганда хижил,  
Хушнуд этар эди бири кулдириб.  
Кексалик кўзларга тутганда туман,  
Кучу ғайратингни олганда сўриб.  
Хотиралар содиқ, яқин дўстсимон  
Қаддингни тикларкан қўлтиқقا кириб.  
Лекин юрагида жиндек бир ўкинч,  
Озгина пинҳоний дардми ё армон.

Фақат болаларга кетибди кучи,  
Юртнинг хизматида урмабди жавлон.  
Йўқ, она, онажон, эй жафокашим,  
Саккизта фарзандни улғайтирган мард.  
Қилмадим демангиз юртнинг ишини,  
Қўнмасин армондан дилингизга гард.  
Элнинг тилагига саккизта қанот,  
Қаддига саккизта тиргович берган,  
Мушкулига яна шунчалик нажот,  
Енгмоғига яна шунча куч берган  
Сизмасми, онажон, эй, муҳтарамим,  
Меҳрингиз ўтида қўёш исинсин!  
Сизни куйламаса агар қаламим,  
Майли, унтилсин, майлига, синсин.  
Лоқайд бўлолмайсиз дунё ғамига,  
Оналик қалбингиз барчасин туяр.  
Уруш ўғлингизни тортган домига,  
Мана, ҳалигача дилингиз куяр.  
Оналар кузатмаса ўғилларини  
Ойга етармиди одам оёғи.  
Оналар тиёлмаса йифиларини  
Бахтга йўл бермасди фироқнинг доғи.  
Тангри ҳам, жаннат ҳам, ишқ ҳам ўзингиз,  
Қодирлик, борлик ҳам, давлат ҳам қувонч.  
Сиз омон бўлингу босган изингиз  
Кўзларимга суртиб мен ҳам юрай тинч.  
Безовта хаёлга асируман баъзан,  
Қолгиси келмаса ишдан келинчак.  
Бу яхши хислату ва лекин ёмон  
Бир четда чанг босиб ётса беланчак.  
Оилалар обод, дастурхон тўкин,  
Битта ё иккита фарзанд бор-йўғи.  
Керак бўлиб қолар бу ҳолда бир кун  
Туғишга ундаған давлат бўйруғи.  
Эй, азиз онажон, эй, жафокашим,  
Саккизта фарзандни улғайтирган мард.

Қилмадим демангиз юртнинг ишини,  
Қўйнисин армондан дилингизга гард.

## VI

Ажиб ҳид анқийди ернинг бағридан,  
Гүё кўкрак тутар навжувон она.  
Лолалар тўлдириб яшил барига,  
Улкага навбаҳор меҳмондир яна.  
Бўтана сувларда ялпизнинг ҳиди,  
Үрик гулларидан таралур ифор.  
Тераклар ним яшил тўнини кийди,  
Баҳордан ранг олиб осмон ҳам зангор.  
Бинафша лабида яна болари,  
Ариқлар бўйида сабзадан гилам.  
Чумчуқлар чирқиллар патини тараб,  
Рўзгорин бошлаган қурт-қумурсқа ҳам.  
Далалар бошида яна иш, режа,  
Машина рулида ҳилпирап рўмол.  
Эгик новдаларин попук-ла бежаб,  
Беланчакка маҳтал яна мажнунтол.  
Оппоқ саҳарларда нурга нур қўшиб,  
Борлиқни яшнатиб алла таралур.  
Дилимни яйратар энди бу қўшиқ,  
У бахтдан энтиккан қалбда яралур.

Чаманларнинг бўйи келар шамол билан, аллаё  
Менинг болам эгизакдир иқбол билан, аллаё.  
Москов кетган онажони орден тақиб, аллаё  
Келиб қолар кулган гулгун жамол билан, аллаё.

Чуғур-чуғур турна ўтди тўдасида, аллаё  
Қўй-қўзилар қайтиб келар подасида, аллаё.  
Неварамнинг аяжони кийиннади, аллаё  
Шу замоннинг энг охирги модасида, аллаё.

Райҳонларнинг шохидандир еллигичим, аллаё,  
Гул ичидан териб олган гулпарчиним, аллаё.  
Бўйларингга минг тасаддуқ бўлсин онанг, аллаё,  
Шакар қўзим, ширин сўзим, Ойбарчиним, аллаё.

У алла айтмаса, тонглар отмайди,  
У алла айтмаса, қуёш ботмайди.  
У алла айтмаса дилларнинг ғашин  
Кулгулар ювмайди ва йўқотмайди.

## VII

Менга қанот беринг, бир қанот учқур,  
Шу оқшом кезайнин Ватанини бедор.  
Кумуш саҳарларда нур бўлиб учиб,  
Хоналар ичига бир-бир боққим бор.  
Олима ёнига бир қучоқ сирень,  
Шоир столига қўйиб бинафша.  
Ёрқин чеҳраларга мен бўлиб асир,  
Шу оқшом юрайин далалар ошиб.  
Райҳон улашайин пазандаларга,  
Станок қошига лолалар тақай.  
Меҳр-ла термилиб фарзандларнига  
Алла айтганларга яна бир боқай.  
Колхозчи аёлга сунбулу хино,  
Элтайнин гулларнинг энг кўркамини.  
Новвойга тоғлардан мусаффо ҳаво,  
Токи у сезмасин олов дамини.  
Муаллим қошига баҳорни қўйисам,  
Бор ҳусни, бор кўрки бисоти билан.  
Шу оқшом мен ширин бир хаёл бўлсам,  
Учсан шамолларнинг қаноти билан.  
Дунё гулларининг асл, сархилин,  
Сочайин онамнинг оёқларига.  
Нилуфар келтирай ҳаттоки кўлдан,  
Бир дамгина сингил қучоқларига.

Сўнг алла тинглайин мени баҳтдан тўниб,  
Япроқда титраган бир қатра бўлиб.  
Аллалар янграсин, банди-бандида  
Баҳт балқиб, жаранглаб турсин барада.  
Бор бўлсин оналар, бор бўлсин фарзанд,  
Яшасин ҳамиша оламда алла.

*1972, маъ*

## ЛИРИК НУТҚ

### I

Шиддат-ла оқади бу азим дарē,  
Шуъла нуқра сочар ажин юзига,  
Олиб кетолмай шу нурни гүё,  
Гүё қайта олмай яна изига  
Буралиб, тўлғаниб ўтар ноилож,  
Хаёлларим унга бўлади ҳамроҳ.  
Сўзиз сирлашамиз дил тубин очиб,  
У менга, мен унга бўлгандек гувоҳ.

### II

Шу нурда ювилиб ўтди ҳисларим,  
Шу нурда чўмилди қалб, истак, имон.  
Аммо нурдек покми босган изларим,  
Поклигига бирор қилмасми гумон —  
Шуларни ўйлайман пинҳона ёниб,  
Шеърларим ҳақида ўй суриб сокин.  
Бир ташна ичдими бу ҳисдан қониб,  
Хўрсиниб қўйдими кўз юмиб секин?  
Дарē-ку, ювади ғубор лашкарин,  
Дарē-ку, ранг берар гулу гиёҳга.  
Мен арта олдимми бир кимса ашкин,  
Табассум бўлдимми бирон нигоҳга —  
Шуларни ўйлайман пинҳона ёниб,  
Шеърларим ҳақида ўй суриб сокин.

Бир ташна ичдими бу ҳисдан қониб,  
Хўрсиниб қўйдими кўз юмиб секин?  
Мен-ку, ўз наздимда шеър уммонига  
Соҷдим анор гулин тиниқлигини.  
Нон ҳидини қўшдим,  
Қўшдим ҳалол қўллар суюклигини.  
Кўз ёшининг аччиқ ҳам шўр таъмин,  
Дилларни кемирган ҳижрон аламин,  
Жимжит оқшомларнинг оҳангларини,  
Беда гулларининг ҳиди, рангини,  
Ғанинг қувончи-ю, баҳт мاشаққатин,  
Дононинг нодондан чеккан заҳматин.  
Юртимнинг шуълада чўмилган кўркин,  
Тоғларнинг булатдан қўндириган бўркин.  
Буюкликнинг қудрати, бардошларини,  
Бўронларнинг ҳеч ким кўрмас кўз ёшларини.

### III

Бу азим дарёда оқади ҳислар,  
Безовта қалбларни кифтида тутиб.  
Унинг тўлқинига шўнғишиш кўзлайман,  
Ҳаловат, тинчимни бутун унутиб.  
Мен шу дарёдан туйдим илк марта  
Оlamни чулғашга қодир эрк исин.  
Лермонтовнинг шикаста,  
Пушкин буюклигин,  
Faфур Fуломнинг  
Юлдузлардан қўйилгандек тиниқ кулгусин.

### IV

Чиллаки чумак уриб, олмаларга ранг кирди,  
Марғилон бозорлари тўлди анвойи исга.

Анжирларнинг юзига офтоб зарҳал югуртди,  
Наманганнинг боғлари ўхшаб кетди атласга.

Бу өдийнинг ошиғи Ғафур Ғулом, қайдасиз,  
Давраларда соғиниб қўмсаб қолди ошнолар.  
Андижон йўлларида қайта бўлиб пайдо Сиз,  
Ғазалларга кўмсангиз бу ғазал ташналарин.

Ўзи эккан олманинг шохлари ларzon бўлиб  
Абадиятга кетган Ойбекнинг бош устида.  
Чаманлар ҳам йиглади бир абри найсон бўлиб,  
Етуклик чимирилған мангла-ю, қош устида.

Шайх оғанинг соchlарин жингаласин сўнгги бор  
Еллар силаганида қиши эди, совуқ эди.  
Сигарета қисилган лабларда кулги, виқор  
Қанчалар суюк эди, ҳам чиндан буюк эди.

Не баҳтки, суҳбатидан бўлган эдим баҳраманд,  
Не баҳтки, шеърларимга тушганди назарлари.  
Бугун уларни қўмсар кўҳна Шошу Самарқанд,  
Шафтоли ҳиди тутган Марғилон бозорлари.

Ана, дарё оқмоқда тўлқинлари эшилиб,  
Соҳилида мен гирён эслайман устозларни.  
Улар ҳам кетди энди шу дарёга қўшилиб,  
Аммо, эшитилиб турар ҳеч ўчмас овозлари.

## V

Мендан сўрадингиз таржимаи ҳол,  
Ҳам ҳайрон турибсиз нени сўзлар деб.  
Бошқа бир афзалроқ тақдир кўзлар деб

Зинҳору базинҳор қилмангиз хаёл.  
Сира бош тортмайман жавоб бермакдан,  
Бошқа бир андиша, хираглиқ ҳам йўқ.  
Ўз йўлимдан доим кўнглим, кўзим тўқ,  
Аммо сўз бошладим ҳисоб бермакдан.  
Мен сизга кўрсатдим қутлуғ дарёни,  
Ризқим ҳам ҳисларим унга сочилган,  
Дардим, армонларим унда очилган  
Ларзага солгундек ғофил дунёни.  
Туйғулардан эрур бу дарё суви.  
Қатраси тақдирдир, қатраси заҳмат,  
У оби ҳаётдир, у оби раҳмат,  
Не-не ғуборларни кетади ювиб.  
Мени тарқ этмади бир ўй ҳар нафас:  
Үқ еган ўрдакнинг патидай тўзғиб,  
Кўзу юракларда ачиниш қўзғаб  
Дарё соҳилига қуламасам бас.  
Мени тарқ этмади истак муқаллас:  
Эритилган бир томчи олмосдек бўлиб,  
Куй бўлиб, нур бўлиб ва кулиб-кулиб  
Унинг тўлқинига томиб кетсам бас.

## VI

Кишанлар қисарди билагимнимас,  
нақ юрагимни.  
Хўрликлардан эдим тупроқ қатида.  
Бутун унутаёзган тилакларимни  
Илк бор эшийтганман  
Россиядан эсган ел қанотларида.  
Таржимаи ҳолим шундай қисқаси,  
Энг олий баҳтимдир инсонлик шаъним,  
Иўлларимда энди гул, шуъла иси,  
Шу қудратли Ватан, менинг Ватаним!

Иигирма ёшдайдим улуғ партиям,  
Тонгдай ҳисларимни олганда кутиб.  
Одил ва меҳрибон нигоҳидан дам  
Нари бўлганим йўқ,  
У берган таълимни байроқдай тутиб.  
Баҳорлар балқиган кўчалар учун,  
Алёр жаранглаган кечалар учун,  
Боламнинг тинч, ширин уйқуси учун,  
Мени сархуш қилган кулгуси учун,  
Юртдан юртга ошган куйларим учун,  
Тубанлик сифмаган ўйларим учун  
Доим таъзимдаман.

Бахт, ноним ҳалол,  
Ана шундай менда таржимаи ҳол.  
Еруғ мактабларда ақлим улғайди,  
Мурғак шеърларимга кўчди ҳисларим.  
Кўзларимда олам нурга чулғанди,  
Ўша шеърлар менинг йўлим-изларим.  
Бир гўдак ўйлари, текис, нораста,  
Тупроқда ҳам ғубор кўрмаган кўзлар.  
Олам ҳам, одам ҳам унда орастা,  
Сут ҳиди кетмаган тилда чулдираб  
Сут каби покиза ҳислардан сўзлар.  
Ўша шеърлар менинг йўлим-изларим,  
Таржимаи ҳолимдир ўша ҳисларим.

## VII

Оқ қайин шохида занг босган каска,  
Үрмон сукутида унинг овози.  
Бағримдаги юрак чўян эмаски,  
Энди мен гул терсам дилимни ёзиб.  
Тупроқ ҳарсиллайди жонли вужуддай,

Безовта қалб каби гурс-гурс уради.  
Бу сокинлик галати,

галати жуда,  
Гоҳи шип-шип қилиб, гоҳи қуюндаӣ  
Кимларнингдир рӯҳи бунда юради.  
Бундаги ҳар гиёҳ ёшда ювилган,  
Гуллар дилда қолган армондай ўқсик.  
Ҳам гавжум,

яна жим,

Ҳам ҳувиллаган  
Бу йўлларни ҳисларим қўйганди тўсиб.  
Энди бу чиройга босолмай оёқ,  
Бир четда тураман ўйларга тутқун.  
Гарчи гул,

ўт-ўлан атроф,

ҳамма ёқ,

Аммо ер қаъридан сачрайди учқун.  
Минглаб таржимаи ҳол менга рўбарў,  
Аламли-ю ёрқин қисматлар бари.  
Қандай мен гул терай, кезай беқайгу,  
Қандай мен кўзимдан кетказай нари.  
Гул эмас, ҳаттоки бундаги хасга  
Оёқ босиш учун етмайди кучим.  
Ҳаммасига сабаб бўлди шу каска,  
Юрагим ёняпти, ёняпти ичим!  
Қайнилар, шовилланг, шабада юрсин,  
Мен сувдай шимирай тафт босмоқ учун.  
Қайнилар, шовилланг, шабада юрсин,  
Юрагим ёняпти, ёняпти ичим!  
Балога бардош бергай, эй она тупроқ,  
Гарчи масканимдир бу жойдан узоқ,  
Қисматимдан сени қандай ўчирай?!  
Дардингни айтиб-айтиб ларза солурман,  
Уша соғ қатрага сени кўчириб,  
Ҳам қутлуғ дарёда ювиб олурман.

Онам ташлаганда паранжисини  
 Уни қутлаш учун дунёга келдим.  
 Тутқунлик, чўрилик ва ғаму ранжга  
 Ўт очилган ҳужум йиллари эди.  
 Чиммат қилларидан димиққан чеҳра,  
 Қуралай кўзларга нур қўнди илк бор.  
 Ҳаводан илк марта олди-ю баҳра,  
 Илк бор нигоҳида яшинади баҳор.  
 Гўзал хотинини ўзбек йигити  
 Илк марта мактабга борди етаклаб.  
 Кучи етмай қолди диннинг ўгитин  
 У чиқиб кетгандан остона ҳатлаб.  
 Бешик тутқичидан китобга ўтди,  
 Нафису қудратли, жафокаш қўллар.  
 Ҳарфлар нур бўлиб зулматни ютди,  
 Аммо мушкул эди унда бу йўллар.  
 Гарчи бу матонат ва сабот эди,  
 Гарчи бу эмасди онам хатоси.  
 Қўчин ортиб бошқа шаҳарга кетди,  
 Сира кўниколмай севган отаси.  
 Дилида соғиниш, лабда ним кулгу,  
 Бир кўзи менда-ю, бири қогозда,  
 Бахт билан армондан тўқилган туйғу  
 Илк бор алла бўлиб учди оғзидан.  
 Янги Шарқ туғиларди онам аксида,  
 Туғилиш бўлмайди аламсиз, дардсиз.  
 Орзулар уйғонди қотган кўксида,  
 Орзуларки, офтобдай губорсиз, гардсиз.  
 «Правда» ўқиган Ленин сурати  
 Эъзоз-ла илинди уй тўрисига.  
 Дадам сўзлар эди унинг ҳиммати  
 Ва фирқа бошлаган йўл тўғрисида.  
 Қадрини, шаънини англаш бошланди,  
 Қувноқлик югурди алла, қуянга.

Онам ўзи билмай мени бошларди  
Шеърият аталмиш дарё бўйига.

## IX

Қани энди уйғонсаму тамом бўлса мудҳиш туш,  
Енгинамда кундай кулиб ўлтирса мунис онам.  
Қайта бошдан файзга тўлса етим қолган у гўша,  
Қайта бошдан бир осуда куйга тўлса бу хонам.

Бахтимни ҳам, ғамимни ҳам айтмоқ учун шошардим,  
Олислардан эркаларди оромгина оғуши.  
Бир энтикиш, бир талпиниш дилгинамдан тошарди,  
Бугун эса ҳайрон-гаранг, бошларимда йўқ ҳушим.

Сабохонни саболардан сўрсам, топиб бўлурми,  
Бошгинамни минг тошларга урсам, топиб бўлурми?  
Қуюн бўлиб титкиласам еру самовотни мен,  
Товоналарим титилгунча юрсам, топиб бўлурми?

Энг бахтли дам туйғуларин ўксиб-ўксиб ёзардим.  
Дадагинам назарини кўрмади деб шеърларим.  
Уттиз йилки, тупроғидан дилга таскин изладим,  
Уттиз йилки, қадамини ўпмас Анжан ерлари.

Мурғаккина жонгинамга боғлаб қанча орзусин,  
Уйларимнинг тўриси-ю, пойгагини кўрмади.  
Тиззасида эркалатиб арзанда неварасин,  
Тўйларимда бир мулојим жилмайиш-ла турмади.

Оҳ, бу олам кемтик бўлмай бутун бўлса нетарди,  
Улим асли сароб бўлса, тутун бўлса нетарди?  
Ёш-ёш эмас, ҳатто қариб билмай касал, заволни,  
Ота-она бу дунёга устун бўлса нетарди?

Бор вужудим кўз ёш бўлиб қуюлсаю дарёга,  
Ота-онам акси қолса тиниқ тўлқинларида,  
Шундагина ёруғ юз-ла боқар эдим дунёга,  
Ҳам озгина босармиди қалбим ёлқинларини.

Бундай пайтлар бир ўй босар ёнган дилим тафтини,  
Дадам орзу қилганидек шаҳрим яшинар гуркираб.  
Сингилларим жамолида онажоним келбати,  
Унинг кўзи, меҳри билан шукур қиласман қараб.

## X

Боғларга бурканган эртакдай юртим  
Ишкомларда узум хилма-хил маржон,  
Ташбеҳга сўз топмай ҳайратда турдим,  
Исми ҳам жисмига монанд Андижон.  
Нефту оқ олтииннинг хазинаси бу,  
Тошу тупроғида офтобнинг ҳиди.  
Фаргона водийсин нақ сийнаси бу,  
Ҳамиша руҳимга қанотдир ёди.  
Арслонбоб тоғидан эсган шабада  
Терак баргларига қўнгандан майин,  
Кўчани тўлдириб қайтганда пода,  
Жомакор қозиқда олганида тин  
Ажойиб файз чўкар қишлоқларига.  
Ҳовлиларда суҳбат, қўшиғу кулги.  
Бу дамни қўмсайман мен йироқлардан  
Қизгиш уфқларга қўзимни тикиб.  
Пахтакор шаҳарим, майли, ҳордиқ ёз,  
Офтобнинг селидан қорайган чеҳранг  
Оқшом салқинидан руҳ олсин бир оз.  
Лабларингга қайтсан ним гулобий ранг.  
Ҳали пахта зумрад рўмолин ечиб,  
Кўрсатсани йўқдиrif садаф тишларин.

Хирмонлар бошида уйқулар қочиб,  
Кўпайиб кетади ҳали ишларинг.

## XI

Яримта ой сеҳрланмиш Боги Шамол<sup>1</sup> устида,  
Юлдузларга чўмилган бир нурли жамол устида.  
Андижоним шу кунларда авжи камол устида,  
Шоирлари кўрса қолар ажиг хаёл устида.

Афсонадан тушган каби шаҳар ётар пойимда,  
Завқу шавқдан сўз тополмай ўтираман жойимда.  
Чироқларнинг замзамаси қўлимдаги чойимда,  
Гўё у ҳам титраб тураг шаккару бол устида.

Осуда тинч ҳаёт акси чеҳраларда намойиш,  
Кулги, гурунг, мулозамат, бир-бирига сипориш.  
Бектош оға ташаббуси дилларга хуб бўлди хуш,  
Қулоқ тутсам гап боради иону ҳалол устида,

Хушманзара йўлларида довонларнинг ҳавоси,  
Фир-фир эсган шабадаси чарchoқларнинг давоси.  
Омихтадир кабоб ҳиди, ҳофизларнинг навоси,  
Бир ошиён бўпти тенгсиз боғу зилол устида.

Бу чиройни Попович ҳам кўраётир, наздимда,  
Шошиб-шошиб харитага қараётир, наздимда.  
Ҳайрон бўлиб Артюхиндан сўраётир, наздимда,  
Кемалари равон сузиб баҳту иқбол устида.

Афв этсинлар, энди Қавказ боғларини нетай мен,  
Кўнглим узиб бу жойлардан қандай Тошкент кетай  
мен,

---

<sup>1</sup> Андижонда Бектош Раҳимов ташаббуси билан барпо этилган оромгоҳ.

Илҳом бергач, тақди裡имга уни туташ атайман,  
Шеърга қўнган ҳислар қолар ҳар бир ниҳол устида.

## XII

Саратон ҳансирап вужуди ёниб,  
Дазмолга теккандек бозиллайди ел.  
Еру кўк орзуси сув ичмоқ қониб,  
Далалар устида сароб худди сел.

Узларин панага олмиш қушлар ҳам,  
Ниначи сув узра қамишида лоҳас.  
Иссикдан безовта тунги тушлар ҳам,  
Кўзга ўт салқин жой, бир парча палос.

Ташна япроқларга бўлмоққа қувват,  
Ошиқиб югурап меҳнаткаш канал.  
Ўту ўланларга қилиб мурувват,  
Хинн гулларига сочиб ёқут-лаъл.

Зумрад кўсакларга мўъжиза боғлаб,  
Ифор қовунларга қўшиб шира, бўй.  
Гоҳида мулойим, гоҳи ўйноқлаб,  
Тўлқинлари тинмай чалиб ўтар куй.

Тўғон гувиллайди тўзонлар сочиб,  
Кетмонлардан учган қутлуғ чанг мисол.  
Лоқайд кетолмайман сувидан ичиб,  
Сўроққа тутади бу синчков хаёл.

Бу кунга ким етди, етолмади ким,  
Қимларга қилмади қатраси насиб.  
Зиёрат қилгали уларнинг хокин  
Олиб боргим келар сувлар насимик.

Яшил соҳилларда бедор, жонсарақ,  
Юсуповнинг руҳи юргандек ҳамон.  
Деҳқонларни тутиб ҳазил, сўроққа,  
Сувтўра<sup>1</sup> ҳам бунда тургандек омон.

Ҳозир писанд эмас денгиз яратмоқ,  
Энди техника бор қудрати азим.  
Аммо мен қадрдан кетмонга шу чоқ,  
Ҳам билак кучига қиласман таъзим.

### XIII

Мажнунтолнинг соялари, шарқираган сойлари,  
Меваларга шарбат пуркар жазира маёнлари.  
Оддийгина деҳқонининг кўрганини кўрмаган,  
Ўтмишида карвон-карвон туюнган бойлари.

Ҳар ҳовлиниң этагидан мўралайди атиргул,  
Райхонларнинг ўртасида сўлимгина шоҳсупа.  
Гаражида таҳт турибди ярқираган «Жигули»,  
Қирқ кокилли капитани юзга суртади упа.

Нон ҳиди-ю гул ҳидидан баҳтиёру маст бўлиб  
Оддийгина сўзларинг ҳам шеърдек учса не ажаб?!  
Кўз илғамас пахтазорнинг битта четида туриб.  
Одамзоднинг қудратига қилгум қуллуқ, таажжуб.

Гарчи сендан олис тушди менинг нону насибам,  
Пойтаҳт кулиб кутиб олиб, йўлимга баҳт тўшади.

---

<sup>1</sup> Сувтўра — машҳур ирригатор Синявскийни деҳқонлар шундай аташган.

Илғамаган рангларимнинг унда билдим ҳисобин,  
Тақдиримда у ҳам азиз, у ҳам сенга ўхшайди.

## XIV

Жоним риштасига туташ бу диёр,  
Тупроғин қаричи ганжу хазина.  
Жонзотки, сувини ичдими бир бор,  
Айланиб кетолмас кўнглини узиб.

Денгизнинг қаймоқдек ҳаволари ҳам,  
Сеҳрига кўмолмас бир нафас ёдин.  
Урмоннинг мулойим саболари ҳам  
Баримни тутолмай ҳайратда эди.

Оқшомлари қўнганимисиз Тошкентга пўлат қушда,  
Шуълаларнинг оғушига ғарқ бўлгандек энтикиб.  
Кафтдек равон кўчалари нурли дарёга ўхшар,  
Замин яшнар чироқлардан кўксига маржон тақиб.

Зилзиладан титраган ер бугун гўё кулмоқда,  
Дўстлик яна қардошликтининг қудратидан олам лол.  
Биноларнинг кўзгусидан куй, кулги тўкилмоқда,  
Ҳар хонада базми улфат, ҳар уйда базми висол.

Эртакдаги тилсим тўла хазинадек ўлкамсан,  
Ҳар кўрганинг кўзларидан фақат ҳайрат қўйилар.  
Хуш келибсиз, деган сўздай карами кенг, кўркамсан,  
Мечмоннавоз одамларинг жонга туташ туюлар.

Бекатларда бош силкитиб гуллар қолар нигорон,  
Рангларининг акси нетар кўзларингни яшнатиб.

Ўзбек юрти, ҳар бир гўшанг, ҳар тарафинг бир бўстон,  
Ой туққанми, кун туққанми сени бунча ўхшатиб?

Эритилган ойнамисол Ҳамзаобод сувлари,  
Пишқирганда пойга учган аргумоқдай кўпикда.  
Чумчукларнинг чирқиляши, мусича кукулари  
Акси садо берган каби туюлади уфқдан.

Пахта, ипак, қоракўлинг, мева-ю буғдойми ё,  
Айтаверсам, бойликларнинг йўқ саноғи, баҳоси.  
Симу зарга ўраб сени шунча қилолди эъзоз,  
Адолатнинг тожи бўлган партиямнинг даҳоси.

Мурунтовинг манглайнингда ярқираган бир гавҳар,  
Саховатга минг қайтариқ, лутф тўла минг таъзим.  
Ҳам Россия қудратига қувват бўлган бир камар,  
Ҳам мангулик варағига битилган ўтли назм.

Меҳнат шундоқ бахт бўлдики, малол келмас елкага,  
Дўл ёғса ҳам, сел ёғса ҳам план ҳамиша тўлди.  
Чорак аср бўляптики, бу улкан республикага  
Шароф aka қутлуғ қадам, чиндан шарафли бўлди.

Энди боғлар шовиллайди не-не чўллар ўрнида,  
Қараб туриб дил ҳаприқиб кетар фаҳрдан жўшиб.  
Шу боисдан сатрларим юрагимнинг қаъридан  
Кимлигимни ва боримни тортиб чиққан бир қўшиқ!

Мен дарёга кулиб-кулиб тасвирингни кўчирсам,  
Ойнасида бутун кўркинг жилва қилса мастона.  
Шамол бўлиб ҳаволарга атир бўйин уфурсам  
Ва севгимга чирмаб қўйсам менинг Ўзбекистоним!

Уруш түғагану жароҳатлардан  
 Ҳали оқар эди кўз ёш, ситамлар.  
 Термилиб сарфайган рангсиз хатларға  
 Иўл пойлар эдилар ҳамон етимлар.  
 Ватан инграб-инграб ўнгланаар эди,  
 Туман орқасида қолган офтобдай.  
 Оналар ҳам ҳорғин, ҳам мунгли эди,  
 Кўз ёшда битилган ўтли китобдай  
 Қалбни зирқиратар эди нигоҳлар.  
 Сўзсиз ҳол сўрашу ва сўнгсиз мотам.  
 Дорилфунун отлиқ улуғ даргоҳга  
 Шундай бир пайтда қўйгандим қадам  
 Бағри кенг Тошкентга боқар эдим лол,  
 Дунёнинг ярмининг бошин силаган.  
 Эсон-омон кузатиб оқ иўл тилаган  
 Бу хотам шаҳарга келмадим малол.  
 Миллатлар қариндош бўлди бағрида,  
 Дилярга қадрдан қуролди қаср.  
 Уни тоблаб олди меҳрин қўрига,  
 Faфлат кушандаси шиддаткор аср.  
 Полопон қанотлар куч йиғди унда,  
 Орзулар жилваси қўйди сеҳрлаб.  
 Парвозга йўллади қутлуғ бир кунда,  
 Покиза, мўътабар бир тақдир тилаб.  
 Қуёшсиз йўқ эди оламу одам,  
 Илмсиз бўлурди бу дунё зиндан.  
 Илм ол, деб Ленин имзо чеккан дам,  
 Үзбек манглайига баҳт қўнди чиндан.  
 Муаллимлар оғзига ташна тикилиб,  
 Ҳаво-ю ёруғлик ютгандек тетик.  
 Бир порлоқ қисматни тасаввур қилиб,  
 Орзу қанотида оққушдек эдик.  
 Студентлик йиллари чиқарми эсдан,  
 Байрамларни кутган узун оқшомлар.

Баъзан тўлиб-тошиб кети йўқ баҳсдаи,  
Гоҳ енгиб, гоҳида енгилган дамлар.  
Кимнидир ёқтириб, кимгадир ёқиб,  
Гоҳ ёзиб, гоҳида ёдлашиб байтлар...  
Ииллар-ку, ўтмоқда дарёдай оқиб,  
Аммо эсдан чиқмас у маъсум пайтлар.

## XVI

Уфқларнинг чин ошиги ўйинқароқ бир йигит,  
Илинди-ю шеър домига, сўнгра бўлди асирим.  
Сўймас эди тартибларни, хушламасди ўгитни,  
Мана энди сипо тортиб ўтирибди тақсирим.

Мен ёзсанму у ёзмаса гўё эдим гуноҳкор,  
У мақталса мен қувондим эсламмаган кезларим.  
Аёллигу оналикдан мушкул, ширин нима бор,  
Ота-бала орасида талаш бўлди ҳисларим.

Кундуз демай, оқшом демай, яна демай ёзу қиш,  
Софиндимми, ҳамроҳ бўлди Андижон йўлларида.  
Қадрдонлик, дўстлик шундай орамизда урди ниш,  
Бўстон бўлди боғим, ҳовлим ҳавасманд қўлларида.

Мени қайта шоир қилди қизгинамнинг кулгуси,  
Муҳаббати шеърларимни бирдан қилди истило.  
Унинг билан жозибада жилва қилди келгуси,  
Ҳар жилвада минг хил оҳанг, минг хил бўёқ, минг жило

## XVII

Розиман ҳаётим, тақдир, умримдан,  
Шоирлик меҳнати қисматидан ҳам.

Сиз билан жимгина олисдан туриб  
Дарду қувончимни кўраман баҳам.  
Шундайин жимгина сўзсиз, сўроқсиз  
Кириб ҳам борурман уйларингизга.  
Шундайин жимгина, сўзсиз, сўроқсиз  
Урнашиб ҳам олгум ўйларингизга.  
Пок бир нигоҳ бўлсам, нурли бир хаёл  
Ёмонликдан ҳазар, ишга ташналик.  
Озгина сохталик тош каби малол —  
Келса-ю, шеърларим бўлса рўшнолик —  
Шаффоф бир томчига айланганим шу.  
Умрим, меҳнатимдан розилигим ҳам.  
Шу томчида ёнса юрагим мангу,  
Ҳам ўзи куйдирса, ҳам тутса малҳам,  
Бўлардим жафокаш ҳислардан рози,  
Кечганим сафарлар, излардан рози.  
Танҳо ўзим билан ўтган вақтдан ҳам,  
Ҳатто юз ўгирган севги, баҳтдан ҳам.  
Ноҳақлик олдида ожиз қолсам гоҳ,  
Ҳатто тушларимга Ленин киради.  
Бир шиддат руҳимда жўшади ногоҳ,  
Шеърларимда унинг қони юради.  
Мендан қудратлироқ топилмас шунда,  
Мендан журъатлироқ топилмас шунда.  
Дийдор ғанимату чой бир баҳона,  
Дегандек сабабчи бўлиб бир сўроқ,  
Ярим асрлик умр остонасида  
Сизга дил тўкишга сездим иштиёқ.  
Кимлардан бурчлиман, нелардан хурсанд,  
Кимлардан бўйнимда узиб бўлмас қарз.  
Недан обрў топиб, недан едим панд,  
Бир айтиб ўтмоқлик зотан эди фарз.  
Фикрлардан бошқа қонлар югуриб,  
Уйқу излаб тунлар дори ичган пайт,  
Юрак ҳам безовта гурсиллаб уриб,  
Шоирликдан баъзан кечгим келган пайт

Суҳбатингиз яна бўлиб бир орзу,  
Сиз билан кўришиш истаги ғолиб —  
Келарди-ю, бошда айланиб мавзу  
Тинчлигимни яна кетарди олиб.  
Мисрага сиғмаган ҳислар қайноги  
Ҳамиша турарди шошириб, икътаб.  
Ҳукмингизга ҳавола энди бу ёги,  
Деб аста энтикиб, қўйдим нуқтани.

1974 йил, Тошкент – Андижон

# МУНДАРИЖА

Дебоча . . . . .

3

## ШЕЪРЛАР

Коммунистлар партиясига . . . . .	7
Мавзелайда . . . . .	9
Раҳмат . . . . .	11
Ёшлиқ . . . . .	12
Ширин кокили . . . . .	13
Боғда . . . . .	14
Баҳор тоғида . . . . .	16
Андижон тонготари . . . . .	18
Шоир . . . . .	20
Москва . . . . .	21
Пўлда . . . . .	23
Колхозда . . . . .	25
Колхоз боғида . . . . .	27
Сувчи қиз . . . . .	29
Университет эсдаликлари . . . . .	31
Байрам тонготари . . . . .	31
Үқиш залида . . . . .	31
Баҳор оқшомида . . . . .	32
Илҳом . . . . .	33

Ватан . . . . .	35
Пушкин . . . . .	35
Менинг Ватаним . . . . .	37
Овозим . . . . .	40
Қишлоқ . . . . .	42
Партбилет олганда . . . . .	44
Байрам паради . . . . .	46
Қиши оқшоми . . . . .	48
Биз тинчлик хоҳлаймиз . . . . .	50
Ленин . . . . .	52
Тонгда . . . . .	53
Янги йил кечаси . . . . .	55
Шеъримнинг давоми бор . . . . .	57
Гармончи . . . . .	59
Коммунистлар партиясига. («Шу буюк...») . . . . .	61
Гулхан атрофида . . . . .	62
Сув қўйгандим гулимга . . . . .	64
Куз . . . . .	65
Қўғирчогим, оппогим . . . . .	67
Теримчи қизга . . . . .	68
Баҳор билан суҳбат . . . . .	70
Ёлғиз икков бўлсак . . . . .	72
Учрашув онини кутиб . . . . .	73
Софиниш . . . . .	74
Ёшимни сўрама . . . . .	76
Қадрласанг инсонлигинги . . . . .	77
Баҳорни қаршилааб . . . . .	78
Сен ҳам шундаймидинг . . . . .	80
Сени ўйлаганда . . . . .	81
Қуёш чиқди . . . . .	83
Не истайсан дейсан . . . . .	84
Комсомолга . . . . .	85
Анҳор лабида жуфт-жуфт соялар . . . . .	87
Шеър ёёсам . . . . .	88
Қизларжон . . . . .	90
Бизга ҳурмат билан боққанларида . . . . .	91

Сира чилолмайман . . . . .	92
Қизим Нодирага . . . . .	93
Яна қизимга . . . . .	95
Алла . . . . .	97
Тошкент гуллари . . . . .	98
Баҳор шеъри . . . . .	99
Студентлар вальси . . . . .	101
Арғувон гуллабди . . . . .	102
Дутор . . . . .	103
Қор ёғар бўралаб . . . . .	104
Томчилар . . . . .	105
Лолалардан гулханлар ёқиб . . . . .	107
Баъзан хәёлимга чирмашиб олиб . . . . .	108
Ҳар ким ҳам яхши деб атаса мени . . . . .	109
Тонгги жамолидан турфа гулларничг . . . . .	110
Қуз . . . . .	111
Мана шундай бошланди бу шеър . . . . .	112
Қоғоз гул . . . . .	113
Чўри ҳам эмасман . . . . .	115
Қанча қалин ёғса ҳамки қор . . . . .	116
Бола эдим . . . . .	117
Ёмғир шовиллайди . . . . .	118
Қуш . . . . .	120
Тинмагур юлдузлар . . . . .	121
Зиналар . . . . .	122
Дунёда нимаики мавжудот бўлса . . . . .	123
Доим тонгга йўлдош бўлгани учун . . . . .	124
Нилуфар . . . . .	125
Новдалар чайқалар . . . . .	126
Уруғ . . . . .	127
Мен яхши биламән . . . . .	128
Баҳор . . . . .	129
Илҳом . . . . .	130
Баъзан ҳориб-толиб . . . . .	131
Қирда лолаларнинг бағрига шўнғиб . . . . .	132
Қизимга . . . . .	133

Қизгинач	134
Дилга яқин, аммо кўздан узоқ ёр	135
Фикрим ғаввос каби	136
Қаёкларда эдинг	137
Нотавон кўнглим	138
Ҳар нарсанинг боши ва охири бор	139
Қалам	141
Дараҳтлар гуллабди	142
Кеча бўртиб турған ғунчалар	143
Қоғоз	144
Ғунча очилиши сирдир	145
Ҳатто уйқусида хўрсина қизим	146
Қалб	147
Соч	148
Шеър кайфи	149
Романлар, азиzlар	150
Гулларга термилиб	151
Гилос шоҳларига	152
Майса ниш урибди	153
Шеъларим, қалбимдан силқсан қонимсиз	154
Шоҳлар кўтаролмас	156
Ийллар ҳатто сочдан рангни ўчириди	157
Арчазор ёнида	158
Сайр қилсангиз	159
Фикр чарчатади	160
Қоя	161
Булат чиқмаса кўкка	162
Арча	163
Қатра сингса ҳамки	164
Қизча талпинади	165
Ҳаётдан нолиса бирров, суймайман	166
Дадам хотираси	167
Билмайман, ҳар куни кекса бу дунё	169
Кўзларига сингиб кетар вужудим	170
Қор ёғар	171
Иўллар	172

Қалбим торларини . . . . .	175
Тонг бўзарib келарди . . . . .	176
Бадбўй шу ўсимлик . . . . .	177
Нур бўлиб порлайди . . . . .	178
Ўйқуга бош қўйди . . . . .	179
Чумоли уясни бузган болага . . . . .	180
Баъзан рўзгордаги бирон буюмни . . . . .	181
Сўнгги йўл . . . . .	182
Ишонч . . . . .	183
Қўшиқ . . . . .	184
Чўли ироқ . . . . .	185
Ердан нон ушоғин олганим кўриб . . . . .	187
Куз . . . . .	188
Йўқламаган ҳар куннинг . . . . .	189
Ялангоч новдалар . . . . .	190
Гуллар юзида ханда . . . . .	191
Ишқда вафо керак . . . . .	192
Тупроқ дейдикн . . . . .	193
Жийда гулларидан . . . . .	194
Фунчаларни ўйғотган шамол . . . . .	195
Билмайман, бу ўйда яшаганди ким . . . . .	196
Машиналар ғиз-ғиз ўтар ёнимдан . . . . .	198
Кун ботиб бормоқда . . . . .	199
Қизим қўшиқ кўйлайди . . . . .	200
Дарёларнинг ул юзида . . . . .	202
Изғирин ачитар . . . . .	203
Кимсасиз бу қирда . . . . .	204
Субҳидамда сувга чиқсан . . . . .	205
Далалардан мужда келар . . . . .	206
Бироннинг тилидан сўзловчилар кўп . . . . .	207
Денгиз бўйинда . . . . .	208
Итлар увиллайди . . . . .	209
Мен на давлату на баҳтдан камчил . . . . .	210
Урол Тансиқбоевга . . . . .	211
Меҳнату ташвишдан бўлсан сал пари . . . . .	212
«Ўтган йилги...» . . . . .	213

Шоғрни эслаб . . . . .	214
Хўрсингма, азизим . . . . .	216
Дутор йиғлар эмиш . . . . .	217
Согиниш . . . . .	218
Баъзан табиятнинг сеҳри-ла оқиб . . . . .	221
Кўп осуда эди бу олам . . . . .	222
Бир дўст азасидан келдим эзлиб . . . . .	223
Сунбула сувлардан губорни олди . . . . .	224
Ўғирланган вақт . . . . .	225
«Нижоллар шохини...» . . . . .	226
Шеърларим . . . . .	227
Асфальтни қоқ ёриб . . . . .	229
Осмон ёришмоқда . . . . .	230
Андижон . . . . .	231
Баҳор шамоли эсар . . . . .	233
Ёмон қилиқ . . . . .	234
Сени менга ёмон деса ким . . . . .	235
Не қилай, дунёнинг ташвишлари кўп . . . . .	236
Ёр келади . . . . .	238
Севдирган ҳам бездирган ҳам тил . . . . .	239
Сув бўйида мажнунтол . . . . .	240
Ақлим танибманки . . . . .	241
Субҳидам гулшанда ёр . . . . .	242
Ёнгир савалайди . . . . .	243
Оймоможон, оймомо . . . . .	244
Танбур . . . . .	246
Бош уриб тингласам . . . . .	247
Тинмай шитирлайди ҳовлида ҳазон . . . . .	248
Майли, гапирсингилар . . . . .	250
Тўзғийди ўрикнинг гуллари . . . . .	251
Бир олма келади тўлқинда ўйнаб . . . . .	252
Ишқ дарсида . . . . .	253
Сал нарсага қасам ичмоқлик нега . . . . .	254
Ой юзини аста чулғади булут . . . . .	255
Сенга совуқ бир сўз айтгим келарми . . . . .	256
Қуюқ киприкларга қўнгандек уйқу . . . . .	257

Қим қўлига олса ҳам . . . . .	258
Туни билан сени ўйладим . . . . .	259
Лайлак қизиқ қуш экан . . . . .	260
Инсофли бўл дейди кексалар . . . . .	262
Куни кечагина шеър ёзмоқ учун . . . . .	263
«Оlam гулга тўлди..» . . . . .	264
Машинка . . . . .	265
Дарё бўйида . . . . .	267
Ер узра қўнди оқшом . . . . .	268
Нечоғлиқ маъсумдир гўдак чедраси . . . . .	269
Қария ақлидек кузнииг осмони . . . . .	270
Тиним йўқ, қўним йўқ бу оламда ҳеч . . . . .	271
Одамлар талашар . . . . .	273
Сўппайган гилосининг чайир кафтида . . . . .	274
Ҳасад нималигин билмайман . . . . .	275
Онангни севгин деб . . . . .	276
Асрим нафасига соламан қулоқ . . . . .	277
Ёз . . . . .	279
Бувилар дуога қўлларин очиб . . . . .	280
Мажлис ҳайъатида ёзишур қарор . . . . .	281
Уйга ҳайдаб қўйди бу қиш . . . . .	283
Бир он тўхтаса-чи . . . . .	285
Жимжитлик бўлмасин . . . . .	286
Ҳаммадан қолади бу кўхна дунё . . . . .	287
Боғ кўча . . . . .	288
Онажон . . . . .	289
Мажнунтол сояси . . . . .	291
Сарин еллар . . . . .	293
Хаёлимни бузма . . . . .	294
Қўй энди, дам олсин . . . . .	296
Шеър ўқнгим келар . . . . .	298
Атласимни жилосида . . . . .	299
Мен сени шунчалар ёниб севганим . . . . .	300
Ўйқум қочиб кетди . . . . .	301

## ДОСТОНЛАР

Рұх билан сүхбат	.	.	.	.	.	.	.	.	.	.	.	.	.	305
Күшниларым	.	.	.	.	.	.	.	.	.	.	.	.	.	318
Алла	.	.	.	.	.	.	.	.	.	.	.	.	.	332
* Лирик нұтқ	.	.	.	.	.	.	.	.	.	.	.	.	.	341

---

\*© Ғафур Ғулом номидаги Адабиёт ва санъат нашриётін.

*На узбекском языке*

**САИДА ЗУННУНОВА**

**ИЗБРАННЫЕ ПРОИЗВЕДЕНИЯ В 3-Х ТОМАХ**

**ТОМ 1. СТИХИ И ПОЭМЫ**

*Редактор О. Матжон*

*Рассом А. Титов*

*Расимлар редактори Н. Холиков*

*Техн. редактор Э. Сайдов*

*Корректор М. Кудратова*

Босмахонага берилди 3/XI-1975 й. Босиншга руҳсат этилди 5/I-76 й. Формати 70×108 $\frac{1}{2}$ .  
Босма л. 11,5. Шартли босма л. 16,1. Нашр л. 9,6+0,05 (вклейка). Таражи 10 000.  
Р09729. Гафур Гулом номидаги Адабиёт ва санъат нашриёти. Тошкент, Навоий кӯ-  
часи, 30. Шартнома 22-74.

Ўзбекистон ССР Министрлар Советининг Нашриётлар, полиграфия ва китоб савдо-  
си ишлари бўйича давлат комитетининг 1-босмахонасидаги № 1 қогоғза босилди.  
Тошкент, Ҳамза кўчаси, 21. Заказ 859. Баҳоси 1 с. 34 т.

**Зуннунова С.**

Танланган асарлар. 3 томлик. I-т. Т., Адабиёт ва санъат нашиёти, 1976.

Шеърлар, достонлар. 1976. 368 б.

Бу китоб Санда Зуннунова ўз ҳаёти ва поэтик ижоди билан қандай йўлларни босиб ўтганилигини, қандай фикр-туйгуларни бошидан кечирганилигини кўрсатувчи ўзига хос қўзгудир. Зотан китобга унинг дастлабки шеърларидан тортиб, шу яқин йилларда қоғозга туширганиларигача хронологик тартибда жойлаштирилган. Шунингдек ундан шоиранинг „Рӯҳ билан суҳбат“, „Алла“, „Кўшиниларим“ каби достонлари ҳам ўрин олган.

**Зуннунова С. Избранные произведения. В 3-х т. Т. I.**